





RB171,180

LIBRARY  
*of the*  
UNIVERSITY  
*of*  
TORONTO



STILLMAN DRAKE

TKRS

~~5/7~~

Not in CF

5/4/70

average 15, 127

Subline 71, 127

sunspot 98

ponding 104

projected

capitulation 125, 127

Stationary earth 119

tides 124, 125

The first work  
is by Etienne Bel  
the second by  
Bourdin

See Descartes, ed  
Adam & Tannery  
IV, 498, n







*Inscriptus Catal. Coll. Soc. Jesu Aug.*

# SOL FLAMMA

CÆLORVM MOTRIX,

SIVE

## TRACTATVS

DE SOLIS NATVRA,

ET PABVLO:

Déque eius & Firmamenti, Stellarum-  
que & Planetarum motu circa  
Terram vt Centrum.


*Sol exurens montes & radios igneos exsuf-  
flans. Eccles. 43.*

*(Coll. Augens. Soc. Jesu catalogo ascript.)*  
APHORISMI ANALOGICI

parui mundi ad magnum, magni  
ad paruum.

*Mundum tradidit disputationi eorum. Ecc. 3.*

EDITIO SECVNDA.



PARISIIS,

Apud { SEBASTIANVM CRAMOISY,  
Regis & Reginae Regentis  
Architypographum:  
ET  
GABRIELEM CRAMOISY. } viâ Ia-  
cobæa,  
sub Ci-  
coniis.

M. DC. XLVII.

CVM PRIVILEGIO REGIS.

*Q. do D. N. Nan*

GOETTLING

ENTOMOLOGICAL

REVUE

TRACATVS

DE SOLIS NATURA

LIBRARIIS

Deputatus & Finanzant, Stellarius

des & Plantations, etc.

Terrains, etc.

Solentum, etc.

Paris, 1743.

APHORISMI NATURALISTICI

partim ordinati, partim inani

ad partem

Membris, etc.

LIBRARIIS

REVUE

PARISIS

ENTOMOLOGICAL  
REVUE  
LIBRARIIS  
PARISIS  
ENTOMOLOGICAL  
REVUE  
LIBRARIIS  
PARISIS

M. D. C. XLVII

ENTOMOLOGICAL REVUE





SERENISSIMO PRINCIPI  
ARMANDO  
BORBONIO  
PRINCIPI  
DE CONTY.

**M**VNDVM tibi sisto, PRIN-  
CEPS SERENISSIME, non  
pictum, fictúmque, aut,  
vt Cosmographicis in tabu-  
lis, rudibus lineis adumbratum,  
sed arte noua, miróque genio,  
dicámne ex magno, quantus  
quantus est, collectum in exi-



## EPISTOLA.

le, ac breue corpus; an ex tantillo, quantus homo est, immensa in spatia diffusum? vtrumque dicam, cùm sistam vtrumque, & paruum in magno, & magnum in paruo, tam aptè positum, mutuísque perpetuæ Analogiæ nexibus complexum, vt alterutrū qui videat, vtrumque intelligat; maximè præeunte Sole, noui operis nouo Prodromo, aut, ne quis sit offensionis locus, Antecessore. Neque verò tibi cur sistam potissimum quæres ex me, aut quisquam alius, qui te norit. Satis tibi conscius es humanitatis & facilitatis tuæ, quâ neminem non admittis, addictos verò tibi & benignè suscipis, & foues.



## EPISTOLA.

Norunt autem omnes , qui sanguinis tui splendorem toto orbe clarissimum suspiciunt, quantum ornamenti afferas studiis literarum, in iis dum versaris, vt ea tibi quodam iure, ac propè mancipio sint deuincta. Hæc ita sint licèt, aliud est tamen quod me mouit. Æquitas, & à nostra Philosophia ius sancitum. Nempe ex quo dedisti in oculis totius Galliæ, ac celeberrimo literarum theatro, eruditionis argumenta tam illustria, quàm dissoluendo impedita quæque facilitate incredibili, quàm difficilia, ardua, & abstrusa complanando, & illustrando, totam se tibi, suâque omnia addixit Philosophia tanto ardore, vt vo-



## EPISTOLA.

tis communibus te deinceps  
 difficultatum suarum, & inuen-  
 torum non disceptatorem, vt  
 plerosque, sed, quod tibi vult  
 esse tuum, arbitrum, & iudi-  
 cem deposcat. Quare, cùm hisce  
 temporibus miris studiis, ac ge-  
 nerali penè doctorem homi-  
 num contentione, Hypotheses  
 & Orbis Systemata concinnen-  
 tur, quibus ea, quæ fiunt vtroq;  
 in Mundo, Paruo, & Magno,  
 explicentur facilè, & sub ocu-  
 los ponantur, patieris pro hu-  
 manitate tua, vt placitis Philo-  
 sophiæ, & votis obtemperem,  
 & quam extorſi ab vno ex ami-  
 cis meis ingeniosè compoſi-  
 tam Mundi vtriusque Analo-  
 giam cum Sole præuio tibi of-



## EPISTOLA.

feram in perpetuum obsequij  
erga te mei monimentum. Ita  
Mundus qui nomen habet ab  
ornatu , à te trahet ornamen-  
tum: Ita Sol ille nouus à te splen-  
dorem mutuabitur , vel potius  
in hoc orbe te Solem agnoscer  
suum. Latere voluit auctor,  
quoniam à te beneuolentiam  
magis , quàm laudem expectat :  
quamquam illius iam planè cer-  
tus est , quandoquidem sub meo  
nominẽ profitetur obsequium ;  
at nemo tibi obsequi potest ,  
& repudiari. Erit igitur in hoc  
opere , re duplex , vnus nomine ,

CELSITVDINIS TVÆ

Seruus obsequentissimus  
PETRVS BOVRDIN.

*SVMMMA PRIVILEGII*

*Regis Christianissimi.*

**C**AVTVM est auctoritate Regis, ne quis  
in regno suo, alijsve locis sue ditioni sub-  
iectis intra decem annos proximos, librum qui  
sic inscribitur, Sol flamma, siue tractatus de  
Sole, vt flamma est, eiusque pabulo. Apho-  
rismi Analogici parui mundi ad magnum ma-  
gni ad paruum, &c. absque Sebastiani Cra-  
moisy Architypographi Regis & Regina regentis  
permisso, imprimat, aut diuendat, à die pu-  
blicationis horum exemplarium: qui secus fece-  
rit multa indicta, prout ampliùs in diplomate  
regio continetur, coërcebitur. Datum Parisiis die  
8. Februarij 1646. Sic signatum, De mandato  
Regis, CRAMOISY.



SOL FLAMMA,

SIVE

TRACTATVS

DE SOLE, VT FLAMMA EST,

EIVSQVE PABVLO.





# P R Æ F A T I O

## A D L E C T O R E M.

**Q**UOD singulis hebdomadis occinit Ecclesia,

Quarto die qui FLAMMEAM


Dum Solis accendis rotam:

*probare nitimur hoc opusculo ( studiose Lector. ) Ecclesie qui verbis utitur sentire male non potest, quoniam illa etiam inter canendum seria semper, numquam falsa loquitur. Solem flammam esse quidam ex sanctis Patribus putauere, crediderunt ante annos bis mille Philosophi Solem ali vaporibus; Quis prudentiam in opinione nostra requirat? quis nouitatem carpat, cui Religionis nostrae proceres, cui secula viginti pepererunt auctoritatem? Certè si difficultates extricemus, si discutiamus umbras omnes, quas Philosophi posteriores inuexerunt in hanc materiam; æ qui bonique consulent, nos Soli reddere lucem, in quo ante aliquot annos tenebras, & maculas ipsi deprehenderunt. Solem dicemus esse FLAMMAM, sed hæc flamma carebit fumo, nihil nocebit oculo, nisi quæ iam lippitudo vexat.*


## P R Æ F A T I O.

*Quod si quis primo aspectu rationes nostras non satis perueniat, fateatur hominem ex tenebris exeuntem primùm, ad videndum Solem parùm idoneum esse: at si pergit cecutire, intelligat non esse omnes oculos Soli aspiciendo pares. Iampridem editus erat ille philosophiæ fœtus, sed tamen ad hoc usque tempus luce caruit, quamuis de Sole loqueretur. Hanc accipiet ex oculis tuis (beneuole Lector.) Dum igitur fictitium Solem è calo deiicit, ut reponat verum, ex ratione, non præiudicio, de eius labore iudica. Si in animo tuo assequitur quod intendit, celum se non digito, sed mente contigisse gloriabitur.*





# MVNDI. SYSTEMA. PHYSICV.







SOL FLAMMA,  
SIVE  
TRACTATUS  
DE SOLE, VT FLAMMA EST,  
EIVSQUE PABULO.

---

QVÆSTIO PRIMA.

*An sol sit flamma.*

CAPVT PRIMVM.

*Auctores, & argumenta sententiæ  
negantis.*



RISTOTELES, & post illum  
peripatetici, negat solem esse  
flamman his argumentis.

I. Quod est incorruptibile,  
non est flamma: Sol est incorruptibilis:  
Id enim, in quo tot sæculis nulla appa-

ruit nota corruptionis , est incorruptibile. ergo sol non est flamma.

II. Flamma , vt patet experientia , non conseruatur sine pabulo , sol conseruatur sine pabulo, ergo sol non est flamma. Probatur minor : quia tanto corpori, quantus est sol , maior scilicet globo terraqueo centies , & quadragies , pabulum sufficiens assignari non potest : ergo sol conseruatur sine pabulo.

III. Flamma non est semper eadem , neque seruat motum determinatum , & æquabilem : quia perpetuò mutatur, obuiamque materiam quamlibet circumfusam perturbatè , ac sine ordine sequitur , ac depascitur. Atqui sol est semper idem , seruâtque motum determinatum , & æquabilem, ergo sol non est flamma.

IV. Flamma non est rotunda, sed oblonga ; vel certè illius figuræ , quam accipit à materia : sol est rotundus vt patet, ergo sol non est flamma.

V. Tanta flamma, quantus est sol, combureret vniuersum. Atqui sol , vt patet, non comburit vniuersum , ergo sol non est flamma.

VI. Flamma , quod est propius magis calefacit ; sol , quod est propius , non



## *Sol flamma.*

3

magis calefacit: vicinior enim est nobis hyberno tempore, quàm æstiuo: minùs tamen calefacit nos hyeme, quàm æstate: Item minus calefacit aërem viciniorem, quàm remotiorem; nempe mediam aëris regionem, quàm infimam: densantur enim vapores transeuntes ab infimâ ad mediam: quia transeunt de magis calidâ ad minus calidam, ergo sol non est flamma.

V I I. Flamma per ampullam, seu vitrum cauum, aut conuexum non comburit stupam, sol comburit, ergo sol non est flamma.

## C A P V T II.

*Auctores sententiae, quæ docet solem esse  
Ignem.*

**H**Oc innuit scriptura cap. 43. Ecclesiastici, vers. 4. his verbis. *Sol exurens montes, radios igneos exsufflans.* In quæ verba sic loquitur Cornelius à Lapide. *Ex hoc loco, & similibus, nonnulli veteres, quin & moderni insignes Mathematici censuerunt, & censent, solem esse igneæ naturæ, adeoque ipsum verè esse ignem, & fornacem cælestem. 1º. quia id videtur do-*

cere hoc loco Syracides. 2<sup>o</sup>. quia id videtur arguere ardor eius, qui tantus est, ut omnem ignis ardorem superet. 3<sup>o</sup>. quia omnis lux, quæ ex se vibrat lumen, & radios, est ignis. si enim lux ignis est flamma; pariter lux solis est flamma; & ipse, ignis. 4<sup>o</sup>. quia id videntur arguere macula, & facula, quæ per tubum opticum assidue in sole volui, & reuolui, cernuntur. & paucis interiectis. Anaximander docuit solem esse ignem purissimum; Stoici omnes docent solem esse igneum, pascique, & ali vaporibus ex aquis, & terrâ sublatis, & ad se attractis: quod etiam sequitur, ac tuetur Balbus apud Ciceronem lib. 2. de nat. deorum, & post eum Plinius l. 2. c. 9. Seneca l. 7. natur. questionum. Item nonnullis additis de sententiâ quorundam Patrum, sic ait. Solem quoque esse ignem disertè asserit Tertullianus l. de ani. c. 8. in fine. S. Basilus homil. 3. hexaemeron. S. Ambrosius lib. 2. hexaem. Casarius q. 68. S. Chrysostomus homilia 6. in Gen. Procopius in c. 1. Gen. Arnobius l. 2. & 8. contra gentes. Anastasius Sinaita l. 2. hexaem. Lactant. l. 2. c. 6. Alcuinus & Beda q. 1. in Gen. Isidorus l. 3. origin. c. 48. Hugo Victorinus in Gen. cap. 1. hinc & Ecclesia in hymno quarta feria ad vesp.



## Sol flamma.

*Quarto die qui flammeam  
Solis rotam constituens.*

*Vel, Dum solis accendis rotam.*

*Fauet Ethimon Hebr. sol enim Hebraicè vocatur Schames, quasi dicas, Scham es, id est, ibi ignis: sicut celi ex aquis conflati vocantur Schamain, id est, ibi aquæ. Denique recentiores nonnulli mathematici, qui per dioptras efficacissimas solem, solisque figuram, efficacissimè multis annis obseruauerunt, asserunt solem esse ignem. haftenus Cornelius à lapide. vide pro hâc, de solis igneâ naturâ, sententiâ, auctoritates apud Scheiner à pagina 625. ad 657. Rose vrsinæ, & Lansbergium de vero typo primi Cæli pag. 40. sub initium, vbi sic loquitur, videmus enim solem nihil aliud esse, quàm ignem. nouissimè Renatus des Cartes solem docet esse flammam. Scheiner lib. 2. cap. 4. Rose vrsinæ hæc habet. Per helioscopium in sole vidi faculas, quæ respectu circumstantium superficierum haud aliter obueniant oculo, quàm si quis ex editissimo loco in planiciem terrestrem despiciens multos, ac diuersimodos, hinc inde, intueatur lacus; multas piscinas; multas paludes: Aut mane, vel vesperi, sereno alioquin celo, sparsas hinc inde tenues nubes, præ reliquo æthere, ex imbibito solis ra-*

dio fulgidas , atque albicantes : Aut sicut seren-  
 nis noctibus via lactea sereni cali plaga inter-  
 micanti veluti chrystallo distinguitur ; ita ex  
 aliis phæbei disci campis , carbunculorum in-  
 star , effulgescent iste flammarum lucule. ha-  
 ctenus P. Scheiner. Ibidem paucis inter-  
 iectis. Si helioscopio maximæ virtutis usus  
 fueris, hæc nouissima , & hæctenus nulli cogni-  
 ta, aut euulgata, videbis. 1°. totam solaris he-  
 misphærij apparentis superficiem heteroge-  
 neam ex umbris , atque luculis conflata.  
 2°. aspectabis eundem solem , tanquam mare  
 fluctibus asperum , & fluctuantibus crispum.  
 Perpende quæso , lector, quanti debeant  
 esse fluctus, qui oculum in terris positum  
 mouere possint. Pergit Scheiner. Ne-  
 que id modo eodem , diuerso tempore , sed ho-  
 die aliter, quàm heri , & cras aliter , quàm ho-  
 die : & sic nunquam eodem schemate , eodem  
 vultûs habitu (quod mirabilissimum est) sidus  
 illud aureum aspicias. hæc ibi. libro item  
 tertio in notis ad imaginem solis 70. §.  
 de luculis sic habet. Imaginare lacum ali-  
 quem, vel mare tranquillum, molli aurâ cris-  
 pum, solis fulgore illustratum : Ista crispitu-  
 do offert visui alternas umbras , & luces , è  
 vel vario, vel nullo, radiorum solarium ad ocu-  
 lum reflexu. Qualis igitur tum superficies



## *Sol flamma.*

7

*aquoris ; talis ex hac apparitione occurrit solis. Idem l. 4. parte 2. cap. II. §. Septima veritas , sic loquitur. Superficies solis appa-rens, non geometricè æquabilis, nec opticè ter-sa, aut polita , sed astronomicè spherica est, instar maris fluctuantis : Terræ , & lunæ montibus, vallibusque amfractuosa.*

Quàm ista omnia flammæ conueniant; nemo non videt.

## C A P V T III.

*Solem esse corruptibilem.*

**H**O c docet scriptura dum ait cælos esse corruptibiles , Psal. 101. *Initio tu Domine terram fundasti, & opera manuum tuarum sunt cæli. Ipsi peribunt, & omnes sicut vestimentum veterascent, & sicut operatorum mutabis eos , & mutabuntur. Quæ similitudines ostendunt prophetam agere de corporibus illis, quæ vniuersum, tanquam vestimentum operiunt, quales sunt cæli; in quibus sunt astra, & planetæ. Idem docet D. Petrus epistola 2. c. 3. his verbis. Cæli autem, qui nunc sunt (nempe astra & planetæ) & terra, eodem verbo repositi sunt, igni reseruati in diem iudicij. Et, ne quis putet, ipsum per cælos intelligere*

aërem, sic subdit. *Adueniet autem dies Domini ut fur, in quo celi magno impetu transient, elementa verò calore soluentur; Terra autem, & quæ in ipsa sunt, opera exurentur.* Idem docent Patres omnes, qui cælos ex aqua factos existimant. Vide, quæ docet, & auctores, quos citat P. Christophorus Scheiner l. 4. de *Rosa vrsina*, parte 2. c. 24. Hoc etiam probat istud argumentum. Corpus, in quo sunt aliquando maculæ, aliquando non sunt; aliquando plures, aliquando pauciores; aliquando maiores, aliquando minores; aliquando planæ, aliquando sphæricæ: corpus item, cuius partes aliquæ sunt aliquando lucidiores, aliquando minus lucidæ, est corruptibile. Atqui sol est corpus; in quo sunt eiusmodi maculæ, & faculæ, ut patet ex telescopio, & parallaxi, quæ docent hæc omnia non distare à sole: ergo sol est corruptibilis. vide *Rosam vrsinam*. Ex hac responsione facile est colligere nullum esse argumentum, quo nonnulli dicunt siderum motus esse ab intelligentiâ creatâ: quia seruant eundem semper tenorem: Contrarium enim ex illis motoribus colligitur. nam, cùm intelligentiæ creatæ agentes per intellectum sint



defectibiles, neque ad illos motus à naturâ determinatæ; concludendum esset siderum motus non esse certos. Si autem motus illi sunt à naturâ, non possunt non esse regulares, ac certi, cum ipsa natura sit ad vnum determinata, & secundum auctorem suum, nempe Deum, constantissima. Motus ergo circularis, & proprius, qui conuenit soli, quærendum est in Mundo corporeo principium effectiuum, proximum, naturale, necessarium, ac determinatum: id est semper faciens quicquid potest: aliud autem non est, quam propria natura solis, ut partis mundi, loco tali constitutæ.

## CAPVT IV.

*Quid sit flamma.*

**A**NTEQUAM probemus solem esse flammam, explicanda est flammæ natura, per hanc definitionem. *Flamma est ignis fluens, ac lucens, propter inuolucrum pingue, quod sibi facit erumpens ex pabulo.* Explico. flamma est ignis, nempe corpus rarum, leue, & calidum, propter spiritus ardentes, siue igneos paullo maiores, in

toto illo, quod appellatur *ignis* dominantes: Quâ de re in phÿsicis aphorismis.

*Fluxus* hoc est varians partes propter lationem totius, ac resistantiam contigui; siue actiuam, qua mobilis pars remouetur; siue passiuam, quâ sistitur. Inde oritur *volutatio* partium, composita ex latione recta, & circulari, *condensatio* per vnionem densarum partium, *rarefactio* per vnionem rararum. (Quid autem sit densum; quid rarum, dictum est in aphorismis phÿsicis prima parte c. 2.) His omnibus interna *figuratio*, seu *variatio* consequens est.

Ignem ita fluentem per inuolucrum comitatur aër, quem erumpens ex pabulo hinc inde, collegit ipse ignis, secum permiscuit, & in inuolucrum suum inclusit. Vnde ventus, siue aëreum fluidum, multam flammam circumstans.

Hunc ignis fluxum per inuolucrum in flammâ explicat fluxus aquæ in riuo, fluuio, & mari, per alueum. Nam quemadmodum principium aquarû fluentium in riuo, fluuiis, & mari, sunt varij fontes, & corpora polis vicina, quorum poris, & particulis, aquarum guttulæ, siue aquei spiritus continentur, & per coniunctionē cum



abundantioribus , ac visibilibus aquis , earúmque motum , separantur ab intermediis , & fiunt sensibiles aquæ , deorsum fluentes ; ita principium ignium fluentium per inuolucrum in flammis , & sole ; sunt varij fontes ignei , nempe corpora pingua per mixtionem terræ , & ignis ; quorum poris & particulis ignei spiritus continentur , & per coniunctionem cum igne abundantiori & eius motum separantur ab interiectis , eoque celerius , quò maiores , & magis ignei sunt pori , frequentioresque particularum facilè separabilium vniones , fit flamma , siue ignis sensibilis , ac visibilis , & sursum per inuolucrum fluens.

Et quemadmodum , si non sit , quo fluat riuus , spiritus aquei , fonte , seu scaturigine , contenti desinunt moueri , & vniri simul ; manéntque suis in poris , & particulis diuisi , ac separati ; nempe , quia non educuntur , nec foràs trahuntur ex fonte per aquas continuas trahentes , seu post se vehentes , ac deorsum fluentes ; vt patet in aquis putealibus ; Ita , si non sit , quò fluat ignis in flammâ , spiritus ignei fonte , seu pabulo contenti , desinunt moueri , manéntque suis in poris , ac particulis , per

intermedios diuisi, ac separati: Nempe, quia non educuntur, nec foras trahuntur, ex pabulo per ignem continuum trahentem, seu post se vehentem, & sursum fluentem, vt patet in flammis suffocatis, aëre, & quem in suum claudant inuolucrum, & per quem celeriter, tanquam per medium, moueantur, destitutis.

Et quemadmodum riuus in aëre non potest consistere; ita neque flamma.

Et quemadmodum aqua per canalem fluens, videtur pro dispositione canalıs sursum retorti, moueri sursum, licet reuera per grauitatem deorsum fluat, quatenus superficiei partem habet liberam, id est, aëre contiguo, infra quem mouetur, superiorem; Ita ignis in flamma per suum inuolucrum, tanquam per canalem fluens videtur pro dispositione canalıs à corporibus circumstantibus deorsum reflexi, deorsum fluere, licet reuerâ per leuitatem propriam sursum fluat, quatenus ipsa flamma superficiei, siue inuolucrı, partem habet liberam, id est aëre contiguo, supra quem mouetur, depressiorem.

Est autem hæc differentia inter fluxum riuı siue aquæ, per alueum; & flammæ, siue ignis, per inuolucrum; quòd fluxus

flammæ sit multò vehementior , ac celerior, quàm riui. Ignis enim, quia multo mobilior est aquâ , multo vehementiùs, ac celeriùs , erumpit ex pabulo , quàm aqua ex fonte.

Ex ista mobilitate ignis sequitur alius ipsius fluxus : nempe , quo diuisus in spiritus igneos subtilissimos transpirat , & erumpit per inuolucris sui poros in aërem vicinum. Et ab hoc fluxu flamma dicitur *lucens*. Hi enim spiritus ex flammâ per inuolucris poros erumpentes , sunt *lucidi*, hoc est apti ad mouendum animalis visum. Ab his spiritibus Perspicuum flammæ contiguum illuminatur. Illuminari enim Perspicuum aliud nihil est , quàm spiritus lucidos, vt lucidi sunt, per ipsum fluere.

Hic fluxus spirituum lucidorum in Perspicuo est in omnem partem , per aduentum, & coniunctionem Aduentitiorum ( hoc est, de nouo erumpentium ex flammâ ) cum Infitis, hoc est, iis spiritibus lucidis , quibus facilè per se mobilibus, refertum est corpus , quod appellamus Perspicuum.

Hic fluxus , qui dicitur *Illuminatio*, comparari potest cum fluxu aquæ in om-



nem partem ex rotundo vase defluentis, propter aduentum, & coniunctionem guttarum aquæ pluuiæ decidentis. Erumpentes ex flamma lucidi spiritus comparantur guttis aquæ pluuiæ decidentis; vas continens aquam ad fluxum paratissimam, Perspicuo; & nubes, flammæ.

Per hanc spirituum lucidorum ex flamma per inuolucris poros eruptionem, ignis in flamma dicitur *lucens*, vt iam dictum est, ipsa enim eruptio dicitur *lux*: à quâ ipsa flamma dicitur *corpus lucidum*, & spiritus ipse *lucidus*. qua de re fusiùs in tractatu de lumine, & visione.

Pingue est flammæ inuolucrum, quia pabulum, ex quo illud sibi componit ignis erumpens, est humidum pingue. Rem explicat bulla, quæ flammæ comparatur, quatenus est aër aqueo clausus inuolucro, quod sibi ipse facit emergens ex aqua. Flamma autem pyramidalis est, quia sursum mobilior est ignis, quàm aër.

## C A P V T V.

*Solem esse flammam.*

**S**I c probatur. Quod paret flamma, & habet omnes, & solos effectus flam-

mæ, est flamma: atqui Sol paret flamma  
( vt patet respicienti per telescopium;  
quo, vt docet Scheiner lib. 2. *rose vrsi-*  
*na* cap. 4. deprehenduntur in Sole multa  
flammæ signa ) habétque omnes, & so-  
los effectus flammæ; qui sunt *illuminare,*  
*calefacere,* & *inflammare*; hæc enim tria,  
& non plura, conueniunt Soli per se sum-  
pto. nam generationes animalium, plan-  
tarum, & metallorum; & alia, quæ ipsi  
tribuuntur; non sunt à Sole per se sum-  
pto, seu peculiari, & proximo agente: sed  
ab eo, vt actionem particularem, vel astri,  
vel horum inferiorum, complente per  
lumen, & calorem; vnde flamma ingens,  
& pura, si qua esset apud nos debitè ap-  
plicata; posset supplere actionem Solis.  
& verò in quibusdam nonnulli ignes, seu  
flammæ, seu carbones, supplent aliquan-  
do. ergo Sol est flamma. Tanta est huius  
argumenti vis, vt nullum sit aliud ad pro-  
bandum aliquid esse id, quod est, poten-  
tius; si diuinam auctoritatem excipias.  
Hoc argumentum confirmatur ex eò,  
quòd nullum videamus lucidum vehe-  
mens, præter flammam: eoque vehe-  
mentius, quò flamma est purior, & maior:  
sique alicubi esset tanta flamma, quantus  
est Sol; non minorem ei, quàm Soli, tri-

bueremus illuminationem. Hinc sumitur assertionis confirmatio. Corpus, cui per se conuenit, quod omni, & soli flammæ conuenit, est flamma. Sol est corpus, cui per se conuenit, quod omni, & soli flammæ conuenit. ergo Sol est flamma. Probatur min. Lucere vehementer est id, quod omni, & soli flammæ conuenit. Sol est corpus, cui per se conuenit lucere vehementer; ergo Sol est corpus, cui per se conuenit, quod omni, & soli flammæ conuenit.

## CAPVT VI.

*Satisfit argumentis initio propositis.*

## SECTIO I.

*Nonnulla premittuntur.*

**A**NTEQVAM aggrediamur ad solutionem argumentorum, quæ contra hanc sententiam facta sunt 1. cap.

Notandum est 1. ex communi Astronomorum post inuentionem, & vsum Telescopij, doctrinâ; inter Globum Terraqueum, tanquam Centrum Mundi, & Orbem illum, quem vocamus Firmamentum, vt Mundi extremû, spatium esse liqui-



quidū, per quod moueantur Planetæ, Fascia Solis, & Stelle firmamento proximæ.

Hæc Solis Fascia, siue Zona, est corpus solidum, cuius adumbratam aliquo modo speciem habemus in sale Gothalanico, qui solidus est, perspicuus, & incombustibilis. Talem facimus Solis Fasciam: Nempe corpus consistens, perspicuum, & incombustibile: Præterea magnis, & crebris distinctum poris: rotundum, spissum quatuor, aut quinque, terræ diametris: Cuius, quatenus habet rationem Peripheriæ circuli, siue Eclipticæ, Solis; Diameter sit 2283 Terræ Semidiametrorum: cuius Diametri alterum extremum distet à Centro Mundi 1101 terræ semidiametris: alterum 1183. Fascia illa subiecta sit per omnia Eclipticæ in firmamento peripheriæ: & ipsi magnetice alligata. Sit Soli tanquam Ellychnium incombustibile, quale componitur ex Lino Asbestino, quò ex toto mundo confluat, seu vehatur, Solis pabulum: sicut ex toto corpore microcosmi confluit sanguis ad fundum sinistri sinus, vt pabulum flammulæ cordis.

Not. 2. ex cap. 4. Ignem in corporibus mixtis esse diuisum, ac sparsum, in particulas, quæ poris contentæ vocantur spi-

ritus ignei.

Per inflānationem hi spiritus educuntur ex Mixto, quod vocatur pabulum, & vniuntur sub inuolucro pingui, & aëreo, quod fit ex eô, quod in pabulo est magis viscosum, & subtile. Et sic pabulum, seu corpus mixtum inflammabile, destruitur per inflammationem: ac soluitur in partes, ex quibus componebatur, & subsistebat sub tali specie, tum subtiliores; nempe igneas, & aëreas: tum crassiores; aqueas scilicet, ac terreas.

Ex subtilioribus fit flamma: ex crassioribus fuligo, cineres, &c. Quod subtilius, ac tenuius est in aqueis, & terreis, partim impinguat aëreas, vnde fit inuolucrum; de quo cap. illo 4. partim vehitur sursum cum igneis.

Ad pabulum ergo flammæ, seu corpus inflammabile, requiruntur, & sufficiunt, ignei spiritus, & aërei pingues, ex quibus fiat inuolucrum.

Ad pabulum ergo Solis in ipsius Fasciâ, siue Ellychnio, contentum, requiruntur, & sufficiunt ista duo: Alterum, vnde resultet vnio spirituum igneorum: Alterum, vnde fiat inuolucrum: nempe spiritus ignei; qui vniantur: & aërei pingues, vnde fiat inuolucrum.

Hi spiritus non sunt absque terreis, & aqueis subtilioribus, qui oriuntur ex globo Terraqueo, Lunâ, Planetis, Stellis, ac Firmamento; pèrque totum mundum sparguntur.

Fascia Solis Matrix est aptissima, in quâ spiritus illi sic misceantur, diuidantur, proportionentur, vniantur, per actionem mutuam, Sole concurrente, vt fiant corpus mixtum aptissimum ad flammam, & proximum Solis pabulum, spiritu vini magis solidum, puluere tormentario minus terreum: vtroque magis igneum: & fumigantis lini fumo pingui simillimum: Quod à Sole depascente perpetuo destruat, & soluat in flammam, & maculas: Quod per continuum, & nunquam interruptum accessum ex toto mundo spirituum, in Solis fasciæ partibus ab ipso alias depascente successiuè derelictis, & remotis, tanquam in Matrice, anno decurrente, generetur.

## SECTIO II.

### *Soluantur Argumenta.*

**A**D primum respondetur negando  
Min. ad probationem in eâ contentâ



patet responsio ex cap. 3. vbi ostenditur in Sole apparere notas corruptionis. Et verò, licet in eo nulla deprehenderetur mutatio, non tamen inde concluderetur esse incorruptibilis; cum aliunde habeamus argumētum corruptibilitatis, nempe maculas, & faculas. Et certè, si tantum distaremus à terrâ, quantum distamus à Sole; nullam in eâ deprehenderemus mutationem: Inde autem malè colligeremus incorruptibilitatē; cum reuerâ sit corruptibilis. At quemadmodū Terra sit licet corruptibilis, non tamen simpliciter corrumpitur, sed simpliciter manet: quia quātum de illâ perit, tantundem reparatur; ita Sol, etiam corruptibilis, non tamen ita corrumpitur, quin simpliciter maneat: quia, quantum perdit, tantum acquirit. Ita maximi fluuij sunt perennes: quia licet aqua perpetuò fluat, aqua de nouo semper aduenit. Idem dicendum est de mari, vt dicetur q. seq. & docet Arist. lib. 2. meteor. sum. 1. cap. 3. sub medium, ibi enim docet ignem, aërem & aquam, eadem permanere, non numero, sed specie; idem de terra docet eodem c. paulo ante finem.

Ad secundum respondetur, negando Minor. Ad probationem illius negatur Ant. vt patet ex antecedente Sectione, &

patebit ex tota Quæstione seq:

Ad tertium respōdetur, negando Maior. si enim est æquabilis materia, & æquabilis dispositio, vt reuera est in pabulo Solis; flamma est æquabilis, vt patet in flammâ cerei, vel candelæ bene dispositæ. Mutatur quidem semper: at mutatio ista nō est minus æquabilis, quàm motus aquæ perpetuò nouæ sub ponte in eadem quantitate, & per idem spatium fluentis: quod non est minus mirabile, quàm quod dicimus de Sole.

Ad quartum respondetur, negando Min. Sol enim est oblongus, videtur tamen à nobis in terrâ degentibus rotundus: quia videtur solùm basis illius pyramidis, quam facit Sol. Illa autem basis, quâ parte nos respicit, est rotunda, seu sphærica, seu conuexa. Præterea omnia corpora multum distantia videntur sphærica, seu rotunda, quia radij angulorum non perueniunt ad nostros oculos.

Ad quintum respondetur Solem in mūdo sic esse collocatum, vt vniuerso nocere non possit: Aërem inflammare non potest, quia non est pinguis: neque globum terraqueum, quia nimia est distantia: præterquam quòd calor, siue actio Solis est multo minor versùs terram, quàm versùs Fir-

mamentum, quò fertur : & hoc patet in nostris flammulis. Firmamento nocere non potest, neque astris aut planetis, quia non sunt corpora inflammabilia.

Ad sextum respondetur distinguendo Maior. cæteris paribus, conced. Maior. non paribus ; negatur Maior. Ad probationem in eâ contentam respondetur non in omnibus terræ locis maius esse frigus, quando Sol est propior terræ ; sed tantum in iis, quibus radij sunt magis obliqui : In aliis autem, quibus sunt recti, maior est calor, cæteris paribus, quàm in iis etiam, quibus radij sunt quidem recti, at Sol est remotior. Ad id, quod dicitur de mediâ regione aëris, Respōdeo duas esse maioris in eâ, quàm in infimâ, frigoris causas : Alteram, vaporum in eâ refrigeratorum, vel propter evanescētes in aërem superiorem spiritus igneos ; vel propter occursum, & actionem corporis frigidi, per illam regionem descendentis : Alteram, minorem quantitatem spirituum igneorum, quàm in eâ, quæ terræ vicina est ; vbi maior est radiorum, atque adeo caloris, propter reflexionem, copia : plures item ignei spiritus è terræ visceribus erumpentes.

Ad septimum respondetur distinguēdo Maior. flāma parua; conceditur Mai. flam-



ma ingens, qualis est Sol, negatur Maior. unde negatur Consequentia: & certè si vehemēs est flamma; comburit per refractionem, & reflexionem, vt patet in fornacibus, vbi liquatur ferrum. Flamma vicina follibus non minùs, quàm Sol per reflexionem stuppam accendit.

---

## QVÆSTIO SECVNDA.

*An Sol nutriatur vaporibus?*

### CAPVT I.

*Nonnulla pramittuntur.*



AM dictum est sub finem præcedentis q. ex toto mundo confluere materiam, ex quâ fiat in Solis Ellychnio corpus mixtum ad flammam aptissimum. Nam quemadmodum Sol microcosmi ex toto corpore recipit spiritus alimentares, & in totum corpus dispergit vitales sic, vt nulla sit vel minima pars corporis, vbi non sit spiritus vitalis; ita cor mundi ex toto mundo recipit spiritus alimētares, & in totum mundum dispergit Solares sic, vt nulla sit pars, vel minima totius mundi, in quâ non sit spiritus Solaris.

Itaque dum quærimus, vtrum Sol nu-

triat<sup>r</sup> vaporibus? Quæstio solùm est de parte pabuli, quæ alij coniungatur in Solis fascia, vt sanguis microcosmi factus ex chylo iungitur in venâ cauâ sanguini ex toto corpore ad cor redeunti. Quod enim microcosmo chylus est; hoc megalocosmo sunt exhalationes, & vapores ex globo terraqueo; cum hoc discrimine, quòd chylus fiat ex cibo & potu extrinsecis: non autem vapores, & exhalationes.

Per *nutriri* non intelligo nutritionem, quæ viuentibus conuenit, per quam res vna numero crescit, vel certè conseruatur: sed continuationem, & successionem partium eiusdem rationis, per quam partes de nouo fiant, succedantque in locum abeuntium: quod est conseruari secundum speciem, per fluxum continuum, non autem secundum numerum, per nutritionem: hæc enim solis viuentibus conuenit: Sol autem non est corpus per se viuens, cum partes non habeat organicas. Itaque dum quæritur an Sol nutriatur vaporibus? quæritur an Sol conseruetur in loco, vbi est fluenter, ac successiuè, vaporibus, qui mutantur in flammam ad continuandum Solem? Quod dictum est de nutritione dicendum est de pabulo. pabulum enim hîc sumitur pro

materiâ, ex quâ fiunt siue educuntur successiue partes flammæ solaris, in locum abeuntium succedentes. sic aër, ex quo successiue aquæ generantur in fonte, appellari potest aquæ pabulum.

## CAPVT I.

*Proponuntur variae sententiae.*

**P**LERIQUE nunc fatentur solem esse ignem : & certè P. Christophorus Scheiner *in sua Rosa ursina*, tam multis auctoritatibus, tamque firmis argumentis id confirmat, vt rem persuadeat. verùm pauci admodum loquuntur de illius pabulo, seu materiâ, qua conseruatur.

1°. Sunt, qui dicant solem non magis indigere pabulo, quàm ignem elementarem; atque adeo non esse quærendum illius pabulum. Refellitur ista sententia. quia sol non potest esse purus ignis, quum sit tantæ lucis; est ergo mixtum igneum, quale descripsimus capite 4. quæstionis præcedentis.

2°. Alij dicunt solem esse ignem solidum ac densum, in cuius cavitatibus sit materia sufficiens ad illius pabulum : quo



modo subterraneis ignibus materia quædam pinguis, ac subterranea sufficit. Neque hæc sententia videtur vera; tùm quia totus sol non esset ignis, ne quidem maxima illius pars: tùm quia corpori solido tanta lux, quanta est solis, conuenire non potest. Ignium autem subterraneorum longè diuersa est ratio. Ipsi enim quid sunt ad vniuersam terram? subministratur illis materia ex variâ elementorum commutatione, seu circulatione, per quam nonnulla mixta minus perfecta fiunt ex igne, aëre, aquâ, & terrâ, quæ sunt pingua, & humida, & consequenter ignis materia.

3<sup>o</sup>. Alij docent solem esse corpus solidum, ac densum, circa centrum, & partes à conuexo remotas: fluidum verò, & rarum, atque adeo flammeum, circa conuexum: non tamen caudatum, neque turbinatum: quia quam habent inclinationem ad centrum eius solidæ partes; eandem habet ad idem centrum illa flamma: proindèque sphæram facit perfectam, vt aqua respectu terræ, & centri mundi.

Pabulum illius flammæ dicunt esse materiam, quam sol egerat ad extrema: quæ

materia eandem habens cum cæteris inclinationem ad centrum solis, iterum ad illud redit. Fitque iterum materia flammæ; quomodo vapores, & exhalationes egeruntur è globo terraqueo, postea verò redeunt, fiuntque iterum aqua, & terra: atque adeo noua vaporum, atque exhalationum materia; neque illud magis mirabile est, quàm perpetua ex *Ætæneo* monte flamma.

Neque hæc sententia vera est. 1°. quia telescopium distingueret in sole flammæ, à solido corpore; cùm distinguat maculas, & faculas: eas autem non distingui certum est. 2°. quia, quod fuit materia flammæ, & in flammam conuersum, non nisi post multas commutationes redit in materiam flammæ. Fortasse dicent esse circa solem spatium aliquod, vnde quaque corpore solido circumdatum, in quo fiant naturaliter, & successiue, propter loci dispositionem, illæ dumtaxat mutationes, quæ ad flammæ pabulum, seu materiam requiruntur, quale dicitur esse in lucernis perpetuis. At tale spatium respectu solis deberet esse ingens, & in se claudere globum terraqueum: Cùm respectu flammulæ, quæ

fit in lucernâ perpetuâ , tantum ferè fit, quantum est Firmamenti concavum respectu solis : Quale spatium ipsi neque probant , neque concedunt si dicant è centro solis materiam pinguem flammæ capacem eructari , & eodem recidere fæces ex humido pingui à flammâ depasto residuas , easque circa centrum iterum impinguari, fierique materiam flammæ ; Quæram , an totus sol sit ignis ? an non ? si totus est ignis , non minùs depascet humidum pingue circa centrum , quàm circa extrema , & consequenter aridæ fæces ex flamma residuæ potiùs ibi comburentur , quàm humorem colligant , fiântque iterum materia flammæ. Si totus sol non est ignis , & altera pars non sit combustibilis ; non faciet pinguedinem : Si verò sit combustibilis , comburetur. Ex his patet hanc sententiam non esse admittendam. Quod dicitur de Æthna monte , & vaporibus , valde diuersum est ab hâc sententiâ : nam ad flammâs æthneas noua perpetuò colligitur aliunde materia , scilicet mixta quædam sulphurea ex aëre , aquâ mediterranei maris , & terra. Vapores autem seorsum igneo calore sublati , in aëris mediâ regione refrigerantur , & in aquam



redeunt, ac terram.

Hoc etiam habet incommodum hæc sententia, quòd solem faciat corruptibilem, nihilo tamen minus independentem ab aliis totius mundi partibus: atque adeo tollit mutuam inter mundi partes dependentiã, per quam mundus est quid vnum.

4°. Hippocrates lib. de floribus sect. 3. sic loquitur: *Igni spiritus nutrimentum præbet, eoque priuatus ignis viuere non potest: atque adeo perennem solis cursum aër perennis, & tenuis esse facit.* Hic aër aliud esse non potest quàm vapor & exhalatio.

5°. Stoici omnes, vt videre est apud Cornelium à lapide in v. 4. c. 43. Eccle. Docent solem esse ignem, qui pascatur, & alatur vaporibus è globo terraqueo sublatis, & ad se attractis. Quos etiam sequitur, ac tuctur Balbus apud Ciceronem lib. 2. de nat. deor. & post eum Plinius l. 2. c. 9. Seneca l. 2. natural. quæst. sic loquitur. *Hinc (è terra) profertur, quo sustineantur tot sidera, tam exercitata, tam auida per diem, noctemque, vt in opere, ita & in pastu: Et omnium quidem rerum natura; quantum in nutrimentum sibi satis est apprehendit, & l. 6. c. 16. apud Scheiner l. 4. Rose vrsinæ, parte 2. c. 28. totum hoc celum, quod igneus ather,*

*mundi summa pars, claudit; omnes hæc stellæ,  
 quarum iniri non potest numerus: Omnis hic  
 celestium cætus; & ut alia præteream, hic  
 tam propè à nobis agens cursum sol, omni ter-  
 rarum ambitu non semel maior, alimentum  
 ex terreno trahunt, & inter se partiuntur: nec  
 ullo alio scilicet quàm halitu terrarum susti-  
 nentur: hoc illis alimentum hic pastus est. hæc  
 ille ex sententia, quæ si non est vera certè  
 magnam habebit veritatis speciem, ut  
 patebit ex sequentibus.*

## C A P V T II.

### *De Vapore.*

**P**ER vaporem intelligo mixtum ho-  
 mogeneum pingue, fluidum, ac leue;  
 ex spiritibus igneis, aëreis, & terreis, aquâ  
 per spiritus igneos rarefactâ, & calore ex-  
 tenuatâ, velut vehiculo contentis: Per  
 mixtum intelligo, non mixtum perfe-  
 ctum, cui conueniat forma substantialis  
 faciens vnâ actu substantiam, seu spe-  
 ciem; sed mixtum imperfectum per lo-  
 cale elementarium spirituum, seu cor-  
 pusculorum vnionem. Dixi homoge-  
 neum, quia licèt vapor ex quatuor ele-  
 mentis, satque adeo partibus heteroge-

neis constet ; nulla tamen distingui potest eius particula, quæ non sit vapor, & consequenter composita ex quatuor illis spiritibus; quemadmodum quælibet pars carnis caro est. Pinguedinem habet vapor ab igne maximè, & terrâ ; Fluorem ab aqua & aëre ; leuitatem ab aëre & igne : si terra, & aqua in vapore dominantur, niger est. si terra, & ignis, rubeus. si aër, albus est. si ignis, perspicuus. Qui vaporem ab exhalatione distinguunt, sumunt vaporem pro mixto ; in quo plures sunt aquei spiritus, quàm terrei. exhalationem verò pro mixto, in quo plures sunt spiritus terrei, quàm aquei.

Vapor enim est aqua, leuitate ignis contenti fursùm lata : exhalatio verò est aqua leuitate ignis contenti fursùm lata. Vapor, & fumus, idem quidem sunt, nihilominus tamē distinguuntur per materiam. vapor enim est ab aqueo, fumus autem à terreo, siue, quod idem est, vapor fit ex fluidis, & humidis : fumus ex consistentibus, & siccis. At sæpe cōfunduntur : sæpe item vapore exhalatio continetur.

Spatium quod occupat vapor, seu fumus, ad rationem fluidi & consistentis corporis vnde fit, tantum est, vt nisi ocu-



lus videret , vix animus crederet. Proportio enim vaporis ad fluidum corpus & consistens , videtur esse plusquam centum millium ad vnum. Colligi potest ex fumo , qui oritur ex ligno viridi. Si enim solum fumum , qui fit ex pedali quantitate ligni viridis , vnum in locum Deus colligeret ; is esset plusquam centies milies pede maior. Colligi etiam potest ex vaporum copiâ , quæ æstiuis mensibus , sereno cælo , mane , ante solis ortum , supra , & circa fluuios apparet. Ea enim multis partibus est maior ipsis fluuiis ; neque tamen videtur vlla fluuiorum diminutio. excessus itaque loci vaporum supra locum fluidi , vel consistentis corporis , ex quo fiunt , æstimari vix potest.

## CAPVT III.

*Vaporum magnam esse copiam sub Zona torrida.*

**E**X terraquei globi Zonâ torridâ , maximam vaporum emergere copiam probatur primò.

## SECTIO PRIMA.

*Primum argumentum ex ipsa loci  
constitutione.*

**L**OCUS vbi est plurima & materia vaporabilis, & virtus vaporans, seu conuertens in vaporem, est locus, vnde maxima vaporum emergit copia. Atqui Zona torrida globi terraquei est locus, vbi est plurima & materia vaporabilis, & virtus vaporans, seu conuertens in vaporem. ergo Zona torrida globi terraquei est locus vnde maxima vaporum emergit copia. Maior est euidens. Hic enim quaestio est de agente, & patiente naturali, quod semper agit, & patitur, quantum potest. probatur minor de materia vaporabili.

Locus vbi est aqua plurima terræ spiritibus & exhalationibus permista; & terra plurima, quæ vel torretur ardore solis, vel aquæ permiscetur, est locus in quo est materia plurima vaporabilis: atqui Zona terraquei globi torrida est locus, vbi est aqua plurima terræ spiritibus & exhalationibus permista, qualis est salsa: & terra plurima quæ vel ardore solis torretur,

vel aquæ permiscetur. ergo Zona torrida globi terraquei est locus, vbi est plurima materia vaporabilis. Probatur eadem minor de virtute vaporante. Locus, in quem directis radiis (hoc est per lineam perpendicularem, siue à centro agentis ad centrum patientis ductam) agit perpetuò sol, & alij planetæ, parsque illa Firmamenti, quæ dicitur Zona torrida, respondetque Zonæ torridæ globi terraquei, est locus, vbi est plurima virtus vaporans, seu conuertens in vapores aquam, & terram. Hæc enim sunt cæli agentia potentissima, vt patet. Atqui Zona torrida globi terraquei est locus, in quem directis radiis agit perpetuò sol, & alij planetæ, & Zona torrida Firmamenti: ergo Zona torrida globi terraquei est locus, vbi est plurima virtus vaporans, seu conuertens in vapores. Intellego autem per Zonam torridam globi terraquei loca etiam Zonæ illi vicina.

## SECTIO SECVNDA.

*Secundum argumentum ex motu aquarum  
in occasum.*

**N**O T A N D V M primò aquas maris moueri ad centrum, circa centrum,



& à centro mundi. motus ad centrum est  
ipsis naturalis à propria grauitate: motus  
circa centrum conuenit illis per aliud,  
per terram scilicet subiectam ita dispo-  
sitam. hoc motu aqua mouetur ad cen-  
trum per lineam longiorem, quia breuior  
impeditur: ac proinde motus ille est in-  
flexus, siue mixtus ex motu ad centrum  
per se: & motu circa centrum per aliud  
(scilicet per impediens lineam breuissi-  
mam) hoc est ex recto, & circulari: at-  
que adeò, neque est rectus simpliciter,  
siue simplex; quia non fit per vnā li-  
neam rectam, & breuissimam, ad cen-  
trum: neque circularis simpliciter, siue  
simplex, quia non fit per lineam compo-  
sitam ex terminis linearum à centro du-  
ctarum, quæ sint æquales; sed quæ sint  
successiuè breuiiores. Motus à centro est  
aquæ violentus, id est, ab extrinseco mo-  
to vel pellente, vel trahente, vel vehen-  
te, non concurrente aquâ per aliquid in-  
trinsecum. hîc agimus de secundo motu,  
nempe de motu aquæ marinæ circa cen-  
trum, seu motu mixto, siue inflexo.

Notandum secundò quod nautis ex-  
perientiâ compertum est, maria omnia  
extra Zonam, quæ libera sunt (hoc est

non impedita , vel à ventis , vel à terris ,  
 vel ab aliis aquis alio motu agitatís ) con-  
 tinuò , & absque vllâ interruptione mo-  
 ueri ad Zonam torridam ; sex quidem  
 mensibus , sole existente sub signis au-  
 stralibus , à septentrione ad meridiem :  
 altero semestri , sole existente sub signis  
 Borealibus , à meridie ad septentrionem ,  
 vt docet Kircherus : & ipsa maria sub  
 Zona torrida ( si modo explicato libera  
 sint ) moueri ad occidentem : Fluuio-  
 autem omnes ad maria : Cui consequens  
 est omnes continuas aquas marium , sal-  
 tem conuexo vicinas , & fluuiorum , per-  
 petuò , & absque vllâ interruptione mo-  
 ueri motu naturali , seu propriâ grauitate ,  
 ad occidentem : Cui consequens est nun-  
 quam easdem numero aquas in eodem  
 terræ loco permanere : hoc in fluuiis ,  
 quorum aquæ sub eodem ponte semper  
 nouæ sunt , manifestum est.

Notandum tertio non moueri aquam  
 motu naturali , seu per grauitatem , nisi  
 quando est aëri centro mundi se propio-  
 ri contigua : moueri autem semper illo  
 motu ( si libera sit ) quando id contingit ,  
 hoc est , quando est aëri , qui centro mun-  
 di sit ipsâ propior contigua. hinc oritur

vt in aquâ vnâ continua partes omnes superficiei aëre contiguæ, ac liberæ, vel æqualiter distent à centro, vel perpetuò moueantur, dum fiant æqualiter distantes, & inferiores aëre contiguo: quod fit per motum superiorum ad inferiores, sumendo locum aëris, qui erat contiguus partibus illis superioribus, & centro mundi propior. Quóque maior est aquarum copia remotior à terra, quàm aër contiguus, eò celerior, cæteris paribus, est ipsius motus. Vnde superiores aquæ mouentur inflexo motu celerius, quàm inferiores. Et quia superiores non mouentur, quin secum trahant quantum possunt, propter vnionem naturalem, inferiores; aquæ profundiores, cæteris paribus, mouentur illo motu lentiùs, quàm minùs profundæ.

Porro tanta est Eoï maris in Indicum celeritas motûs sub æquatore; vt, quemadmodum docet Morinus lib. de terræ motu, vel quiete, cap. 11. p. 109. sit quâuis sagitta maior. Quòd verò aquæ trahant aquas, patet ex tubo inflexo aquâ pleno, cuius mediæ partes emineant aquis in vase aliquo detentis: & os vnum tubi apertum in aquâ, alterum, & quidem in-



ferius, apertum item, & extra vas, in aëre sit positum. Aqua enim per os in aëre centro mundi superficie liberâ aquæ propiore descendens, sic trahit aquæ sibi continuæ partes in vase positas, vt eas sursum tollat. his prænotatis sic argumentor.

Locus, vbi simul, & absque vllâ interruptione, leucarū decem milliones aquæ marinæ mutantur in vapores est locus, vnde plurima vaporū emergit copia. Sed Zona torrida est huiusmodi locus, ergo Zona torrida est locus, vnde plurima vaporum emergit copia. Maior est euident. probatur Minor. Locus, vbi decem leucarum milliones aquæ marinæ simul, & continuò per calefactionem, siue actionem agentis per calorem, ita mutantur, vt desinant esse aquæ marinæ, est locus, vbi simul, & perpetuò leucarum decem milliones aquæ marinæ mutantur in vapores. ( Neque enim est aliud, in quod illæ aquæ mutantur) Atqui Zona torrida est locus, vbi decem leucarum milliones aquæ marinæ simul & continuò, per actionem agentis per calorem ita mutantur, vt desinant esse aquæ marinæ. Nam locus, vbi desinunt moueri ad mundi centrum aquæ marinæ, est locus vbi desinunt

esse marinæ. Quod enim semper mouetur, quando est, si non mouetur, non est: nam in necessariis quemadmodum affirmatio est causa affirmationis, ita negatio est causa negationis. Ergo si aquæ marinæ desinunt moueri, desinunt esse aquæ marinæ: & quidem per actionem agentis per calorem, vt patet; nimirum per actionem solis, siue astrorum & ignis subterranei. Atqui Zona torrida est locus, vbi leucarum decem milliones aquæ marinæ (quæ non sunt, nisi moueantur ad centrum mundi, vt patet ex not. 2. & 3.) simul, & continuò desinunt moueri ad centrum mundi: ergo Zona torrida est locus, vbi decem leucarum milliones aquæ marinæ simul, & continuò desinunt esse aquæ marinæ. Et quidem per actionem agentis per calorem: quia non potest assignari aliud agens. Probatur minor. Aquæ, quæ desinunt fieri propiores centro mundi, desinunt moueri ad centrum mundi: sed aquæ sub Zonâ torridâ desinunt fieri propiores centro mundi: nam quod manet in eâdem à centro distantia, non fit propius centro: sed aquæ marinæ manent in eâdem à centro distantia, vt patet: quia neque fiunt altiores, neque profundiores,

ut patet ex littoribus : Et certè si fierent profundiores , vel densarentur , vel penetrarent sibi subiectas , vel subiectæ descenderent in terram , vel aliò mouerentur : nihil horum dici potest. non primum : quia superiores aquæ non premunt inferiores. Deinde , licèt condensarentur , si tamen permanerent ; tandem per aduentũ continuum aliarum superarent littora. non secundum : quia non datur penetratio corporum. non tertium : quia non diuidunt terram sibi subiectam. neque quartum , quia non potest assignari locus , ad quem moueantur. Nam , quod aliqui dicunt esse canales quosdam subterraneos , per quos eadem aquæ , nullâ factâ conuersione , refluant vnde fluxerunt , est contra naturam aquæ ; recederet enim à centro.

Dices. aquarum motus sub Zona torrida est circularis. ergo est earumdem aquarum refluentium eò , vnde fluxerunt. Antecedens patet , quia est circa terram , ab oriente in occidentem , & perpetuus. patet consequentia ; Quia res per motum circula rem eò redit , vnde digressa est.

Respondeo distinguendo ant. aquarum motus sub Zona torrida est circula-



ris per accidens, & mixtus ex recto. Concedo ant. vt patet ex not. i. est circularis per se, & simpliciter : nego. ant. ac proinde nego consequentiã. Aquæ enim, quæ semper mouentur motu per se recto, & per accidens circulari, semper mouentur ad centrum. Ad probationem antecedentis respondeo cum distinctione, est circa terram ab oriente ad occidentem semper accedendo ad centrum, & perpetuus, per nouas aquas aduenientes, concedo. est circa terram ab oriente ad occidentem, non accedendo ad centrum, & perpetuus per easdem numero aquas, nego. probatio consequentiæ est de motu simplici circulari, quo res eadem numero, & æqualiter distans à centro eò redit vnde egressa est ; non autem de re, quæ semper mouetur ad centrum, & ab eo nunquam recedit : qualis est motus fluentis per grauitatem, qui sub Zonâ torridâ marinis aquis conuenit versus occidentem, & extra Zonam ad ipsam Zonam ex meridie, & septentrione, seu Polis. Ex dictis patet aquas maris ibi generari, vnde incipiunt fluere ; & ibi desinere esse, vbi desinunt fluere, nempe in eo loco, ad quem semper fluunt, neque tamen ibi augen-

tur. hic autem locus est ea pars Zonæ torridæ, quæ perpendiculariter subiaceret soli: Et quia pars illa perpetuò mutatur versus occidentem, ideo marinæ aquæ successiuè desinunt versus occidentem. quo modo semper desineret fluxus aquæ fontanæ, in eo loco, vbi aqua ipsa cum arena multa confunderetur, seu per fornacem verteretur in vaporem.

Dices. fluuij intrant in mare, & inde exeunt, vt in illud fluant. ergo aquæ non mutantur in vapores. Respondeo distinguendo antecedens: mediâtè, & per conuersionem aquæ marinæ in vaporem, & vaporis in aquã; concedo ant. immediâtè, & absque vllâ conuersione; nego ant. atque adeo consequentiam. fit autem reditus aquarum in mare, quatenus aquæ mutantur in vaporem, & vapor tandem in aquam.

Tota vis huius argumenti posita est in eo, quòd aquæ per spatia decem millionum leucarum (neque enim minus occupant aquæ simul, & perpetuò fluentes ex propriâ grauitate) perpetuò moueantur ad vnum locum, centro viciniorum illo, quem per motum suum relinquunt; In eo tamen loco, ad quem omnes illæ aquæ

mouentur , nullum fiat aquarum incrementum. Inde enim sequitur necessariò, vt quanta aquarum copia de nouo semper aduenit ; tanta etiam de nouo pereat, id est , mutetur in vapores. neque enim abeunt in nihil ; & aliud , in quod mutentur, assignari non potest. Et quia de nouo semper , & simul adueniunt aquæ leucarum decem millionum , dicendum est aquas leucarū decem millionum simul, & absque intermissione , mutari in vapores.

## SECTIO TERTIA.

*Argumentum tertium ex maris aestu.*

**C**OPIAM vaporum sub Zonâ torridâ probauimus ex motu maris ad centrum per se, & circulari per accidens, qui est ab aquarum grauitate, & consequenter naturalis : eadem copia nunc probanda est ex violento motu eiusdem maris, quo mouetur à centro. motus prior est partium maris quæ sunt in summo : cuius vapores aquei sunt magis , quàm terrei : posterior hic motus est ab imo : cuius vapores sunt magis terrei , quàm aquei , vnde dicuntur exhalationes. sic autem proponitur argumentum.



Locus ubi est continuus, ac recipro-  
 cus motus aquæ marinæ, secundum  
 quem ipsa maiorem in fluxu ad littora,  
 minorem in refluxu ad alueum, locum  
 occupat, est locus, unde maxima vapo-  
 rum emergit copia. Sed Zona torrida est  
 locus, ubi est continuus ille motus aquæ  
 marinæ: ergo Zona torrida est locus, vn-  
 de maxima vaporum copia emergit. Pro-  
 batur Maior. Locus, unde perpetuò, &  
 ab omni parte, vapores, & exhalationes  
 erumpunt, est locus unde plurima vapo-  
 rum emergit copia. sed locus, ubi est con-  
 tinuus æstus aquæ marinæ, est locus, unde  
 perpetuò, & ab omni parte vapores, &  
 exhalationes erumpunt; Igitur locus,  
 ubi est continuus æstus aquæ marinæ, est  
 locus, unde plurima vaporum emergit  
 copia. Maior est evidens; probatur Mi-  
 nor. Æstus aquæ marinæ fit propter  
 erumpentes inde exhalationes, & vapo-  
 res: ergo locus, ubi est continuus æstus  
 aquæ marinæ, est locus, unde perpetuò,  
 & ab omni parte vapores, & exhalatio-  
 nes erumpunt sursum. Antecedens ex-  
 plicatur, & simul probatur.

Æstus marini fieri non possunt natu-  
 raliter, quin accedente corpore aliquo

maris aquæ intumescant, & eodem abscedente subsidant : vel ( quod eodem redit ) quin partes aquæ incalescant ; non incalescunt autem sine aduentu corporis naturâ suâ calidi , vt contingit in aquis bullientibus. Illud autem corpus , quo intumescunt, non est aliud, quàm exhalationes, quæ per actionem solis, lunæ, & aliorum planetarum, astrorum, & ignium subterraneorum ( quos in mediâ terrâ contineri docent fodinæ paulo profundiores : tantus enim post emensum spatium frigoris, & humoris sentitur calor, vt ibi fossiores multo tempore viuere non possint ) perpetuò fiunt in fundo maris ; indeque per virtutem suam ( seu potius igneorum spirituum , quos continent ) sursum motricem , ascendunt ad summam maris aquas : Ibi propter illarum aquarum motum , ac terminum, crassitiam , vnionem , siue inclinationem ad partes vniendas , & grauitatem , atque adeo maiorem, quàm inferiorum, ad diuisionem, ac separationem resistentiam, retinentur , & constringuntur aliquandiu : sic detentæ & constrictæ, exhalationes augentur per aduentum, & coniunctionem aliarum exhalationum ; quæ ex

fundo maris perpetuò, & absque vllâ intermissione fursùm euocantur : idem enim manens idem semper facit idem.

Sic vnitarum & constrictarum circa superficiem maris exhalationum virtus, occupatiua loci, & fursùm motrix, crescit (nam virtus vnita fortior est se ipsâ dispersâ) superâtque resistantiam, vnionē, & grauitatem aquæ summæ ; eâmq̃ sic fursùm tollit, vt fursùm sublata diuidatur per suam grauitatem : nam rerum fluidarum (qualis est aqua) partes, ipsâ vel leuitate, si leues sint; vel grauitate, si graues (qualis est aqua) separantur. Aqua sic diuisa & intumescens per spiritus igneos ascendentes, refluit ad littora; mouetur enim ad locum propiorem centro, qualia sunt littora maris intumescentis, & exhalationibus, seu vaporibus internis tumefacti. Aqua tumida, diuisa, & fluens ad littora exhalationibus, seu vaporibus, separationem, & egressum, quem priùs illis suâ vnione, motu & grauitate contendebat, concedit. emergunt igitur, & fursùm erumpunt exhalationes, seu vapores. Neque enim spiritus ignei, & terrei, quí componunt exhalationem, ascendunt per medias aquas, quin aquam



tanquam vehiculum, sursum tollant; sicque fiant vapores. Vaporibus egressis, ac sursum sublatis, aqua refluit in alueum: superat enim (vt dictum est) sua gravitate, & vnione, siue inclinatione ad partes vniendas, leuitatem, ac dilatationem naturalem relictarum in mari, & sursum naturâ suâ ascendentium exhalationum. Sunt enim pauciores in pari loco, & consequenter minùs fortes, quàm priores, quæ modò sursum eruperunt, seu transierunt de medio densiori ad minus densum, hoc est de aquâ, ad aërem: atque adeo non superant vnionem, & grauitatem, seu resistantiam aquarum, quæ sunt circa superficiem maris. Refluunt autem in alueum maris aquæ marinæ, abscedentibus exhalationibus, quia tunc superficies aquæ in alueo est propior centro, quàm littora, quò fluxerant. Sic refluens aqua in alueum per motû suum & grauitatem, iterum impedit separationem, & eruptionē, siue egressum aliarum exhalationum in mari relictarum. hæ per aduentum aliarum ex fundo sursum per aquas ascendentium augentur. ac fiunt fortiores, vt præcedentes, quæ sursum eruperunt; ac tandem, vt priores, emer-

gunt: aqua etiam, ut priùs, fluit ad littora ; & exhalationibus egressis, iterum refluit in alueum, & ita consequenter.

#### SECTIO QVARTA.

*Æstum maris non esse immediatè à luna.*

**D**ICES. per actionem lunæ augentur aquæ marinæ ; ergo fluxus, & refluxus non pendet ab exhalationibus. probatur consequentia : Quia per augmentum aquæ marinæ fit fluxus, ergo fluxus non est ab exhalationibus, seu vaporibus. Respondeo, concessio antecedente, negando consequentiam : Ad probationem illius respondeo cum distinctione : Per augmentum aquæ marinæ fit fluxus, id est, quando augentur aquæ marinæ ; ipsæ fluunt ad littora ; concedo ant. id est, fluxus, & refluxus, qui propriè vocatur æstus maris, fit solùm, quando augentur aquæ ; nego ant. Ut intelligatur hæc distinctio,

Notandum, aliud esse augmentationem, & diminutionem aquarum maris ; aliud earundem fluxum, & refluxum, siue æstum. augmentatio, ac diminutio regularis aquarum maris fit tantùm bis

singulis diebus, bis singulis mensibus, bis singulis annis. fluxus, & refluxus non fit tantùm bis singulis diebus, &c. ergo fluxus, & refluxus non est augmentatio, ac diminutio regularis aquarum maris. Neglectus, aut ignoratio huius distinctionis est causa multarum in hoc negotio deceptionum. Fluxus itaque, & refluxus non fit tantùm bis singulis diebus, sed fit singulis horarum momentis: maior quidem est fluxus, & maior refluxus, quando plures, seu maiores sunt aquæ; & minor fluxus, & refluxus, quando minores. At siue augeantur aquæ, siue minuantur, semper fit fluxus, & refluxus. Ratio verò, cur maior fiat fluxus, & maior refluxus aquæ, si maiores, siue abundantiores sint aquæ, est maior vaporum detentio in aquâ. Nam quando retinentur diutiùs (retinentur autem diutiùs, quando maius est impedimentum: est autem maius impedimentum, quando plures sunt aquæ: vnde fluuiorum non sunt fluxus, & refluxus; quia pauciores sunt aquæ in fluuiis, quàm requirantur, vt egressus vaporum, & exhalationum impediatur) maior est exhalationum copia: ergo maior aquarum tumor, ergo maior fluxus ad littora: plu-



res item exhalationes, seu vapores, simul egrediuntur. ergo maior refluxus; plures enim exhalationes simul abeuntes maiorem relinquunt locum aquis redeuntibus, quàm pauciores. at fluxus non est illa augmentatio, siue diminutio aquarum, quæ fit à Lunâ per accessum, aut recessum: per aspectum, aut coniunctionem: vnde fluxus, & refluxus non conuenit fluuiis, licet eorum aquæ crescant, ac decrescant.

## SECTIO QUINTA.

*De causa augmentationis ac diminutionis  
aquarum maris.*

**H**VIUS autem augmentationis, ac diminutionis aquarum maris, causa videtur posse colligi ex his, quæ docet Origanus tertio ephemeridum tomo, in epist. ad Proceres Brandoburgenses, vbi sic loquitur. *Nec inficiabitur quisquam lunæ, quæ terris proxima est, motu, humiditates ita commoueri ut crescente eius lumine, ipsæ quoque augeantur, & corporibus offundantur: deficiente verò lumine, & ipsæ exarescāt, & resorbentur. Aestus quoque maris ab utriusque luminaris motu (nempe solis & lunæ) in pri-*

*mis lunæ diurno dependet. namque effervescit, & insurgit mare, luna ab horizonte orientali ad fastigium celi sese attollente, vel etiam ab occidentali versus imum celi descendente: & eadem ad summum, vel imum celi delata, in summo fervore subsistit, littora omnia complens. Contrahit autem, & recipit sese vicissim mare, luna à meridiano versus horizontem occidentalem descendente, & ab imo celi ad ortum assurgente; sicut existente in horizonte utroque, maximè subsidere, & littora sua deferere animadvertatur. suntque hi fluxus, & refluxus ita affecti; ut in noviluniis, & pleniluniis, consentiente actione utriusque luminaris, validissimi: in quadraturis autem, agentibus in contrarium luminaribus, incitante uno, altero retrahente, remissiones sint, ac languescant. hæc ille: ubi per fluxum, & refluxum intelligit augmentationes, ac diminutiones aquarum. Ex his autem concludes; Quia ubique est horizon, & ubique meridianus, lunam suo perpetuo motu, & augere aquas, & minuere; augere veniendo, minuere recedendo.*

Tres itaque partes in lunæ super horizontem viâ distinguemus; primam, mediam, postremam. In primâ tolluntur aquæ; in mediâ sunt altissimæ; in postre-

ma minuuntur. quod fit in vno hemisphærio, idemetiam fit in opposito sic, vt lunâ existente in nostro meridiano, aquæ sint apud nos altissimæ: nisi adsit aliquod impedimentum, quod pro vario locorum situ posset contingere.

Ratio verò, cur lunâ existente in meridiano, aquæ in illo hemisphærio, & opposito intumescant; hæc videtur esse: Quod actio potentissima alicuius agentis in aliquod subiectum, seu patiens fiat per lineam rectam à centro agentis, ad centrum patientis ductam, vt pote breuissimam, & perpendicularem. Radix enim actionis, inclinationis, & virtutis ad agendum, & in centro agentis; & radix inclinationis ad recipiendû est in centro patientis, quatenus respicit agens. Illa autem virtus, & inclinatio communicatur toti agenti, & patienti, per lineas à centro ductas: Illi ergo lineæ, quæ inter vtrumque centrum est breuissima, communicatur maximè vtraque virtus, & inclinatio. ergo in ea est actio potentissima; in aliis autem omnibus lateralibus eô minor est actio, quô magis ab illa recedunt. vide Morinum de telluris quiete, cap. 10. 5. rationem, pag. 80. Si lineam perpendicu-



dicularem ab agentis centro ductam concipiamus per centrum patientis ulterius progredi: concipienda quoque erit in illa maior actio, seu potentior, quàm in aliis omnibus lineis ultra centrum iacentibus.

Cùm ergo luna sit in istâ maris augmentatione agens, & aquæ globus sit patiens; actio potentissima lunæ in aquas erit per lineam perpendicularem ab illius centro ad centrum globi aquarum ductam: ergo si augmentur aquæ per actionem lunæ, maximè augebuntur in illâ lineâ. ergo cum lunâ existente in meridiano, linea perpendicularis ab eius centro ad centrum terræ, siue maris, sit media inter orientē, & occidentem, & ab iis remotissima, circulus meridianus potentissimam habebit actionem, oriens autem, & occidens (cùm luna sit quadragies minor, quàm terra) maxime debilem. Ergo lunâ existente in meridiano alicuius hemisphærij, plurima erit aqua in meridiano talis hemisphærij, & in parte illi oppositâ, ad quam per centrum aquarum transit linea illa potentissimæ actionis: Existente verò in oriente, vel occidente, eiusdem hemisphærij, pauca in partibus globi terræquei, quibus ipsa oritur, vel occidit.

Videntur autē maris aquæ intumescere, & augeri per aduentum, & per mixturem spirituum lunarium, tanquam aduentitiorum; quibus excitentur alij infiti, siue aquei, siue lunares, in ipso mari velut sopiti: minui verò per eorundem vel recessum, vel corruptionem in aquam densiorem; vel quietem, siue cessationem à motu.

Adueniunt illi spiritus lunares, quibus aquæ intumescunt, quósque appellamus aduentitios, ex lunâ ipsos dispergente, conseruante, & augente per suam actionem, eò maiorem, & potentio rem, quò magis directa est, modo explicato; ac proinde præsentē lunâ: Ipsâ verò recedente, spiritus illi vel abscedunt, vel sunt pauciores, vel corrumpuntur in aquam multo densiorem, vel cessant à motu.

Luna dispergit suos spiritus (quorū materiā collegit ex sole & globo terraqueo) quatenus emittit spiritus lunares: In eum verò locum dispergit plures, in quem plures transmittit solares: Et quia plures in globum terraqueum transmittit spiritus solares, quando soli opponitur, & quando illi coniungitur; Ideo plures in oppo-

sitione, & coniunctione, quàm in quadraturis dispergit in globum terraqueum spiritus lunares: atque adeo copiosiores sunt in coniunctionibus, & oppositionibus, quàm in quadraturis aquæ marinæ.

Videtur autem luna dispergere in globum terraqueum spiritus plures, quàm in alias mundi partes, quia, quâ superficiei parte globum terraqueum respicit, ea tota est crebris, & ingentibus cauernis distincta, atque adeo reliquis superficiei partibus minùs asperis, ad recipiendos spiritus solares aptior: ex quâ receptione sequitur abundantior lunarium dispersio, cæteris paribus.

Hæc autem lunaris superficiei pars aduersa terræ, cavitatibus aspera est ex necessitate materiæ: Nempe, quia partes in lunâ magis aqueæ & graues ad terram propiùs, quàm aliæ leuiores accesserunt: neque tamen ab aliis sunt separatae, quia naturam cum aliis eandem, & solis accidentibus, vel maiori terrenorum, vel aqueorum spirituum poris contentorum, copiâ diuisam, participant in bonum globi terraquei, seu potius humanæ creaturæ.

Coniunctiones, & oppositiones re-



spectu solis existentis in Librâ, vel Ariete, siue in medio mundo, sunt potentiores respectu maris, quàm aliæ: quia tunc luna sic opposita, & coniuncta medium cum sole occupat mare: atque adeo maiorem in aquas hinc, & inde spirituum suorum dispergit, & solarium transmittit copiam.

Ex dictis patet maris tumorem diurnum pendere ab accessu lunæ ad meridianum loci, vbi fit tumor, & menstruum à coniunctione cum sole: annum ex oppositione eiusdem lunæ & coniunctione cum eodem sole in ariete, & libra posito.

## SECTIO SEPTIMA.

### *De primo maris æstu.*

**E**X dictis facile est hunc de primo æstu maris formare conceptum. Tercio die creationis mundi congregatæ sunt aquæ in vnum locum, & ibi quiescunt. Quarto die sol cum aliis planetis, astris, & cælo agit in terram subiectam illis aquis eò vehementiùs, quò medijs pars (nempe illæ aquæ) est densior. Ignis etiam subterranei agunt in eandem terræ partem aquis illis subiectam, vtpote viciniorem.

Vnde obiter colliges fluuiorum, & quorundam marium aquas non agitari æstu, quia nimis remotæ sunt à subterraneis ignibus, vt pote minùs profundæ. Ecce tibi in fundo maris exhalationes, id est ignei, & cœlestes spiritus, terreis permisti. hoc mixtum ascendit per aquam vt medium, ac vehiculum: atque adeo fit mixtum ex aqua, terra, & igne, non absque aëre: quia non descendit ignis in terræ viscera absque aëre, & spiritibus aqueis. Spiritus igneus, & cœlestis mixto illo contentus vnà cum aëre, fursùm tendit: Ergo, nisi fortiori detineatur impedimento fursùm feretur. Impedimentum non affert terra, vt pote iam extenuata, calefacta, & rarefacta, diuisa, & separata, & spiritibus igneis implicata: Neque illum motum impediet aqua, si nulla fiat ab eâ separatio. Ergo spiritus igneus, siue cœlestis, & aëreus fursum mouebitur vsque ad aquarû superficiem. Ibi verò, ne fiat separatio aquæ ab aqua (cui partium separationi contrariam habet inclinationem aqua, vt patet in bullis aërem detinentibus, ne fiat illa separatio) retinetur. Ecce tibi exhalationem à suo motu fursum retardatam, &

impeditam in maris summo , propter hanc ad vnionem partium , maiorémque in superficie, quàm in medio seu fundo, partium vnionem , & grauitatem. Hæc autem maior vnio partium & grauitas in extremo , siue superficie maris oritur ex eo , quòd fluida naturaliter mota sibi constituent extremum densius medio : & hanc habent à mundo , qui densissimo tegitur inuolucro , & cuius sunt partes , inclinationem.

Accedunt aliæ exhalationes , seu vapores, Quia sol, ignes subterranei, & alia agentia naturalia non cessant ab actione sua : Exhalationes , seu vapores vaporibus uniuntur in summo mari : Vapores vniti fortiores fiunt ad dilatationem naturalem, & motum fursùm : ergo dilatantur tandem, & mouentur fursùm. Ecce tibi aquas superpositas eleuatas , quantum illarum fluiditas patitur. At grauitas propter fluiditatem partium, partes diuidit , easque ad locum centro propiorem mouet. Ecce tibi primum fluxum. Interim erumpunt , & abeunt fursùm vapores; & aquis, in quem refluant, relinquunt locum. Ecce tibi primum refluxum.



## CAPVT IV.

*Vapores qui fiunt ex Zona torrida, ascendere  
ad locum solis.*

## SECTIO PRIMA.

*Probatio.*

**P**ROBATVR hoc argumento. Quod ascendit ad locum solis per calorem, & incalescit vsque ad locum solis, & non mutatur in via, ascendit vsque ad locum solis. Atqui vapores, qui fiunt ex globi terraquei Zonâ torridâ, ascendunt ad locum solis per calorem, & incalescunt vsque ad locum solis, & non mutantur in via. Ergo vapores, qui fiunt ex globi terraquei Zonâ torridâ, ascendunt vsque ad locum solis. Maior est euidens, idem enim manens idem facit idem. Minor habet tres partes. Primam, quâ dicuntur vapores, qui fiunt ex globi terraquei Zona torrida, ascendere ad locum solis per calorem: Secundam, quâ dicuntur incalescere vsque ad locum solis: Tertiam, quâ dicuntur non mutari in viâ. Prima est euidens: Locus enim solis, nempe quem sol annuo motu decurrit, est su-

pra globi terraquei Zonam torridam : & quod ex illâ sursum mouetur, mouetur versùs locum solis. Vapores autem sursum mouentur & quidem per calorem, ex quo sequatur leuitas ; qualis est calor, qui conuenit vaporibus : habent enim calorem propter spiritus igneos , qui naturâ suâ sunt leues. Secunda pars sic probatur. Quod est capax caloris, & ascendit per spatia valde calida, incalescit, dum ascendit: Atqui vapores sunt caloris capaces , & ascendunt per spatia valde calida , 1<sup>o</sup>. propter ardorem solis, qui nunquam ab iis recedit. 2<sup>o</sup>. propter alios planetas, qui nunquam vagantur extra Zodiacum. 3<sup>o</sup>. propter partem Firmamenti, seu fasciam, quæ respondet Zonæ torridæ globi terraquei : est enim pars illa, seu fascia, seu Zona ( quam etiam in cælo vocamus torridam ) multo potentior aliis partibus Firmamenti, cùm propter Eclipticam, tùm propter actionem solis, quæ directè fertur in illam Zonam , seu fasciam : atque adeo virtus illius magis excitatur, & crescit, quàm aliarum Firmamenti partium. Ergo vapores, qui ascendunt ex Zonâ torridâ, incalescunt ; hoc est colligunt spiritus igneos. Tertia pars

minoris sic probatur. Vapores, qui non mutantur in meteora, vel aërem, vel ignem, non mutantur (hîc enim est quaestio de mutatione, quâ desinant esse vapores, non autem de mutatione quadam accidentali, secundû quam vel vniantur aliis, vel incalescant, vel refrigerentur aliquo modo, sic tamen, vt non desinant esse vapores) atqui vapores, qui ascendunt ex Zonâ torridâ, non mutantur in meteora, neque in aërem, neque in ignē, antequam perueniant ad locum solis, ergo vapores, qui ascendunt ex Zonâ torridâ, non mutantur in viâ. Probatur minor per partes. Non mutâtur in meteora; quia illa meteora essent quamplurima, perpetua, & vbi-que, sub Zona torrida, cûm semper, & ex omnibus partibus ascendant plurimi vapores: Non mutantur in aërem, quia constant ex partibus terreis, quæ si mutantur certè non nisi magna, vehementi, & longâ actione (qualis non reperitur ante locum solis) mutantur in alias substantias. partibus autem terreis conseruatis, conseruantur etiam partes aquæ, vt vehiculum ipsarum: his autem conseruatis, & non redeuntibus ad locum naturalem, id est ad globum terraqueum, conseruan-



tur vapores. Propter eandem rationem non mutantur in ignem, antequam perueniant ad locum solis, ergo non mutantur in viâ.

## SECTIO SECUNDA.

### *Obiectiones.*

**O**BIECTES primò. In aëris subiecti Zonæ torridæ cœlesti mediâ regione est frigus, ergo vapores non transcendunt illam regionem. Probatur antecedens. Quia sub Zona torrida est pluuiâ, ergo est frigus in aëris mediâ regione. Respondeo distinguendo antec. In aliquâ parte illius est frigus, concedo antec. In omni parte. nego antec. Ista autem pars in quâ est aliquod frigus, quata est ad ingentem tractum Zonæ torridæ, & partium vicinarum, vnde tam multi ascendunt vapores? Itaque nego consequentiam; seu distingo consequens: aliqua vaporum particula non transcendit illam regionem; concedo consequentiam: ingens vaporum copia non transcendet illam regionem, nego consequentiam. Ad probationem antecedentis, Respondeo concedendo esse in aliquâ particulâ

mediæ illius regionis modicum frigus, unde oriatur pluuia in insulis, & solo montuoso, & siluestri. Montes enim & siluæ frigus continent, vaporésque vicinos facilè refrigerant, & condensant. Item vapores crassiores illius soli, & minùs cocti ardore solis, pèrque antiperistasm refrigerati, vertuntur in pluuiam, & decidunt. Antiperistasis autem est causa huius frigoris, quatenus ignei spiritus, qui continebantur illis vaporibus nondum satis extenuatis, transeunt in aërem congenium, seu plenum spiritibus igneis: quo modo aquæ fontanæ æstate refrigerantur. at vapores subtiliores, ac spiritibus igneis magis ac magis referti, & calore iam multùm extenuati & infinitiès propemodum plures, quàm illi crassiores, conseruant calorem, & augent eò magis, quò propiùs ad solem accedunt: atque adeò semper ascendunt, moti ad occidentem cum aëre, qui ventum orientalem in alto mari perpetuò, & pacificè regnantem constituit, vt docet Acosta lib. 3. cap. 8. post illum Morinus, cap. 11. de terræ quiete p. 112. vbi docet hunc ventum esse constanter vehementiorem sub æquatore, quàm sub Tropicis, & vtrim-

que ab æquatore ad 23. gradum, vbi cessat, remittere.

Ex pluuiis autem, ac meteoris, quæ fiunt interdum sub Zona torrida, colligitur ascensus vaporum defæcatorum. Pluuia enim, & alia meteora sub Zona torrida, fiunt ex partibus vaporum nimis aquosis, & minùs aptis ad pabulum flammæ, quibus purgati vapores faciliùs ad locum à natura destinatum, nempe ad locum solis perueniunt.

Obiicies secundò, vapores non transcendunt illam regionẽ quæ vocatur Atmosphæra. Ergo non perueniunt ad solem. Probatur antec. refractiones fiunt in Atmosphæra, & vltra illum non fiunt. Ergo vapores illam non transcendunt. probatur consequentia. Vbi sunt vapores, ibi fiunt refractiones; & vbi non fiunt refractiones ibi non sunt vapores: ergo si refractiones fiunt in Atmosphærâ, & vltra illam non fiunt, in Atmosphærâ sunt vapores, & vltra illam non sunt. Respondeo negando antec. Ad illius probationem, concessio antecedente, negando consequentiam: ad illius probationem respondeo distinguendo antec. vbi sunt vapores crassiores, ac densiores, fiunt refra-



ctiones, & vbi non fiunt refractiones, non sunt vapores crassiores, ac densiores, concedo antec. vbi sunt vapores subtiles, & calore multo extenuati, fiunt refractiones, & vbi non fiunt refractiones, non sunt vapores subtiles & calore multo extenuati; nego antec. Hoc patet in aëre nostro, qui cælo etiã serenissimo, est plenus vaporibus subtilibus. nam, quô maior est actio solis, eô plures sunt vapores in aëre: & certè sæpe modico vento, qui non est sine vaporibus, agitur; neque tamen fiunt in eo refractiones, saltem sensibiles. Vapores autem regionem illam, quam vocant Atmosphæram, sub Zona torrida transcendentibus, incallescunt, extenuantur, fiuntque ita perspicui, vt non magis visum terminent, quàm aër, perspicuitas enim oritur ex raritate quæ non resistat motui luminari, & calore, per quem augentur spiritus lucidi, seu potius, qui præsupponit plures spiritus igneos, qui fiant lucidi, vt dictum est cap. 4. quæst. præcedentis.

Et hoc patet in vrinâ sanâ, quæ (licet plena fæcibus crassioribus, ibi, quandiu calida est, delitescantibus, apparentibus autem quando frigida est) non minùs

quàm aqua, perspicua est: Item in aquis mineralibus, in quibus delitescent substantiæ tenues per se nigræ, & violaceæ, quæ post misionem ramentorum gallæ, intra vnâ, aut alteram horam, apparent: Paret etiam in aquâ marinâ, quæ in vitrea lagena perspicua magis est, quàm fontana; quia nimirum continet plures spiritus igneos.

## CAPVT V.

*Diuiduntur vapores supra explicati in tres partes seu Zonas, & explicatur quid cuique conueniat.*

**Q**UONIAM (vt sæpe dictum est, & sæpe in hac materia dicendum) idem manens idem semper facit idem; necessarium est, vt hæc plurima vaporum copia sit perpetua sub Zona torrida. Diuidamus ergo ingentem illum tractum, seu fasciam vaporum, quæ est intra tropicos à loco solis, vt circumferentiâ, ad globi terraquei Zonam torridam, vt centrum, in tres fascias.

Vnam, quæ à globi terraquei Zona torrida tanquam centro perueniat ad regionem lunæ, sitque prima fascia.

Alteram, ipsâ superiorem & illi contiguam, siue continuam, quæ ab illa primâ fascia tanquam centro, pertineat ad locum immediatè subiectum Solis fasciæ, sitque secunda fascia, cuius circumferentia, seu superficies conuexa sit immediatè subiecta Solis fasciæ: superficies autem concava sit immediatè supra circumferentiam, seu superficiem conuexam primæ, siue inferioris fasciæ; quo modo in Iride videmus circulum superiorem supra inferiorem immediatè sibi subiectum.

Tertiam denique adhuc istâ secundâ superiorem, & ipsi contiguam, receptam in Solis fasciâ, tanquam in matrice: vbi cum aliis firmamenti, stellarum, & planetarum influxibus in proximum Solis pabulum conuertatur. Omnes hæ Zonæ sunt ab oriente ad occidentem intra Zonam torridam, seu tropicos. Prima est mixtum imperfectum ex aquâ, terrâ, & igne, permistis aëri, siue ex aquâ rarefactâ spiritibus igneis, & aëreis, & impinguatâ terreis. Secunda est Mixtum ex illis omnibus, & aëre cœlesti. Aërem voco cœlestem, in quo mouentur planetæ & astra.



Prima fascia est madida propter aquam, & calida propter spiritus igneos, & pinguis propter terreos.

Secunda est rorea, propter spiritus lunares, & calidior quàm prima, tum propter eosdem spiritus lunares, tum propter spiritus igneos seu cœlestes, perpetuò aduenientes: duplo item maioris loci, quàm prima, propter mistionem cum aëre lunari, non minoris quantitatis quàm sit ipsa fascia: non tamen idcirco rarior, quia lunaris aër propter continuam Lunæ humectantis actionem, non videtur rarior vapore tenui, & calido. Miscetur autem vapor ad hanc Lunæ regionem delatus huic aëri lunari propter congenecitatem aquæ cum spiritibus lunaribus: Cùmque ipsorum vehiculum sit ipse aër, & spiritus aliquid sui vehiculi secum semper asportet, non vnitur vapor spiritui, quin etiam vniatur aëri: quomodo non vniuntur spiritus aquæ, & vini, propter congenecitatem, quin etiam vniuntur ipsorum vehicula, nempe vinum, & aqua; quæ tali mistioni non repugnant, quia sunt eiusdem ferè grauitatis.

Et quemadmodum vinum, si vniatur cum aquâ eiusdem secum quantitatis,  
du-

duplo maiorem occupabit locum; ita vapor vnitus aëri lunari sibi æquali, duplo maiorem occupabit locum.

Quod verò vapores aëre lunari, tanquam rore aliquo subtili, perfundantur, patet ex eo, quod Luna faciat humorem aqueum naturâ suâ; ipsa enim est tanquam lentus ignis magis aptus ad aquam producendam, quàm aliud corpus, vt patet ex arte chymica, cuius ignis lentus etiam metalla mutat in aquam, seu liquorem. Hoc etiam conuenit igni in Italiâ, prope Neapolim, vulgò dicto, *la Sulphatara*, cui linteum applicatum madefit: Imo ferrum ita madet, vt rores, siue aqueæ, guttæ, ex eo *Sulphatara* calefacto decidant. Ergo Luna, licèt ignea, faciet humorem aqueum; Idque constat ex omnibus humidis, quæ augentur in pleni-lunio; & ex rore, qui multus in vitro, & aliis Lunæ oppositis, producitur.


Vnde colliges Lunam esse mixtum perfectum, in quo ignis, & aqua dominantur, vt docet Anselmus lib. i. de imagine mundi cap. 23.

Hæ duæ vaporum Zonæ modò explicatæ spatium, quod reperitur inter tro-

picos, totum tenent à terrâ ad Solis fasciam, siue Ellychnium, exclusiue.

Tertia vaporum Zona Solis Ellychniû ingressa, cûmque aliâ materiâ ex toto mundo adueniente permista, ipsum Ellychnium peruadit, ac replet: neque locum habet alium, neque lationem aliam, quàm ipsa Solis Fascia.

Aliæ duæ priores & inferiores vaporum Zonæ successiue componunt suos circulos ab oriente in occidentem: in suâ enim primâ productione circa terram vapores sequuntur motum Solis. hoc est: si concipiamus v. g. Solem inchoare suum circulum ab insulâ *Summatra*, seu D. Thomæ, & continuare versûs occidentem; concipiemus quoque oriri primûm vapores ex insulâ D. Thomæ, qui ferantur inde sursum: & ita constanter, dum absoluitur prima vaporum fascia, quæ successiue, & circulariter transeat in secundam.





# QVÆSTIO TERTIA.

*De motu Solis, Firmamenti & Astrorum.*



VÆSTIONE præcedente Solem esse flammam docuimus, eiúsque pabulum ab vniuerso mundo per analogiam ad Microcosmum, deduximus, ac tandem vapores ad illud pabulum pertinere ostendimus; nunc agendum est de motu Solis, & aliis motibus, qui motum illum consequuntur.

Et quia primus, naturalis, & per se, motus Solis, nempe fluxus sursum, notus est; & ex eo sequuntur aliæ partium mundi solidarum lationes; inchoandum est à motu firmamenti. Sit igitur

## CAPVT I.

*Firmamentum mouetur à Sole.*

EX fascia Solis in cognitionem Partium mundi lationum deducimur.

E ij

Sol enim illi fasciæ, tanquam Ellychnio, alligatus, per fluxum continuum spirituum igneorum, secum terreos, & aqueos, vehentium, fursùm erumpens eò, quem subiicimus, modo Firmamentum ex Oriente in Occidentem per Meridiem mouet celerrimè.

Firmamentum parte superâ, seu conuexâ, quâ circumdatur cælo empyreo, tersum ac politum; parte concauâ sic rugosum, ac dentatum sit, vt cauum in ipso spatium sumptum pro Eclipticæ peripheriâ diuidatur in 180. partes æquales, & singulis partibus assignetur suus veluti dens in modum cunei quadrilateri; terræ obuersus, inclinatusque ad occidentem duobus gradibus cum dimidio. Basis illius spissâ sit quartâ parte gradus; Cuspis, octauâ: longitudo, siue spatium inter basim, & cuspidem; sit quadringentarum terræ diametrorum; distantia verò cuspidis à fundo firmamenti ducentarum tantum, propter inclinationem. Firmamēto ita constituto, Solis flamma, seu fumus, sit perpetuus cuneus ad motum, lateralem quidem per se, circularem autem per aliud, hoc est, per axem mundi circa terram, cui

Firmamentum per suos polos est immobiliter alligatum.

Motus hic Firmamenti circularis ad Occidentem ex Oriente per meridiem est maximæ celeritatis: nulla enim est resistentia intrinseca in ipso Firmamento: quia per talem motum non recedit à loco naturali: Extrinseca resistentia parua est; quia uectione suâ nihil ponit extra locum naturalem; hoc est, motus, quem communicat aliis corporibus, non trahit illa extra locum ipsis naturalem; ut patet ex stellis, quæ per talem motum neque accedunt ad medium mundi, neque ad extremum; neque ab extremo, neque à medio recedunt. Parua igitur est resistentia extrinseca motui Firmamenti versùs occidentem.

Resistentia non potest esse ex parte Terræ; quia circa illam fit motus, neque ipsi communicatur; ut dicetur questione sequenti. Ergo ex parte mobilis nullum est impedimentum summæ celeritatis in mundo: Præsertim cùm ipsum Firmamentum sit solidum corpus totius mundi maximum: Quò enim maius est corpus, eò maior ipsi conuenit celeritas, cæteris paribus, si moueatur. Ex parte



igitur Firmamenti, hoc est, mobilis, omnia conferunt ad celeritatem.

Ex parte verò Agentis hoc vnico argumento celeritas ista persuadetur. Est enim cuneus tam constantis actionis, vt ipsa nunquam interrumpatur, tantæ celeritatis, quantæ est eruptio lucidi ex flammâ: nam ista celeritas communicatur omnibus spiritibus in medio iacentibus vsque ad vltimum.

Probabile est initio quidem minus celerem fuisse Firmamenti motum, postmodum verò suam acquisiuisse regularem celeritatem: vt patet in molendinis, quorum vel alæ, vel rotæ, minus celeriter initio vel à vento, vel ab aqua, mouentur, postea verò celerius, & regulariter.

Quemadmodum caput microcosmi à corde motum mouet corpus, & consequenter ipsum cordis parenchyma; ita Firmamentum à Sole motum vehit stellas, fasciam Solis, & Planetas ad Occidentem, cum medio, & per medium, eâ celeritate, quam patitur ipsorum resistentia: Quæ est, vel grauitatio, vel leuitatio, mobilium; vel diuisio mediij; vel aliud corpus magneticum, vel distantia

naturalis ab ipso Firmamento.

Gravitatio, & leuitatio mobilium resistunt; quia sunt motus recti: diuisio medij; quia partes vnitæ per se, resistunt diuisioni: corpus aliud magneticum; quia magneticè retinet; vt, si quis diceret à Ioue retineri ipsius satellites, & à Terrâ Lunam: distantia resistit; quia quod remotum est à principio motus minùs, cæteris paribus, mouetur.

Dices: non est probabile, Firmamentum conuerti à Solis flammâ, seu fumo; tum quia fumus ille dissipatur, antequam eò perueniat; tum quia nimia est Firmamenti à Sole distantia. Ergo Firmamentum non mouetur à Sole. Respondeo negãdo Antecedens; nam, quemadmodum si ex Firmamento fluuius aqueus continuo, & constante fluxu in rotæ solidæ super axem suum in aëre nostro positæ, & secundum peripheriam suam conuexam dentatæ, & mobilis in orbem, dentes incideret; eam sua gravitate in orbem moueret, nihil obstante distantia principij; ita ex Ellychnio Solis, igneus fluuius continuo, & constante, fluxu ad Firmamenti solidi super axem in mundi extremo positi secun-

dùm peripheriam suam concavam dentati, & mobilis in orbem, dentes ascendens, illud sua leuitate in orbem mouet, nihil obstante principij distantia. Ad priorem antecedentis probationem, respondeo, non dissipari fenum Solis in via; quia transit per medium valdè subtile, adeoque parua ad diuisionem resistentiæ, motum in Occidentem cum ipso fumo, & sursùm naturâ suâ tendens, quod nostro non conuenit medio. Ad posteriorem probationem, respondeo, distantiam illam nihil nocere, quia continuatur fluxus per leuitatem naturalem, & eruptionem vehementem spirituum igneorum ex Sole; quæ maioris est efficacix, quàm expulsio aliorum spirituum in alias à superâ partes. Quæ dicta sunt faciliùs intelligentur, si ponamus aliquas Assertiones. Itaque sit

## CAPVT II.

### *Assertiones.*

#### PRIMA ASSERTIO.

**F**IRMAMENTVM est corpus solidum, ac durum. Explico. Per *Firmamen-*



*tum* intelligo mundi extremum, quò ipse mundus separatur à cœlo empyreo sede Beatorum, in cuius medio, tanquam Globum in Orbe, positum esse mundum suppono. Per *extremum* intelligo, non solam superficiem indiuisibilem, quæ per negationem vltioris intelligitur, ac definitur; sed etiam partes corporis tali superfici ei vicinas. Et hîc intelligendus est orbis, quo reliqua mundi corpora, siue fluida, siue consistentia, clauduntur, & continentur, tanquam loco vniuersali, & omnibus communi. Globus orbe illo contentus habet pro centro Globum Terraqueum; inter quem & orbem illum, quem vocamus *Firmamentum*, suppono spatium esse liquidum, per quod moueantur Stellæ, & Planetæ. Factâ illa hypethesi, dico. *Firmamentum esse corpus solidum, ac durum*: Et sic probô.

Quod continet medium fluidum, & corpora consistentia per illud medium lata; debet esse durum, ac solidum: alioqui non contineret tale fluidum, sed cum ipso, & corporibus solidis in ipso contentis agitato, facilè misceretur, & confunderetur, neque vno tenore mo-

ueretur, atque adeò nullum esset mundo extremum mobile certum, ac determinatum. Atqui *Firmamentum* continet medium fluidum, per quod feruntur corpora consistentia, quæ mouentur. Ergo *Firmamentum* est corpus solidum ac durum.

## II. A S S E R T I O.

*FIRMAMENTVM* est Terreum. Probat. Quicquid in mundo est solidum ac durum, est terreum. Terra enim constringit partes, atque adeò facit duras. Atqui *Firmamentum* est solidum, ac durum, ex Assertionem præcedenti: Ergo & terreum.

## III. A S S E R T I O.

IN *Firmamento* nulla est grauitatio, neque leuitatio; hoc est, *Firmamentum* non mouetur sursùm neque deorsùm. Probat. *Firmamentum* non mouetur sursùm, quia graue est, cùm sit terreum, ex Assertionem præcedenti; neque deorsùm; siue secundùm se totum, siue secundùm partes: non secundùm

se totum, quia non potest totum accedere ad centrum: si enim per vnam partem accederet, per alteram recederet: non secundum partes: quia consistens, ac rigidum est. Rigidi autem consistentis partes non separantur.

#### IV. A S S E R T I O.

FIRMAMENTVM, quâ parte respicit Empyreum, parte scilicet conuexâ, tersum est ac politum: quâ verò terram aspicit, nempe concauâ eclipticæ peripheriâ, rugosum est & asperum. Prioris partis ratio est, ne Firmamenti circularis motus ad Occidentem impediatur. Posterioris partis ratio est idem motus, nempe vt fiat. Rugas illas & modum, quo fit ille motus suprâ explicuimus cap. i.

#### V. A S S E R T I O.

FIRMAMENTVM est Agens corporeorum, ac solidorum agentium totius mundi vniuersalissimum. Probat: & primùm, quòd sit agens, patet ex eo, quòd sit corpus in mundo; nullum enim



corpus est in mundo, quod non sit actiuum, quod non agat, vt patet ex iis quæ docentur in Physicis de Agente, & actione. Quòd sit corporeum & solidum, patet ex dictis: Quòd verò sit vniuersalissimum, patet etiam ex eo, quod sit omnium consistentium amplissimum.

## VI. ASSERTIO.

FIRMAMENTVM educit aquas cælestes ex vaporibus eò delatis actione Solis. Probatur. Quod naturâ suâ frigidum est educit aquas ex vaporibus contiguïs, vt patet ex rupibus, vnde scaturiunt aquæ fontanæ, & vase distillatorio, quod Gallicè vocamus *Alembic*. Atqui firmamentum est naturâ suâ frigidum, cùm sit terreum. Ergo ex vaporibus contiguïs educit aquas: Vapores autem eò per actionem Solis delati sunt firmamēto contigui. Ergo ex vaporibus eò delatis actione Solis, educit aquas; non alias, quàm cælestes. Ergo aquas educit cælestes. Hinc oritur cæruleus in firmamento color: hanc educationem explicat vas distillatorium. Educere autem est particulas eiusdem per se ratio-

nis, huc & illuc sparsas in mixto & confusas ex illo mixto separare, & in aliud totum substantiale, & specificum vnire.

## VII. A S S E R T I O.

FIRMAMENTVM mouetur ab Oriente in Occidentem per Meridiem à *Sole*. Motus hic explicatus est suprà cap. i. Quod moueatur à Sole, sic probatur. Firmamentum mouetur ab Agente naturali proximo, & particulari (talìa enim Agentia, vt causas secundas particulares, & determinatas, Deus, vt causa prima vniuersalis & libera, & auctor mundi, non denegat mundo.) Proximum autem agens, & naturale, ac determinatum non est aliud, quàm Sol, vt patet ex supradictis. Ergo Firmamentum mouetur ab Oriente in Occidentem per Meridiem à *Sole*. Dices: mouetur ab Angelo. Respondeo. Angelum esse liberum, neque esse infinitum; atque adeò nego ipsum sufficere posse ad constantem, & perpetuum firmamenti motum: Angelus enim est propter indifferentiam finitam defectibilis.

## VIII. A S S E R T I O.

FIRMAMENTVM mouetur ad Occidentem celerrimè omnium mundi solidorum corporum. Hæc assertio probata est suprà cap. i. modò intelligatur de perpetuo & constante motu : nam Planetæ, quando sunt retrogradi celerius ad Occidentem mouentur, quàm firmamentum ; at hic non est perpetuus, & constans motus ; vt dicetur suo loco.

## IX. A S S E R T I O.

FIRMAMENTVM mouet in Occidentem cælestes aquas & stellas ; Aërem cælestem, & Planetas. Probatur. Corpus motum ad Occidentem, eò mouet vnitum sibi loco, & nexu naturali, si non adsit impedimentum. Mouet enim quò mouetur : Atqui firmamentum mouetur ad Occidentem : & cælestes aquæ, stellæ, cælestis aër, & Planetæ sunt illi vnita loco, & nexu naturali : Aquæ quidem cælestes loco : quia ibi generantur ex Ass. 6. Stellæ autem, & Aër cælestis, sua leuitate : Denique Stel-



læ & Planetæ nexu magnetico: Neque adest impedimentum sufficiens ad tollendum motum. Ergo, &c.

## X. A S S E R T I O.

MEDIUM vicinum Firmamento graue, qualis est aqua, grauitat, & leue ab ipso remotum, leuitat: vtriusque partis ratio est, quia non habent quod omnem tollat leuitationem, aut grauitationem.

## XI. A S S E R T I O.

ALIQUANTÔ lentiùs ad Occidentem mouentur Stellæ quàm Firmamentum. Ratio est, quia per suum motum diuidunt medium, in quo sunt, nimirum aquas, in quibus scintillant: Tale autem medium resistit aliquantùm motui in Occidentem; tum quia grauitat, tum quia resistit diuisioni. Dixi *aliquantùm*, quia motum ab ipso Firmamento medium ad Occidentem minùs impedit motum ad illam partem. Dices. Si terra moueretur in orbem, saxa ingentia super illam iacentia pari cum illâ ce-

leritate mouerentur. Ergo & stellæ paricum firmamento celeritate moueri debent. Respondeo 1. negando antecedens. Si enim maxima celeritate moueretur terra, celerius moueretur quàm saxa non continua. 2. Respondeo negando consequentiam. Grauiam enim, quia minùs sunt mobilia, magis adhærent per suam grauitatem, quàm leuiam per suam leuitatem: hæc enim sunt multò mobilia.

## XII. A S S E R T I O.

STELLÆ pari celeritate ferè omnes vehuntur ad Occidentem. Probatur. Quia idem habent vehens, & eandem vt plurimùm resistantiam in medio. Quod intelligendum est, de circulationis diurnæ morâ, & numero, non de magnitudine; maior enim est circulatio stellæ vicinæ Æquatori, quàm vicinæ Polo.

## XIII. A S S E R T I O.

FASCIA Solis ad Occidentem voluitur aliquantò lentiùs quàm firmamentum. Probatur. Nam quod impeditur à motu

in Occidentem leuitatione, & grauitatione, & quod multum distat à principio mouente, seu corpore vehente, scilicet firmamento; mouetur lentiùs ad Occidentem, quàm firmamentum. Atqui fascia Solis impeditur à motu circulari leuitatione & grauitatione: Cùm enim distet inæqualiter à centro mundi, tota, quando voluitur; non quidem per se, sed per suas partes, accedit ad centrum mundi, quod est grauitare; & ab eo recedit, quod est leuitare; prætereà probabile est, ipsam, quâ parte viciniore est centro mundi, esse grauiorem, quàm alterâ, quâ remotior est ab eodem centro. Ergo fasciæ Solis conuenit ex hoc capite leuitatio, & grauitatio. Altera etiam ipsi conuenit leuitatio per flammam Solis, quæ ipsi tanquam Ellychnio adhæret.

A firmamento quoque, quod est vehens, multum distat. Ergo Solis fascia voluitur ad Occidentem lentiùs quàm firmamentum. Quod verò celeritas ad Occidentem, quâ Firmamentum superat fasciam Solis, sit valde exigua (nempe non maior quàm vnico tantum gradu annis septuaginta duobus, hoc est



vnico tantùm signo bis mille centum , & sexaginta annis , & vnâ conuersione viginti quinque millibus nongentis & viginti annis ) Patet ex cõ , quòd ipsa fascia tota ex omni parte vniatur magneticè vehenti , nempe Firmamento per Æclipticæ peripheriam , sicut terra per polos ; atque adeò faciat cum ipsâ vnum veluti continuum : Neque à medio , per illius diuisionem ( quæ ipsi facillima est , tum propter subtilitatem medij ; tum quia medium illud eodem ferè cum illa motu mouetur ) multùm impediatur. Ergo fascia Solis ad Occidentem voluitur paulò lentiùs , quàm Firmamentum.

Hinc oritur , vt Apogæum Solis , & Perigæum , promoueant in consequentia signorum. Est enim in fasciâ Solis punctum , siue certa pars , quæ sit Apogæum Solis , nempe maximè distans à centro mundi : & certa pars illi opposita , quæ sit Perigæum , nempe mundi centro proxima. Hæ partes , quia vnâ cum suo toto mouentur ad Occidentem lentiùs , quàm Firmamentum ; promouent in consequentiâ signorum ; atque adeo Solis Apogæum , quod nunc est in  
sexto

sexto gradu Canceri, signi non syderis, post aliquot annos erit in septimo, & post mille centum & sexaginta erit in sexto gradu Leonis.

#### XIV. A S S E R T I O.

MERCVRIVS, Venus, Mars, Iupiter & Saturnus, lentiùs mouentur ad Occidentem, quàm Firmamentum, nisi pellantur à Sole versùs Occidentem. Probat, quia conuenit illis aliqua resistentia, quæ non conuenit Firmamento, nempe grauitatio, & leuitatio: Descendunt enim, & ascendunt. Præterea, quò grauiores sunt, eò minùs celeriter feruntur à Medio vehente: quod patet in lembis minùs onustis, qui feruntur eò, cæteris paribus, celerius à fluuio vehente, quò minus graues sunt.

Additum est, *nisi pellantur à Sole versus Occidentem*. Quia quando præcedunt Solem ex Oriente in Occidentem, celerius ad Occidentem mouentur, quàm Firmamentum. Quod enim mouetur à duobus principiis ad eundem terminum, celerius mouetur, quàm si ab vno moueretur. Saturni diurna mora est duo-

rum minutorum : Iouis 5. Martis  $31\frac{1}{2}$   
Veneris , & Mercurij vnus circiter gra-  
dus.

## XV. A S S E R T I O.

STELLÆ & Planetæ dum vehuntur à Firmamento, & Medio, ad Occidentem, mouentur etiam ad alterum Polorum. Vt probetur hæc Assertio,

Notandum primò solidis mundi corporibus ipsum immediatè componentibus locum naturalem, ac determinatum in mundo spatium, conuenire, extra quod naturaliter esse, vel operari, non possint, velut membra Microcosmi in corpore. Ratio est, quia corpora omnia solida mundum immediatè componentia pendent inuicem in esse & operari, sicut membra microcosmi. Ergo habent in mundo locum, & spatium determinatum, in quo sint & operentur, sicut membra in suo corpore.

Notandum secundò. Quemadmodum in corpore humano sunt membra quædam primùm duplicata, deinde multiplicata, v. g. brachia primùm, deinde digiti : sic in mundo sunt primùm duæ partes laterales, & æqualiter diuisæ, non



per *Æquatorem*, qui diuidit mundum in duas partes æquales ad angulos axi mundi rectos; sed per *Eclipticam*, quæ duas in partes diuidit mundum, prout illius *Eclipticæ Peripheria* in *Firmamento* (quod est igneorum, quales sunt stellæ & planetæ, locus) respondet *Zonæ*, seu fasciæ *Solis*, qui fons est omnium igneorum. Deinde partes illæ duæ *Firmamenti*, singulæ multos in circulos, hoc est, in multorum circulorum peripherias, tanquam multa, vt mox dicetur, stellarum, & planetarum loca propria, & circularia diuiduntur.

Notandum tertio, *Firmamentum* ita esse locum igneorum solidorum immediate mundum componentium, vt secundum aliquas partes sit aliquorum locus determinatus, & secundum alias, aliorum. Nam, quemadmodum omnia corpora locum occupantia sunt ordinata, & locata, in mundo: hæc autem, aut illa; in hac, aut illâ mundi parte: sic omnia ignea sunt in *Firmamento*, seu respiciunt *Firmamentum*, vt locum seu terminum suæ lationis rectæ; hæc autem & illa ignea respiciunt, vt locum naturalem, hanc aut illam partem Fir-

mamenti ; non punctum, sed lineam circula-  
rem ; hoc est peripheriam circuli,  
quem possident in mundo : Quia Firma-  
mentum mouetur absque interruptione,  
& magnâ celeritate, circulariter, atque  
adeo per vnum punctum, siue vnam, &  
eamdem partem, respondere non po-  
test corpori minùs celeriter moto : Er-  
go per lineam circulaem ; non simul,  
sed successiuè. Firmamentum enim dum  
circulariter mouetur, facit, vt, quod  
punctum, seu quæ pars determinata in  
ipso, responderet corpori inferiori tan-  
quam locus adæquatus, si, vel non mo-  
ueretur, vel moueretur æquali celerita-  
te, ipsi moto magis, aut minùs, celeri-  
ter, non respondeat ampliùs tanquam  
punctum, vel certa pars adæquata, sed  
tanquam linea circularis, hoc est, peri-  
pheria circuli, in quo est illud corpus,  
quod dicitur habere locum in Firma-  
mento propter naturam suam igneam.  
Habent igitur illa corpora ignea, pro  
suis locis in Firmamento, circulorum  
suorum peripherias, & pro spatio, extra  
quod nunquam, nisi adsit impedi-  
mentum, vagentur in mundo ( sicut membra  
Microcosmi locum in suo corpore, ex-

tra quem nunquam sint in corpore) suum circulum, cuius peripheria sit in Firmamento, cui semper adhæreant, siue leuitate, siue magnetismo; quemadmodum singula membra microcosmi suam habent in cerebro parrem, à quâ distribuyente spiritus animales per nervum moueantur, & cui semper adhæreant.

Hi autem circuli, seu viæ & loca, stellarum, & planetarum; quia sunt igneorum corporum; Solis, quo nihil est in toto mundo magis igneum; circulum imitantur: vel sunt ipse circulus. Hic autem Solis circulus declinans ab vno Polo, siue Tropico, ad alium Polum, siue Tropicum, vt toti mundo suam virtutem impertiat; Æquatorem secatur æqualiter in duobus punctis oppositis. Ergo circuli propria igneorum corporum loca, siue spatia, in mundo, Solis circulum imitantes, eique, vt plurimum aliquâ saltem ratione, paralleli, suo ad Occidentem motu declinabunt ab vno Polo ad alium.

Notandum quartò, Firmamentum, quia maximus est, vniuersalissimus, ac potentissimus, totius mundi magnes (vt



patet ex acu magneticâ, quæ libera, licet posita in terris, hoc est in eâ distantia, quæ est inter Firmamentum, & globum terraqueum; Polos tamen Firmamenti semper aspicit) sibi planetas saltem per circuli, in quo sunt, peripheriam, quantum potest connectere: in ipsâ enim datur virtus magnetica respondens virtuti magneticæ, quam per ipsorum circulum, eorum quoque magnetismum deferentem, dispergit Firmamentum.

His prænotatis Assertio sic probatur. Quod, dum vehitur ad Occidentem à Medio, & à sui in Firmamento peripheriâ circuli ad Polos inclinati, modò vni, modò alij, talis peripheriæ puncto, seu parti certæ responder, fertur ad alterum polorum. Stellæ & Planetæ sunt huiusmodi. Ergo dum vehuntur ad Occidentem à Medio, & Firmamento, feruntur ad alterum Polorum. Maior est euidens: Idem enim est, stellas ac planetas ad Occidentem vehi à Medio, & Firmamento; & vehi à sui circuli peripheriâ. Quod verò quicquid per talem motum, modò vni, modò alij, talis peripheriæ puncto, siue parti, responder, à polo ad

polum moueatur; ex eo manifestum est, quòd in illâ peripheriâ non sit repetire duo pũcta immediata, quæ distent æqualiter ab vtroque polo. Quod igitur modò vni, modò alij puncto responderet; inæqualiter se habet successiuè ad polos, hoc est, accedit ad vnum recedendo ab altero. Quod enim ad alterum mundi polorum, de quibus hîc est sermo, accedit; recedit ab altero; & vice versâ, quod ab vno recedit, accedit ad alterum.

Minor etiam patet ex dictis: neque enim potest peripheria circuli celerius, quàm stella, ad Occidentem moueri, quin stella respondeat successiuè diuersis punctis peripheriæ.

Per circuli peripheriam in Firmamento hîc intellige locum circularem & magneticum, stellarum & planetarum in Firmamento: non locum immobilem, adæquatum & contiguum, qui definitur *superficies corporis continentis, immobilis*. Intellige ergo peripheriam physicam, siue circulare spatium in Firmamento, cui respondent semper, ac subsunt, stellæ, & planetæ, nisi adsit impedimentum.

## XVI. ASSERTIO.

STELLÆ sunt vicinæ Firmamento, quantum naturaliter potest solidum corpus esse vicinum alij solido. Ratio est, quia post Solem alligatum suæ Zonæ, ipsæ sunt corpora maximè ignea. Dixi, *Firmamento vicina*, non autem contigux: quia mediat fluidum corpus, siue æther, siue aqua cælestis, inter stellam & Firmamentum: sunt enim stellæ infra Firmamentum, sicut saxa ingentia super terram, à quâ solùm, vel aëre fluido, vel aquâ tenuissimâ, diuiduntur.

## XVII. ASSERTIO.

PLANETÆ sunt remotiores à Firmamento, quàm stellæ. Ratio est, quia sunt magis graues, vtpotè magis terrei, & minùs ignei.

## XVIII. ASSERTIO.

INTER Planetas alij sunt aliis à Firmamento remotiores. Probat. Quia sunt aliis alij grauiiores, tenéntque me-



dium aliis alijs subtilius: Medium enim, quô magis recedit à terrâ, eô subtilius est, excepto spatio, quod à Firmamento refrigeratur.

## XIX. A S S E R T I O.

ALI I etiam, quàm Firmamento, corpori adhærent magneticè nonnulli planetæ. Ratio est, quia corporis aliûs virtutem magneticam participant: atque adeò ad illud accedunt, nisi virtute aliâ detineantur. Sic satellites Saturni mouentur magneticè à Saturno; Iouis à Ioue, à polis Terræ, Luna. Est etiam probabile Mercurium & Venerem eâdem ratione fasciæ Solis adhærere. Ex illis autem adhæssionibus variantur motus illorum satellitum, & Lunæ maximè: quæ circa suum Apogæum fertur ad Occidentem celerius, quàm circa suum Perigæum; nunquam tamen est retrograda; quia nunquam fertur ad Occidentem celerius, quàm Firmamentum. In Apogæo verò ad Occidentem fertur celerius quàm in Perigæo: tum quia ibi vicinior est vehenti, nempe Firmamento, à quo pender mo-

tus in Occidentem : Tum quia est in medio subtiliori, & viciniori Firmamento, atque adeò magis ad Occidentem moto. At quando est circa suum Perigæum mouetur lentius : tum quia remotior est à vehente, & vicinior immobili: tum quia in Medio est minùs subtili, & minùs ad Occidentem moto. Quò enim, cæteris paribus, à Firmamento est remotius Medium, eò lentius ad Occidentem fertur.

## XX. A S S E R T I O.

Quò celerius ad Occidentem vehitur stella, vel planeta, eò lentius mouetur ad Polum, hoc est, eò minùs promouet in consequentiâ signorum : Quò verò lentius mouetur ad Occidentem, eò celerius mouetur ad Polum, seu magis promouet in consequentiâ signorum. Probatur Assertio. Quò plura versus Orientem stella, vel planeta, in sui circuli peripheriâ mutat puncta, seu maius spatium, æquali tempore; eò celerius mouetur ad alterum polorum, seu magis promouet in consequentiâ signorum. (nam planetam mutare puncta suæ pe-

ripheriæ in Firmamento versùs Orientem, & promouere in consequentia signorum, idem sunt) & contrà, quò pauciora, pari tempore, mutat puncta, eò celerius mouetur ad Occidentem; quia magis vehitur à vehente in Occidentem, ab vnâ scilicet parte Firmamenti, cui magis adhæret, seu quam minùs mutat; adeoque cuius motum magis participat.

Hæc assertio intelligenda est de motu, quatenùs est à Firmamento per Medium: non autem prout ab aliis principiis, nempe grauitate, & Sole, variatur. Posset enim per Solis pulsionem lateralem magis accedere ad polos absque maiori celeritate, vel tarditate versus Orientem.

## XXI. A S S E R T I O.

Ab ingressu in Arietem vsque ad ingressum in Libram plures ad Occidentem Sol facit conuersiones (septem & aliquid ampliùs) quàm ab ingressu in Libram ad ingressum in Arietem. Ratio est. Quia maior est Zonæ secantis Æquatorum in duobus punctis portio, quæ nunc subest Arieti, Tauro, Geminis, Cancro,



Leoni & Virgini, quàm eiusdem Zonæ altera portio, quæ nunc subest Libræ, Scorpioni, Sagittario, Capricorno, Aquario, Piscibus. Ergo Sol plus temporis impendit nunc in motu suæ depastionis, quando promouet in consequentia signorum Borealium, quàm dum promouet in consequentia Australium. Ergo plures, quamdiu subest illis signis, facit, vnà cum suo Ellychnio, conuersiones ad Occidentem, quàm subiectus aliis: Nam, quô maiorem depascitur Zonæ portionem, eô plures cum illâ facit conuersiones ad Occidentem. Cùm enim ipsa fascia eundem seruet tenorem comparata cum depastione Solis; quæ non est minùs æquabilis; Quæ erit proportio totius Zonæ ad totam, siue annuam, depastionem; eadem erit partis Zonæ ad partem depastionis. Ergo maioris Zonæ partis longior erit depastio. Ergo conuersiones ad Occidentem plures in illâ maiori parte, quàm in alterâ minore. Ergo plures quoque in Sole conuersiones ad Occidentem; quia longior est depastio, cùm sit depastio maioris portionis. In hac probatione dixi *nunc*, quia quando Apogæum Solis (à

quò medio inter tria priora & tria posteriora signa, pendet maior Zonæ portio) fiet medium inter alia signa; maior Zonæ portio erit sub illis signis, atque adeò plures singulis annis ad Occidentem conuersiones.

## C A P V T IV.

*Varia colliguntur ex Ellychnio Solis.*

**Q**UÆ veritates ex Ellychnio Solis supra constituto colliguntur, ex probant eius existentiam.

I. Constituit in mundo principium totius motûs circularis qui à propriâ naturâ esse non potest: Nam, quicquid mouetur in loco; mouetur ab alio: vel enim ille locus est naturalis per propriam naturam, vel non est: Si est naturalis, principium intrinsecum non determinat ad motum, sed ad quietem in loco: Si nō est naturalis, ipsum corpus est extra locum naturalem. Ergo per principium intrinsecum determinatur ad motum per medium, quod est intra locum, in quo detinetur, & locum naturalem, ad quem determinatur à propriâ naturâ. Ergo per

naturam propriam non determinatur ad motum in loco. Ergo determinatur ab alio: Et istud aliud est respectu Firmamenti fluxus à Sole depascente suum Ellychnium. At motus iste circularis, quia est à principio intrinseco mundo, mundo naturalis est.

2. Explicat generationem successivam Solis, siue educationem ex pabulo versùs Orientem, quæ naturalis est Soli per actiuitatem propriam, & naturalem, dispergenti suorum spirituum vnionis impedimentum. Hac depastione, seu generatione, seu educatione, quæ fit in loco, vbi est pabulum, Sol sequitur Ellychnium suum versùs Orientem dispositum, vt flamma candelæ suum, siue candelam, deorsùm. Ipsa enim Zona, seu fascia, seu Ellychnium Solis, dum voluitur in Occidentem, siue à Deo in primâ sui constitutione (dum, vt canit Ecclesia, *Solis primum accendit rotam*, relinquens aliquod Zonæ spatium versùs Occidentem vacuum pabulo) siue à Firmamento, post illam primam constitutionem; determinat Solem ad depastionem versùs Orientem; sic enim Soli pabulum depascenti occurrit.



3. Declarat fluxum Solis ad Firmamentum à propriâ leuitate, per Medium subtilissimum, & naturâ suâ sursùm tendens, nempe aërem cælestem igneis spiritibus refertissimum.

4. Facit euidentem motum Solis ad Occidentem, nempe vnâ cum suo Ellychnio, quod à Firmamento semper voluitur ad Occidentem eo modo quo flamma candelæ transfertur, eò quò transfertur candela.

5. Motum Solis ad eundem cum Firmamento Meridianum versus Orientem facit tardiozem vno circiter gradu singulis diebus motu Firmamenti; flamma enim Solis depascens in Ellychnio pabulum, conuertitur in Orientem, vt modò dictum est.

6. Infert motum Solis annum à Tropico ad Tropicum per Æquatorem pabulum suum in Zona illa sic dispositâ sequentis, & successiuè depascentis: ac perpetuitatem Solis in orbem continuò renascentis: Dum enim Zonæ suæ partem pabulo foetam, & grauidam flammâ suâ circumdat, etiam quâ terram aspicit (quod patet in flammâ candelæ inclinatæ, cuius Ellychnium etiam parte suâ

in Terram versâ , flammâ circumdatur )  
 aliâ ex toto mundo, & præcipuè, vt probatum est quæst. 2. ex infero, pabulum colligunt , ac præparant, & sic Solem perennant.

7. Facile est inferre ex illo motum Macularum Sole celerius ad Occidentem motarum : Sunt enim Maculæ fuligines aqueæ, & terreæ, crassiores, quæ ex flamma Solis respicientis Orientem decidunt, & sub Solis basi, quæ sola nobis apparet, positæ mouentur à Medio Zonæ contiguo, & in Occidentem moto, versûs Occidentem, sicut à ventis in mari mouentur spumæ. Nam quod Mari sunt spumæ, hoc sunt Soli maculæ : Nam quemadmodum primò spuma est aër aquæ permistus, & ex aqua segregatus : ita macula est terra igni permista, & ex igne segregata. 2. quemadmodum spuma est alba, quia est aërea : ita macula est nigra, quia terrea. 3. quemadmodum locus spumæ est inter aquam, & aërem; quia leuior est aquâ propter aërem, & grauior aëre propter aquam; adeoque incubat mari: ita locus maculæ est inter ignem, & aërem, quia leuior est aëre propter ignem, & gra-

uior Ignē propter Terram: atque adeo iungitur Soli. 4. Quemadmodum per maris fluctuum motum coniūguntur, & separantur spumę: Ita per Solis fluctuum motum coniunguntur & separantur maculę. 5. Quemadmodum aliquando, quod medium est in spumâ, resoluitur in aquam, oris seu marginibus integris; ita quod medium est in macula soluitur aliquando in faculam siue ignem, oris, seu marginibus integris.

Dum vehuntur ad Occidentem à Medio Zonę Solis contiguo maculę, Solem pabulum suum Orientem versus sequentem præcedunt, ac tandem intra dies 13. & aliquot horas euanescent ex oculis nostris extra Solis basim positę: atque, vel in vnum coagulatae fiunt Cometę, vel per motum Medij disperguntur, & per proprium tendunt ad Polos & Terram.

8. Declarat Elementorum circulationem. Spiritus enim ignei erumpentes ex Sole, vehentésque secum terreos, & aqueos, faciunt, quod ignis apud nos facit in Vase distillatorio, quod vocant Alembicum, cuius in summo refrigerantur humidi spiritus, & in aquam edu-



cuntur: Hi enim aquei spiritus & terrei, vt suprà dictum est, à Firmamento denso ac naturâ suâ frigido refrigerati, & per secretionem igneorum, & aëreorum, à quibus fursùm vecti sunt, aliò commeantium, condensati, partim recidunt in subiectam Solis fasciam, partim disperguntur per motum Firmamenti ad loca minus calida: vnde ad Polos mundi, tanquam ad locum magis connaturalem feruntur ex omni parte. Quod enim vehitur aliò quàm ad locum naturalem, semper quantum potest à vehente recedit. A Zona ergo torridâ vehente partim recedunt hi spiritus terrei & aquei, & ad frigidam Polorum mundi regionem dispersi, & modo suprà explicato, magis condensati, ex regione magis vicinâ Polaris cælestibus ad Terræ Polos descendunt, ibique iacturam à Sole, & astris fursùm euocantibus exhalationes & vapores, in globo terraqueo factam resarciunt: Partim etiam ad Solis fasciam redeunt.

Hinc oritur 1. vt appareat in cælo, & maximè circa Polos, color cæruleus, qui verus est aquarum color, vt patet in mari. 2. Vt stellæ in aquis illis positæ scin-

tillent: inæqualiter enim propter multam  
occurrentiam feruntur aquæ illæ cælestes,  
& ex hoc motu per refractiones, & re-  
flectiones varias oriuntur scintillationes. 3. Vt regiones polis terræ vicini-  
ores totæ sint roridæ, ac nubilæ.

9. Ex illo Ellychnio potest inferri mo-  
dus, quo Sol dum illud suum sequitur  
Ellychnium per depastionem, facit Pla-  
netam Apogæum, & quinque superio-  
rum motum directum, retrogradum, &  
consequenter stationarium. Quia tamen  
ista consequutio minus clara est. Ad hu-  
ius euidentiā,

Primò. Duæ partes in Sole & Plane-  
tis sunt considerandæ: superior, quæ  
Firmamentum respicit, & inferior, quæ  
terram: In Sole superiorem vocamus  
Apicem, inferiorem, Basim: In Plane-  
tis superior sit aërea; inferior terrea:  
quæ, vt patet ex telescopia, in Luna,  
Marte & Ioue, cavitatibus & eminentiis  
aspera est. Idem esto iudicium de Vene-  
re & Mercurio, in quibus propter vici-  
niam Solis videri non possunt: De Sa-  
turno item in quo propter distantiam  
non apparent.

Solis basim Luna semper aspicit per

aëream suam partem, quando filet, in coniunctione: per terream quando plena est in oppositione.

Mercurius & Venus per aëream respiciunt Basim Solis in Perigæo: per terream Apicem in Apogæo.

Mars, Iupiter, & Saturnus per suam terream respiciunt Basim Solis in Perigæo, Apicem in Apogæo.

Secundò: Planetæ nunquam mouentur ab Occidente in Orientem, sed semper ab Oriente in Occidentem sicut & Sol. Luna semper mouetur lentiùs quàm Sol: Mercurius, Venus, Mars, Iupiter & Saturnus, modò lentiùs, modò celerius, quàm Firmamentum: aliquando pari celeritate.

Planetæ aliquando simul occidunt, & simul oriuntur cum Sole: aliquando priùs, aliquando posteriùs: Luna, Mars, Iupiter & Saturnus aliquando Sole oriente occidunt, oriuntur aliquando Sole occidente. Planeta quando priùs oritur, & occidit, quàm Sol, dicitur præcedere, quando posteriùs, dicitur subsequi.

3. Notandum est spiritus solares, & quàm lucidos, & quàm igneos, ex flammâ Solis erumpere, in omnem quidem par-



tem, sed multò magis in superam, quàm in alias: Quia leuitate naturali sursum erumpunt, ac pelluntur: In alias autem solùm pelluntur: illud experimur in nostrâ flammâ.

Porro illa tum eruptio, tum pulsio, quò suo principio vicinior est, eò maior est, ac vehementior: Quò verò maior; eò vehementiùs aërem circumstantem commouet, ac pellit: ac simul quæcumque in illo posita sunt: eoque faciliùs, & efficacius, quò subtilior est ille aër, & mobilius, quod in illo est. Aër quidem, in quo positus est Sol, & Planetæ, valde subtilis est: Quæ verò in illo posita sunt, nimirum Planetæ, valde mobilia: & eò mobilia, quò leuiora, vt patet ex plummâ in aëre nostro volitante: quam flatus vel minimus à flante propellit, nisi aliunde retineatur. His consequens est à Sole propelli Planetas, prout occurrunt. Nam ex parte Solis, tum eruptio, tum pulsio spirituum igneorum, siue Solarium, magna est, ac vehemens; continua item, & constans: Ex parte verò Planetarum magna est mobilitas. Ipsi enim, vt dictum est, in Medio sunt valde subtili, ab Eclipticæ Peripheriâ in Firmamento ma-

gnetico influxu , velut fune , suspensi : & leues , adeoque facilè mobiles in omnem partem , nisi retineantur aliunde.

Certè , si plumbum longo fune appensum in aëre tranquillo tam facilè dimouetur à lineâ directionis , nonobstante sua grauitate ; vt semel ab illâ paulô longius dimotum per vim extrinsecam , & postea sibi relictum , moueatur plusquam quadraginta horis continuïs ; expulsio Planetarum à Sole per spiritus Solares negari non potest.

Mouetur autem plumbum : quia per suam grauitationem premit aërem , in quo mouetur , & ex ipso exprimit , separatque ignem , à quo subsequente pellitur : vt fit in motu proiectorum. Quem vt intelligamus , concipiamus tubum vnus pedis , rotundum , & æquabilem , cuius diameter sit trium digitorum , dilatatâ , & minimùm constrictâ spongiâ tubus ille repleatur : tum diuidantur per longitudinem , tubus , & spongia in duas partes æquales : & super alteram spongiæ partem funiculus , cui globulus vnus digiti sit appensus , ita constitutur , vt post restitutionem illarum partium in vnum tubum spongiâ plenum ,

filum sit medium : trahatur autem per mediam spongiam aquâ plenam sic, vt per eam sequatur globulus. Per tubum ita constitutum sic mouebitur globulus, vt ante se, & ad latera comprimât spongiam, & aquam ex illâ exprimat, quæ à spongiâ separata globi penetrantis occupet locum, & ipsum consequatur.

Globulus comparatur Proiecto: Spongia aquâ tumida Aëri spiritibus igneis referto : Aqua ex spongiâ expressa, & sequens, Igni ex Aëre expresso, & sequenti. Hæc obiter.

Dico Planetas à Sole pelli, non rotari. Falsum enim est, quod docent Copernicani, à Sole conseruante suum locum, & circa centrum suum conuerso (quam conuersionem falsò concludunt ex motu macularum, vt patet ex not. 7.) Planetas circumduci. Est enim ea radiorum Solis æquabilitas, & æquiualentia, vt pellere quidem; at non rotare, siue circumducere, queant. Præterea, vt quem volunt rotatum Solem imitentur Planetæ, ipsi quoque circa suum centrum voluerentur: Quod est contra Phases Lunæ, & Iouis.

His prænotatis, & magneticâ Plane-



tarum alligatione Solis Eclipticæ Peripheriæ in Firmamento ad Occidentem moto, præsuppositâ; Directio, Statio, regressus, & Apogæum ipsorum, facile explicantur.

Mercurius & Venus quando simul oriuntur & occidunt cum Sole, Perigæi sunt vel Apogæi.

Mars, Iupiter & Saturnus, quando simul oriuntur & occidunt cum Sole, sunt Apogæi: quando Sole occidente oriuntur, & oriente occidunt, sunt Perigæi.

Luna in Plenilunio & Nouilunio est Apogæa: & in loco illo naturali, qui per ipsius leuitatem intrinsecam ipsi conuenit: indéque minùs à Terra trahitur deorsum; quia leuigatur Solis radiis, quos Coniuncta totâ superâ excipit facie, Opposita verò totâ inferâ: quæ, cùm sit cavitatibus, & eminentiis, aspera; Solis radios accipit, eosque congregat. Hoc posterius habet etiam locum in aliis Planetis. Ipsi enim per inferam seu terream faciem excipientes Apicem Solis, leuigantur, ascendunt, ac fiunt Apogæi. Luna verò fit Apogæa Soli opposita, & coniuncta: Quia tunc minùs à Terrâ trahitur.

Venus & Mercurius sunt Perigæi propter grauitatem intrinsecam, quæ minùs impeditur à Sole supero, quàm infero. Descendunt enim per medium rarum pro sua grauitate. Mars verò Iupiter & Saturnus Perigæi sunt oppositi, quia nimis distant à Sole, & quidem agente solùm per Basim, cuius actio multò minor est quàm Apicis, vt dictum est, atque adeo pro sua grauitate viciniore terræ sunt.

Luna perigæa est in Quadraturis, quia per latera minus excipit, minúsque congregat radios quàm per superam & inferam partem: adeoque Terræ deorsum trahenti minus resistit; proindéque descendit.

Planeta Sole superior circa suum Apogæum lentius mouetur, quia retinetur à Solis Apice ipsum peruadente & remorante, quia sursum mouet. Vide sect. 18. Analogiæ 5. pag. 36.

Luna verò celerius: tum quia vicinior est mouenti, tum quia minus retinetur à Terra.

Planetæ superiores, quò remotiores sunt à Sole, hoc est Perigæo viciniore, cò celeriores sunt ad Occidentem; quod

est, esse retrogrados, vt suprà dictum est. Quia quô sunt Perigæo viciniore, eô naturaliori sunt in Medio; Ergo minùs grauitant; Ergo minus resistunt Firmamento per Medium mouenti ad Occidentem. Ergo celerius ipsos mouet Firmamentum, quàm stellas ipsas, minùs enim tum resistunt mouenti ad Occidentem ipsi, quàm stellæ, quæ leuitant. Præterea, vt dictum est modò, pelluntur in Occidentem à Sole subsequente versus Occidentem: Et sic illius motûs est duplex principium, atque adeò celerior ipse est motu Firmamenti communicantis suum motum, quia tali communicationi aduenit à Sole pulsio in Occidentem. Superior Planeta in Statione sua, vel ascendit leuigatus à Sole accedens ad Apicem, vel descendit ab eo recedens per grauitatem: Ergo lentius mouetur, quàm in Perigæo, vbi neque leuitat, neque grauitat: Celerius autem, quàm in Apogæo: Quia minùs à Solis Apice retinetur.



## CAPVT IV.

*Phænomenorum Planetarum, de quibus  
inter Astronomos conuenit, causæ  
Physicæ ex suprâ dictis.*

### SECTIO I.

*Nonnulla præmittuntur ex dictis.*

**P**LANETÆ omnes magneticè pendent ab Eclipticæ peripheriâ in Firmamento, ipsique pro sua leuitate & grauitate magis aut minùs propinqui sunt, siue magis aut minus ab ea remoti.

Per Medium ab Oriente ad Occidentem motum à Firmamento mouentur ad Occidentem; eòque, cæteris paribus, celerius, quò Medium est Firmamento vicinius.

Naturalis Planetarum in Mundo locus est Apſis ima, siue Perigæum, hoc est minima ipſorum à Terrâ distantia. Ratio est, quia non apparet vllum corpus extrinsecum, à quo deprimantur: Ergo mouentur à grauitate propriâ deorsum. Naturalis autem grauium in mundo lo-

cus est is, ad quem ipsa feruntur à propriâ grauitate. Non pelluntur à Sole deorsum: quia, quæ ab ipso pelluntur, etiam leuigantur: atque adeò non per pulsionem, sed per grauitatem descendunt.

Planetæ, quando mane ante Solem oriuntur, appellantur Orientales, & matutini: Occidentales verò, & vespertini, quando vesperi oriuntur. Orientales præcedunt Solem, versus Occidentem: Occidentales, subsequuntur.

Planetæ sunt minùs, quàm Firmamentum, celeres ad Occidentem. 1. Quia mouentur ad motum Medij, quod, cæteris paribus, eò minùs participat motum vehentis, quò remotius est ab illo. 2. Quia vel ascendunt, vel descendunt. 3. Quia nonnunquam retardantur à Sole præcedente.

Sunt aliquando celeriores ipso Firmamento, nempe, quando Solem versus Occidentem præcedunt: ab eòque versus Occidentem pelluntur.

Planetæ mouentur in longitudinem, hoc est ad Septentrionem & Meridiem. Quia pendent ab Eclipticæ per vnam sui partem mediam, declinantis ab

Æquatore ad Septentrionem; per alteram ad Austrum, peripheriâ.

## SECTIO II.

### *Phænomenorum communium causæ.*

1. PLANETÆ, nunc in his, nunc in illis Horizontis locis oriuntur, & occidunt, & sub Meridiano, nunc altius in Boream; nunc humilius in Austrum attolluntur. Ratio. Quia pendent, modò ab hâc, modò ab illâ parte Eclipticæ, cuius varix partes variis Horizontis partibus respondent propter declinationem ab Æquatore ad Polos.

2. Nunc lentius, nunc celerius mouentur ad Occidentem. Ratio. Quia motus illorum nunc iuuatur, nunc impeditur à Sole, vel alio corpore.

3. Aliquando maiores, aliquando minores apparent. Ratio. Quia sunt aliquando propiores nobis, aliquando remotiores. Sunt propiores non leuigati à Sole: remotiores, ab ipso leuigati, & sursum eleuati.

4. Configurantur variè, tum inter se; tum etiam cum fixis, atque adeò supe-



riores ab inferioribus, & stellæ, interdum teguntur. Ratio. Quia pendent successiuè à punctis Eclipticæ diuersis, & modò in hanc, modò in illam partem à Sole depelluntur.

### SECTIO III.

#### *De Phenomenis Solis.*

1. SOL occidens habet conspicuas stellas post se occasuras, quæ aliquot post dies appareant. Ratio. Quia dum fertur ad Occidentem à suâ fasciâ cum stellis, & Firmamento; mouetur etiam ad Orientem per depastionem: atque adeo lentius in Occidentem, quàm stellæ.

2. Tendens ad Autumnale Æquinoctium à verno insumit dies 187. & ab autumnali in vernum nonnisi 178. Ratio. Quia fascia secundùm signa Borealia est remotior à centro mundi, quàm secundùm Australia.

3. Sol patitur Eclysin respectu Terræ. Ratio. Quia Luna media est in quibusdam Nouiluniis inter ipsum, & Terram.

4. Decrescit latitudo eius tam in Austrum, quàm in Boream, vt docet Gas-

tendus. Hoc si verum est, etiam consequenter dicendum fasciam illius minùs declinare nunc ab Æquatore. Et hoctribuendum erit mobilitati fasciæ, per quam possit, modò magis, modò minùs, inclinari.

## SECTIO IV.

### *De Phanomenis Lune.*

1. **LUNA** singulis diebus 12. gradibus, & aliquot minutis lentiùs quàm Sol mouetur ad Occidentem. Ratio. Quia nimis distat à Firmamento. Distat autem, quia grauis est.

2. Variis apparet phasibus. Ratio. Quia nunc magis, nunc minùs illuminatur à Sole sic, vt eius reflexio ad nos perueniat.

3. Patitur Eclipsin. Ratio. Quia terra ponitur inter ipsam & Solem, idque non alio tempore, quàm plenilunio, licèt non omni.

4. Digreditur in Austrum & Boream. Ratio. Quia huc à Boreo, illuc ab Austrino Terræ Polo trahitur. Et quia veniens ab Oriente in Occidentem à Polis

trahitur, ideò Nodi, siue sectiones Eclipticæ progrediuntur in antecedentia: Et quidem singulis diebus à postrema sectione receditur paulò ampliùs quàm tribus minutis; cui consequens est vt post annos 19. redeatur ad idem punctum v. g. principium Arietis.

5. In Pleniluniis, & Nouiluniis mouetur ad Occidentem Luna celerius, quàm in Quadraturis. Ratio. Quia tunc est propior Firmamento: propior autem: per propriam leuitatem; & minùs à Terræ polis per magnetismum detenta.

His consequens est in Pleniluniis, & Nouiluniis Lunam esse Apogæam, & in Quadraturis Perigæam.

## S E C T I O V.

### *De Phanomenis Mercurij, & Veneris.*

I. V E N U S, & Mercurius duodecim mensibus absoluunt suam periodum sub Zodiaco. Ratio. Quia mouentur à Medio & Firmamento eâdem cum Sole celeritate, quantùmque à Sole subsequente pelluntur in Occidentem; tantùm ab eodem præcedente repelluntur in Orien-



Orientem, & Solis apice retardatur illorum motus in Occidentem.

2. Venus & Mercurius à Sole semper distant. Ratio. Quia semper à Sole depelluntur.

Maxima Veneris à Sole distantia est. 45. graduum, Mercurij vix triginta.

3. Venus & Mercurius faciunt circuitum circa Solem; hoc est, modò sunt ipso superiores; per Solis radios, à quibus leuigantur, & fursùm ascendunt: modò inferiores per propriam grauitatem, ratione cuius descendunt: modò magis Austrini, modò magis Boreales: Quia, vel Sol ipsos depellit ad latus: vel signū, in quo sunt, magis ad Austrum vel Boream, quàm Sol deflectit: modò magis Orientales, nempe quando oriuntur ante Solem, vel magis Occidentales, nempe quando post Solem occidunt.

Porro Venus absoluit suum circa Solem circuitum nouem mensibus; Mercurius quatuor.

4. In omni coniunctione cum Sole sunt Apogæi, vel Perigæi: Apogæi, quando mediat Sol inter ipsos, & Terram: Perigæi, quando ipsi mediant inter Solem, & Terram; Ratio. Sunt Apogæi:

Quia fiunt propiores apici Solis, ubi leuigantur, & ascendunt. Sunt Perigæi: Quia recedentes à Solis radiis perdunt leuitatem extrinsecam, siue aduentitiam: & mouentur ad locum naturalem infra Solem à grauitate naturali, & insitâ.

## SECTIO VI.

*De Marte, Ioue, & Saturno.*

1. Mars, Iupiter, & Saturnus celerius mouentur ad Occidentem, quàm Venus, & Mercurius, atque adeò quàm Sol. Ratio. Propiores sunt vehenti, nempe firmamento, quàm Venus, & Mercurius: Ergo medium, in quo sunt voluitur celerius ad Occidentem, quàm medium in quo sunt Venus, & Mercurius. Ergo, quemadmodum, cæteris paribus, quod vehitur fluuio celeriori, seu rapidiori, fertur celerius, quàm quod vehitur fluuio minùs rapido; sic Mars, Iupiter & Saturnus ferentur celerius ad Occidentem, quàm Venus, & Mercurius: Quia vehuntur à medio celerius moto. Sol autem vehitur lentius ad Occidentem, quàm tres illi Planetæ supe-

riores; quia, licet eius fascia moueatur celerius ad Occidentem à Firmamento propter nexum magneticum sparsum per totam; ipse tamen voluitur lentiùs, quia per depastionem singulis diebus vno ferè gradu fit suâ fasciâ tardior ad Occidentem: atque adeò tardior, quàm tres Planetæ superiores.

Mars singulis diebus mouetur lentiùs quàm Firmamentum 13. tantùm minutis cum medio: Iupiter 5. Saturnus 2. Itaque totus Zodiaci circuitus peragitur in Saturno, annis Ægyptiis (qui sunt singuli trecentorum sexaginta quinque dierum) viginti nouem, & diebus 169: In Ioue, annis 11. diebus proximè 316. In Marte, anno vno, diebus proximè 322.

2. Marti, Ioui, & Saturno conuenit etiam circuitus circa Solem: hoc est, Sole, sunt modò magis Orientales; modò magis Occidentales: modò Soli coniuncti; quando nimirum Sol est inter ipsos, & Terram: modò oppositi, quando terra est inter ipsos & Solem: modò, magis Austrini, modò magis Boreales. Ratio. Mouentur ad Occidentem celerius, quàm Sol, qui singulis annis circuitum suum perficiens, annis ferè



singulis Saturnum, & Iouem: Martem octauodecimo quoque ferè mense; lustrat semel: modò præcedens illos versus Occidentem, modò subsequens; modò coniunctus, modò oppositus; modò minùs Austrinus, modò magis; modò minùs Borealis, modò magis.

3. Mars, Iupiter, & Saturnus sunt retrogradi, directi & stationarij. Ratio. Quia versus Occidentem Solem modò præcedunt. Ergo sunt aliquando retrogradi: modò subsequuntur, & à Solis apice moventur sursum. Ergo sunt aliquando directi: modò sunt ad latera, & veluti sibi relictì. Ergo medij inter retrogrados, & directos, hoc est stationarij.

4. In Apogæo sunt coniuncti: In Perigæo, sunt oppositi. Ratio prioris. Quia leuigantur à Sole vicini eius apici. Posterioris. Quia recedentes à Solis apice redeunt ad suam grauitatem naturalem. Sic oui testa Maij rore plena Soli opposita sursùm fertur: extra Solis radios descendit.

## QVÆSTIO IV.

*Utrum Globus Terraqueus moueatur  
motu locali.*

**H**ic est quæstio de quarto motu, qui dicitur *latio*. Et quidem quæ toti Globo simul conueniat. Nam de moribus, qui conueniant illi per partes, non est difficultas. Hic autem agimus de Terræ quiete, quia nostrum systema supponit illam quiescere, & circa illā fieri lationes Firmamenti, stellarum, & Planetarum.

## CAPVT I.

*Globus Terraqueus non mouetur motu diurno.*

**S**VNT qui dicāt moueri motu diurno ab Occidente in Orientem, & motu annuo ab Oriente in Occidentem; & motu mixto, quo eundem ad Polos habeat respectum. Origanus, & Longomontanus ipsi tribuunt motum ab occasu in ortum circa suum centrum & axem mundi. Fundamentum huius sententiæ est nimia celeritas, quæ alioqui stellis

tribuenda esset. Præterea; quòd ex tali motu Phænomenorum certæ & constantes fiant regulæ, & per pauciora, pèrque simplices hypotheses explicentur cœlorum motus.

*Terra quies in loco probatur 1.*

QVÒD verò terra non moueatur in loco, sic probari potest. Quòd per se totum, & per omnes suas partes ( hoc est, secundùm formam & materiam ) determinatur ad quietem, & non mouetur ab alio, non mouetur in loco: atqui Terra est eiusmodi, est enim secundùm formam, & materiam, siue secundùm se totam, & secundùm omnes partes, in loco naturali, si quidem secundùm materiam, & formam, est grauior aquâ, & est sub aquâ, nèpe quia nullam habet aquam propiorum mundi centro per lineam rectam.

Neque mouetur ab alio. Quod enim mouetur ab alio, mouetur à contiguo. Quod autem Terræ contiguum est; vel est aër, vel aqua, vel aliquid in ipsis. Atqui terra nec mouetur ab aëre, nec ab aquâ: ipsa enim mouentur absque eò quod Terræ motum suum communicent, cùm plerique fluij moueantur,



sicut & venti, ad Occidentem. Neque in ipsis quidquam assignari potest, quod Terram moueat.

*Quies eadem probatur 2.*

CONFIRMATVR hæc Terræ quies experientiâ duorum proiectorum eiusdem celeritatis, quorum alterum moueatur ad Orientem, alterum ad Occidentem: vtrumque ex eodem loco per aërem terræ vicinum. Experientiam illam omnes admittunt, quam tamen cum terræ motu diurno consistere non posse, sic probo. Pars terræ, vnde mobilia duo simul, & eâdem celeritate mota; alterum in Orientem; alterum in Occidentem; recedunt æqualiter; non mouetur in Orientem: ab illa enim parte motâ in Orientem magis recedit mobile, quod mouetur ad Occidentem, quàm alterum, quod simul cum illa parte mouetur ad Orientem. Atqui ex hypothesi pars vna terræ est eiusmodi. Ergo, neque tota Terra, cum quâ illa pars est contigua & rigida.

Ad hoc argumentum respondent, qui terram moueri asserunt, cum distinctione Maioris. Pars Terræ, à quâ duo mobilia contrarios ad terminos Orientem scilicet

cet & Occidentem eâdem celeritate mota, æqualiter recedunt, non mouetur ad Orientem; Si duo ista mobilia mouentur solùm motu proprio, & non communi, seu totius Atmosphæræ; concedunt Maiorem: Negant autem si mouentur quoque ad Orientem: Et hoc contingere aiunt in hoc negotio: Nam tria illa mobilia, nimirùm pars terræ, & duo proiecta mouentur, inquit, ad Orientem motu communi, seu totius Atmosphæræ, & simul motu proprio duo illa proiecta, alterum ad Orientem, alterum ad Occidentem; quo motu recedunt æqualiter à terræ parte, vnde cœperunt moueri.

Quemadmodum, si concipiamus in longâ naui ad Orientem in fluuiio motâ, duas testudines à medio ad oppositos in naui terminos proram scilicet & puppim, incedentes, ex recedent æqualiter à parte naui mediâ, nempe motu proprio, nihilo tamen minùs mouebuntur vnâ cum naui, motu scilicet communi, seu totius naui ad Orientem. Ergo pari modo mouebuntur illa duo proiecta vnâ cum Terrâ, motu totius Atmosphæræ ad Orientem, proprio verò motu reced-

dent æqualiter à terræ parte, cui non conuenit alius,quàm totius motus,nempe ad Orientem.

*Si Terra moueretur ad Orientem, Proiectum ad Occidentem eiusdem celeritatis non mutaret locum in mundo.*

HÆC responsio supponit Terram moueri. Quòd verò non moueatur, probat illud ipsum exemplum nauis. Faciamus enim moueri nauim in fluuio versus Orientem: constituamus in ripa saxum, à quo prora nauis, dum ipsa mouetur ad Orientem, recedat: In prorâ illa constituamus mobile, quod motu communi totius moueatur ad Orientem, motu verò proprio, eiusdem cum totius motu celeritatis, moueatur ad Occidentem; hoc mobile per talem motum non mutabit distantiam à saxo ripæ, atque adeò non mutabit locum respectu illius. Quantum enim communi motu recedet, tantum accedet proprio. *Saxum* illud, seu rupes sit *Sol* qui supponitur immobilis: *Nauis* sit *Terra*, siue *Atmosphæra*. *Mebile*, quod vehitur naui, & in illâ mouetur: sit *Proiectum* versus Occidentem proprio



motu, communi autem, seu totius Atmosphæræ, versus Orientem pari celeritate motum.

Quemadmodum illud Mobile, quod in Orientem vehitur naui, & in eâ versus Occidentem proprio motu mouetur, non mutat distantiam à ripæ saxo: ita neque distantiam mutabit à Sole *Proiectum*: atque adeò neque mutabit locum in mundo: Quod certè est contra sensum.

Præterea, si proiectum versus Occidentem moueretur etiam versus Orientem, multò faciliùs & longiùs proiiceretur versus Orientem, quàm versus Occidentem; motus enim proprius versus Orientem iuuaretur à motu communi, seu totius: motus autem proprius proiecti versus Occidentem minuere-  
tur per communem contrarium; quod repugnat experientiæ.

Hoc etiam argumentum, quod sumitur ex motu maris, & plerorumque fluviorum, ad Occidentem, valet contra terræ motum ad Orientē. Nullus enim, simpliciter loquendo, fluuius moueretur in Occidentem: & ipsa Terra moueretur circa fluuium, non fluuius circa Terram:

Quod est contra sensum, & experientiam. Hoc autem sic probatur ex hypothesis diurni motus Terræ ad Orientem.

Quod per suum motum ad Orientem destruit motum maris, & fluuiorum supra Terram ad Occidentem, non mouetur ad Orientem: datur enim maris, & fluuiorum, huiusmodi motus. Atqui Terra per suum motum ad Orientem destruit motum maris, & fluuiorum, ad Occidentem. Nam, quod ita mouet mare, & plerosque fluuios, in Orientem, ut ipsa neque recedant ab Oriente, neque accedant ad Occidentem; destruit illorum motum in Occidentem: sic autem se habet Terra respectu maris, & huiusmodi fluuiorum, quos ipsa experientia, & sensus docet moueri ad Occidentem. Illos enim sic mouet in Orientem Terra, ut ipsi semper recedant ab Occidente, & semper accedant ad Orientem. Hoc totum concedent Copernicani, cum distinctione probationis maioris. Datur motus fluuiorum ad Occidentem respectu Terræ, concedent: respectu mundi: negabunt exemplo Solis, quem volumus per suam depastionem moueri ad Orientem, licet re ipsa

moueatur tantum ad Occidentem : cum ab Oriente semper recedat , accedatque semper ad Occidentem , adeoque respectu fasciæ mouetur Sol ad Orientem : respectu mundi ad Occidentem. Hoc totum admitto : & subiungo. Igitur, quemadmodum Sol , simpliciter loquendo , mouetur , non ad Orientem , sed ad Occidentem : Ita fluuius simpliciter loquendo , mouetur , non ad Occidentem , sed ad Orientem. Et quemadmodum fascia mouetur circa solem , non autem circa fasciam ; Quia Sol mouetur simpliciter ad Occidentem , & lentiùs , quàm fascia : Ita mouebitur terra , seu ripa , circa fluuium ; non fluuius circa ripam. Lentiùs enim , quàm ripa , mouetur fluuius. Quicquid autem mouetur lentiùs habet rationem permanentis ad rationem celerioris , motus verò fit circa permanentem.

## C A P V T II.

### *Terra non mouetur circa Solem.*

**C**ONTRA motum annum Terræ est enormis distantia stellarum à terra , quæ illi motui consequens est ,



esset enim plusquam octo millionum semidiametrorum terræ. In tantâ autem distantia Telescopium nil iuuaret visum, cùm tamen in viâ lacteâ, mediante Telescopio videantur stellæ quæ sine Telescopio non apparent. Quod sanè magnum est argumentum minoris quàm creditur Firmamenti à Ioue distantia; nam æquè latent, & apparent satellites Iouis, & stellæ lacteæ. Quod aliqui dicunt lacteæ viæ stellas esse longè maiores Iouis satellitibus, & quidem plusquam centies millies; illud asserunt gratis.

His rationibus hæc non levis momenti addenda est, nempe Iouem cum iisdem cavitatibus, quæ à paucis annis obseruatae sunt, semper videri. Ergo superficies infera Iouis, vbicumque tandem ipse nobis appareat, siue in Oriente, siue in Occidente, siue in medio cœlo, siue in altero suorum Tropicorum, Terræ semper obuersa est. Cùm igitur illæ cavitates semper in eâdem respectu Iouis positione appareant: necesse est, vt, vel Terra, vel Iupiter, non accedat ad Tropicos, sed maneat sub Æquatore. Si enim Terra sit in Tropico Cancris, & Iupiter in Tropico Capricorni, cavitates

illæ non apparebunt eodem modo quo viderentur, si Terra esset semper sub Æquatore. Ergo si apparent semper eodem modo, necesse est, vt Terra, vel Iupiter sub Æquatore semper sit: Hoc falsum est de Ioue: Ergo verû est de Terra. Ergo Terra non mouetur de Meridie ad Septentrionem. Idem argumentum fit de Lunæ cauitatibus quæ videntur in Terra.

### C A P V T III.

#### *Euertitur fundamentum contrariæ sententiæ.*

**N** V N C respondendum est ad id quod obiiciunt, benè & facilè explicari phænomena in illa hypothesi motus Terræ. Quasi verò non possint æquè benè explicari in hypothesi quietis illius. De duobus, quorum alterum moueatur circa alterum immotum, vtrumlibet moueatur, eædem sunt apparentiæ.

Quod aiunt non esse probabilem tantam celeritatem, facilè soluitur per tarditatem motus quorundam corporum, quæ tanta est, vt motus negetur. Et nisi

post multorum annorum seriem motus appareret, quies perpetua crederetur.

Alexandriæ, quæ Ptolomæus tanquam solida, & à motu remotissima construxerat instrumentorum cœli contemplandi fundamenta semper mouebantur, ut nunc manifestum est.

Hoc etiam magis patebit ex hac hypothesi possibili. Si Astrum lucens moueretur in Firmamento, & annorum triginta millibus absolueret conuersionem, essetque in centro mundi stylus verticalis non maior grano frumenti, faciens in plano suo umbram; Quis motum illius umbellæ posset percipere? nihilominus semper moueretur, nunquam recederet: neque ad dexteram, vel sinistram declinaret: hoc ratio facit euidens, licet sensus non percipiat.

Neque hoc miramur, quia scimus quantitatem in infinitum fieri posse minorem, atque adeò motum lentiolem.

At quemadmodum quantitas in infinitum potest fieri minor, & motus super illam in infinitum lentior, ita in infinitum fieri potest maior, & motus super illam celerior. Ad maximam enim distantiam celerissime transferri potest mo-



tus, v. g. Si quis perticam maximæ longitudinis per vnum extremum loco moueret, motum ad corpus alteri extremo contiguum tantâ celeritate transferret, vt momentaneum multi sint credituri.

Non miramur fulgorem speculi Soli oppositi, & in partem aliquam conuersi tantâ celeritate transferri, vt syllabæ momento laquearia, & tabulata etiam remotissima successiuè transeundo per medium, peruadat omnia, & negabimus tanto corpori, quantum est Firmamentum, vnicam horis viginti quatuor conuersionem?

Si daretur Globus tantæ magnitudinis, quantus est mundus nullam habens ad conuersionem resistantiam (quod Globis inter Firmamentum, & Terram, positis conuenire non potest; illorum enim partes mutant locum naturalem per conuersionem totius: quia graues sunt, & recedunt à centro mundi grauium loco naturali: atque adeò licèt totum non mutet locum per conuersionem super axem proprium, & sub illa ratione motui non resistat, ipsæ tamen partes, quia recedunt à loco naturali; motui resistunt.) Si daretur, inquam, huiusmodi  
Globus

Globus equalis mundo, nullam habens ad conuersionem resistantiam, suis insistentis polis, & musca circa alterum ipsius polum affixa ventre illi globo volaret, paruo illo tempore, quo conuersionem absolueret, ingentem illum globum totum vnâ conuersione integrâ conuolueret: hoc persuadet ratio, & celeritatem multis partibus minorem firmamento negabimus?

Huius celeritatis, & necessitatem confirmat nostrum de mundo nondum hætenus traditum systema, causâque illius physicam ostendit.

Quod etiam dicunt vnâ cum Terrâ rotam circumuolui Atmosphæram tanquam ipsi terræ alligatam; illud asserunt gratis, & contra sensum. Neque valet exemplum Nautis, quo vtuntur: Quod enim aiunt cum illâ rotam aërem transferri; verum id quidem est de naui vndeque clausa: non autem de apertâ, externôque aëri expositâ. Quæ circumstantem aërem eô minùs transfert, quo planior est, vt patet in tabulâ natante, quæ vix vllum aërem secum transfuehit. Quam tamen tabulam magis, quàm nauem, Terraqueus refert globus.

PRIMA OBIECTIO  
*contra supradicta.*

AT dices firmamentum conuertit secum ad Occidentem planetas sibi per Eclipticæ peripheriam magneticè alligatos: Ergo & Terram mouebit.

Vt respondeam præmitto per influxum magneticum, primò, & per se vniri corpora magnetica localiter, quantum fieri potest, non autem moueri circulariter, nisi consequenter, & per accidens, nempe quando non potest consistere vnio localis absque conuersione. Tunc enim, si maior sit virtus magnetica vnionis, quàm resistentia ad conuersionem; ex vnione magnetica vnus circulariter moti sequetur in altero conuersio, vt conseruetur vnio localis. At si potest vnio localis absque alterius conuersione perseuerare; poterunt vniri magneticè duo corpora, quorum alterum conuertatur, alterum maneat immotum, vt patet in lusorio verticillo, Gallicè *piroüette*; Illud enim vnitum magneticè ferro immoto magnetis armati mouetur circulariter à medio circulariter agitato.

Sic etiam posset Planeta immotus con-



seruare suam vnionem cum firmamento conuerso : Quia tota Eclipticæ peripheria, cùm sit magnetica, potest vniri successiuè Planetæ immoto, & sic perseuerare vnio magnetica planetæ immoti cum firmamento in Occidentem moto. At quia Medium, in quo est planeta mouetur ab Oriente in Occidentem à firmamento, neque adest impedimentum; ideò planeta mouetur cum firmamento.

Ex his ad argumentum sic respondeo distinguendo Antecedens. Firmamentum conuertit secum ad Occidentem planetas sibi per Eclipticæ peripheriam magneticè alligatos. Mediante medio, & non impeditos : concedo antecedens; absque medio, & impeditos. Nego Antecedens. Atque adeo negatur consequentia : Firmamentum enim Terram sibi vnitam magneticè per polos ad Occidentem mouere non potest per medium : Quia medium ipsum mouetur circa Terram vt centrum. Deinde magnetica vnio firmamenti per suos polos cum terrâ totâ perseuerat, moto cælo, & immotâ Terrâ, sicut vnio lusorij verticilli circulariter moti cum magnete immoto.

Præterea, partis illius, quâ Firmamentum nectitur Terræ magneticè, conuersio tam lenta est, tamque à globo Terraqueo remota; vt ipse globus tam multis aquis actu grauitantibus, & per grauitatem fluentibus, onustus; vt ipsa conuersio communicari non possit. Quare etiam si Terra per firmamentum inclinaretur ad conuersionem; non conuerteretur tamen propter aquas insidentes, & actu motas per grauitatem. Ipsæ enim resisterent tali motui, quatenus alio, quàm terræ motu, mouerentur in superficie cauâ, & asperâ, & inæqualiter iacente, adeoque secundùm aliquid sui recederent à centro, qui recessus est illis violentus. Ergo resisterent Terræ mouenti: esset etiam resistentia ex parte ventorum syluas, & montes versus Orientem perflantium. Posset etiam probari hæc Terræ immobilitas per Solis radium perpendicularem, quò Terra Polis affixa conseruetur in suo statu: Quod enim per tria diuersa puncta firmatur immobile est.

## SECUNDA OBIECTIO.

QVOD aliqui de celeritate motus stellarum obiiciunt, nullius est momenti: Nam stellæ, planetæ, & zona Solis, totam celeritatem sui motus ad Occidentem habent à vehente firmamento. Nihil igitur mirum, si participant eius celeritatem. Nam quemadmodum illa omnia, quæ clauduntur naui participant eandem cum naui celeritatem, quia vehuntur naui: Sic omnia quæ vehuntur firmamento possunt illius celeritatem participare. Et quemadmodum quæ vehuntur naui, si mouerentur per se; non ferrentur tantâ celeritate: sic Astra, si per se mouerentur; non adæquarent celeritatem firmamenti: Quod quia magnum est corpus, non potest non celeriter moueri; quia locum magnum, seu multarum partium, mutat simul.

## COROLLARIUM.

Ex dictis patet, quàm conformis sit Physicæ hæc sententia de Terræ immobilitate. Cùm enim locus, siue termi-



nus rectarum in mundo lationum debeat esse immobilis motu recto; & locus, circa quem fit latio circularis, immobilis motu circulari; consequens est Terram esse immobilem, & motu recto: quia locus est grauium; quorum motus est ab Extremo ad Medium: (sicut firmamentum est immobile motu recto, quia locus est leuium, quorum motus est à Medio ad Extremum: ) & motu circulari, cùm sit locus circa quem fit motus in mundo circularis. Cùmque omnis in mundo circularis motus, quo Mobile partim quiescit, partim mouetur, à duplici virtute pendeat, alterâ sistente vnam mobilis partem, alterâ mouente, seu pellente alias eiusdem mobilis partes, hîc reperimus virtutem sistentem, nempe grauitatem Terræ in loco naturali quiescentis; & virtutem pellentem, nempe leuitatem ignis ad locum naturalem ascendentis.

F I N I S.



APHORISMI  
ANALOGICI  
PARVI MVNDI AD MAGNVN  
MAGNI AD PARVVM.




# P R Æ F A T I O

## AD LECTOREM.

**H**OMINEM Microcosmum mortales omnes appellant, mirantur plerique, pauci quid velint intelligunt. Hoc quippe effatis Antiquorum proprium est, ut à multis usurpentur, paucorum intelligentiam subeant: quandoquidem plus habet gloriæ sapientum premere vestigia, quàm excutere. Quia tamen & hæc non sunt à viris maximis temerè pronunciata, & paucissimis concepta verbis, immensum animo campum aperiunt: quisquis profitetur philosophiam, si eorum primas rationes non inuestiget, nominis sui videbitur oblitus; si hîc hereat; minimum, negligens, aut incuriosus iudicabitur. Habes igitur in hoc Tractatu (studiose Lector) comparisonem illam ad aliquot reuocatam capita, quam percipere nequis nisi tibi nota sint ambæ illius contentionis partes. Componitur hominis corpus cum hoc vniuerso, utriusque peruadere naturam debes si litis huius arbiter legitimus esse voles. At quid utilius homini, quàm seipsum nosse? quid magnificentius quàm id men-

## PRÆFATIO.

*te capere extra quod nihil aspectabile est? Quod si non omnes videar abstulisse difficultates, sed mouisse nouas, aliqua proponere quæ pauci vel nulli dixerunt: si doctrinæ rationem perspicis, acquiesce; hanc si non peruadis, expecta. Neque enim animi sensa simul egeri possunt, neque una quæstio multis colligata, atque implicita, omnia probari sinit: aliqua supponimus, quæ si tibi placuerint ista, aliquando prodibunt in lucem. Neque enim sol ipse lucis parens & auctor, cum primùm oritur, splendorem omnem suum nobis communicare videtur; sed dum procedit, nos magis illustrat. Hoc interim nostro labore fruiere, quem noui sementem facies, si probaueris.*






# APHORISMI

## ANALOGICI

PARVI MVNDI AD MAGNVN

MAGNI AD PARVVM.

*De duplici acceptione vtriusque mundi  
& Analogia inter vtrumque se-  
cundùm priorem acceptionem.*

I.  VEMADMODVM mundus aliquando sumitur pro continente causam efficientem, nempe Deum, & eius effectum, quod aliqui vocant *Complexum*; ita corpus humanum sumitur aliquando pro composito ex corpore organico, & anima rationali spirituali, & immortalis, nempe homine.

II. Quemadmodum mundus aliquando, & sæpius sumitur pro solo mundo

A is



corporeo, & aspectabili; ita corpus humanum sumitur aliquando, & sæpius, pro solo corpore organico.

III. Quemadmodum Deus utitur toto mundo aspectabili ad producendas propemodum infinitas animalium species; ita, proportionem quadam, anima rationalis toto suo corpore utitur ad artificialia propemodum infinita.

IV. Quemadmodum spiritus solaris est instrumentum vniuersale, quo Deus utitur ad mouendum, & conseruandum mundum corporeum; ita spiritus vitalis est instrumentum vniuersale, quo mens nostra utitur ad mouendum, & conseruandum corpus; cum hoc tamen discrimine; quòd Deus infinitè perfectus non possit esse pars; anima verò nostra sit verè pars.

*Inter quæ fiat comparatio.*

**H**Æc de analogia inter magnum & paruum mundum priori modo sumptos; Quæ sequuntur ad analogiam inter vtrumque posteriori modo sumptum, pro puro scilicet corpore, prout opponitur substantiæ spirituali, pertinent; & quidem inter ea duntaxat, quæ vtrumque

per se componunt : adeóque non agitur híc de artefactis, neque de speciebus animalium. Nam quemadmodum neque artefactorum ideæ etiam corporeæ, quæ sunt à mente humanâ ; nedum artefacta, sunt partes per se pertinentes ad corpus humanum, seu paruum mundum, quatenus híc comparatur cum magno ; ita neque species animalium sunt partes per se pertinentes ad corpoream integritatem magni mundi. Neque agitur de excrementis ; tum quia nulla sunt in magno, cum quibus excrementa parui componi possint ; tum quia ipsa per se non pertinent ad microcosmum.

Comparantur itaque tanquam duo extrema comparationis opposita relative, vnum corpus humanum tanquam vnum Indiuiduum corporeum ; & mundus tanquam vnum item corporeum Indiuiduum.

## ANALOGIÆ

Inter magnum & paruum mundum posteriori modo sumptos.

## PRIMA ANALOGIA.

*Sumitur à loco.*



ICUT corpus humanum est in aëre, tanquam loco proximo, & æquali; sic mundus est in cælo empyreo, substantiâ corporeâ subtilissimâ, & beatorum domicilio, tanquam in loco proximo, & æquali; & sicut humanum corpus est pelle suâ contiguum aëri; sic mundus per suum extremum, quod appellamus Firmamentum, est contiguum cælo Empyreo.

*Differentia.*

IN hoc differunt parvus, & magnus, mundus: quòd parvus 1<sup>o</sup>. recipit aliquid ab extrinseco. 2<sup>o</sup>. emittit aliquid ad extrinsecum. 3<sup>o</sup>. mouetur per extrinsecum: & hæc tria illi conueniunt, quia nutritur; & quibus nutritur, ea vt plurimum distant. Magnus autem mundus ne-



que recipit aliquid ab extrinsecò, neque quicquam emittit in extrinsecum, neque mouetur per extrinsecum, quia non nutritur ab extrinsecùs adueniente.

## SECUNDA ANALOGIA.

*Sumitur à terminò, seu parte continente.*

**P**ARVVS tegit, & continet partes, ex quibus per se componitur, pelle suâ; quæ proinde est densa, quatenus compactas habet partes, ac firmiter vnitas; qualia debent esse extrema omnia, quibus interiora continentur. Ipsa tamen, & multos continet poros, vt per eos nociua, & superflua, intrinseca foràs emittantur, intro verò admittantur conuenientia extrinseca; & est flexilis propter motum, quo membra corporis humani per extrinsecum feruntur.

Magnus tegit, & continet partes suas extremo suo, quod vocamus Firmamentum; proinde ipsum densum est, & compactas habet, ac firmiter vnitas partes ad continenda interiora; non tamen porosum, quâ saltem parte contiguum est

Empyreo ; quia nihil emittit foras, neque intrò quicquam admittit : Non flexile, quia nulla mundi pars per extrinsecum mouetur.

---

## TERTIA ANALOGIA.

*Sumitur à partibus contentis.*

### SECTIO PRIMA.

*Diuisio partium intrinsecarum parui mundi in consistentes, & fluidas ; in homogeneas, & heterogeneas.*

**P**ARTIVM humanâ pelle contentarû aliæ sunt consistentes, aliæ fluidæ, seu liquidæ : consistentes sunt, quæ componuntur ex partibus consistentibus ; fluidæ sunt, quæ componuntur ex partibus fluidis : partes consistentes illæ dicuntur, quæ non habent alium localem motum, quàm totius, quod componunt ; partes verò fluidæ, quarum altera mouet alteram ; atque adeo fluidum secundùm se totum, seu formaliter, mouetur vno motu ; variis autem secundùm partes, siue materiali-

ter. cui consequens est totum fluidum mouere se per partes seu trahendo, seu pellendo. Partes autem cum fluidi, tum consistentis, si sunt eiusdem rationis inuicem, & cum toto, quod componunt, faciunt totum homogeneous; consistentes, consistens; fluidæ, fluidum: si diuersæ; totum heterogeneous: consistentes, consistens; fluidæ, fluidum. Microcosmus est totum heterogeneous, partim consistens, partim fluidum: idem quoque dicendum est de magno mundo.

## SECTIO SECUNDA.

*Prima diuisio consistentium in duras  
& molles.*

**P**ARTIVM consistentium in paruo mundo aliæ duræ sunt, aliæ molles: duræ sunt, ex quibus nonnisi per magnam aut celerem actionem educitur humidum; quales sunt nerui, membranæ, cartilagines, & aliæ eiusmodi: molles, ex quibus humidum facile separatur, quales sunt carnes.



## SECTIO TERTIA.

*Diuisio durarum in rigidas & flexiles,  
& definitio centri.*

**D**URARVM partiũ alia sunt in paruo mundo rigida, alia flexiles. Dicuntur rigida, quarum partes vnum, & idem, centrum sic respiciunt, vt eundem cum illo, & aliis eiusdem centri partibus, conferuent situm. qualia sunt ossa. Flexiles sunt, quarum partes ad centrum accedunt, & à centro recedunt, absque diuisione; qualis est cutis, quales membranae, quales nerui. Centrum est punctum intrinsecum à tota superficie remotissimum.

## SECTIO QUARTA.

*Secunda diuisio consistentium in solidas  
& cauas.*

**C**ONSISTENTIVM item partium in paruo mundo alia sunt solida; alia caua. Dicuntur solida, quae nullas habent cauitates sensibiles, quibus fluida, vel alia diuersae rationis, contineantur corpora; quales sunt dentes, quales muscoli.

dixi *cavitates sensibiles* ; quia nihil in corpore humano est ita solidum , vt nullas habeat cavitates insensibiles , quas vocamus poros , fluido corpusculo , quod appellamus *materiam spiritum* , plenas. Dicuntur *cauæ* , quæ cavitates continent sensibiles , fluido , vel alio corpore diuersæ rationis à continente plenas ; qualia sunt pleraque ossa , parenchyma cordis , cerebrum , arteriæ , venæ , & nerui.

Cavitates maiores , in quibus fluida consistunt , & immutantur ; vocantur *sinus* , receptacula fluidorum , & fontes spirituum.

## SECTIO QUINTA.

*Diuisio partium interiorum magni mundi in consistentes & fluidas ,*  
&

*Prima diuisio consistentium in duras  
& molles.*

**P**ARTIVM Firmamento contentarum alia sunt consistentes , globus terrestris , planetæ & astra : alia fluida ; ignis , seu flamma , aër , & aqua. Consistentium alia sunt duræ ; globus terrestris , planetæ , & astra , quâ parte respiciunt terram : alia

molles, quales probabile est esse partes  
 astrorum superiores, quibus Firmamen-  
 tum respiciunt; Nam quod in astrorum  
 superiori parte aqueum est, illud motu  
 suo, ac terrei per igneum, superum fit;  
 quod verò aqueum est, molle est; quale  
 corpus Firmamento vicinum; quale item  
 corpus, quod in Zona torrida (quam  
 soli vicinam vocamus *cor mundi*) pa-  
 bulum est solis propinquum, & proxi-  
 mum: Spatium enim, quo continetur il-  
 lud pabulum, *cordis mundi* sinus appel-  
 lari potest per analogiam ad microcosmi  
 cor: in quo præter vitalem spiritum dis-  
 tinguiamus tria; ipsum parenchyma, si-  
 num vtrumque, & pabulum vtrumque.  
 Parenchymati respondet Zona torrida  
 soli vicina: vtrique sinui, spatium illius  
 Zonæ, quo continetur vtrumque pabu-  
 lum; sinui quidem dextro, spatium, quo  
 continetur propinquum: sinui verò fini-  
 stro; quo pabulum proximum: sanguini  
 sinus dextri, pabulum propinquum: san-  
 guini sinus sinistri, pabulum proximum;  
 de quibus fusè dictum est in *Sole flamma*.



## SECTIO SEXTA.

*Divisio durarum in rigidas & flexiles.*

**D**VRARVM partium in magno mundo aliæ sunt rigidaæ, quales sunt astrorum inferiores partes; aliæ flexiles, quales probabile est esse superiores, ad recipiendos influxus; quale item spatium, quod Firmamento est vicinum, eo fere modo, quo in paruo mundo medulla cerebri vicina est cranio.

## SECTIO SEPTIMA.

*Secunda divisio consistentium in solidas  
& cauas.*

**C**ONSISTENTIVM item partium in magno mundo, aliæ sunt solidæ; quales in globo terrestri, lunâ, & aliis planetis, stellisque, rupes per se sumptæ; item Firmamentū per se sumptum, quo nihil est solidius: Aliæ cauæ, quæ mollia & fluida, in se continent, quale est Firmamentum, quales stellæ, quales planetæ, qualis terrarum orbis: quibus omnibus continentur fontes propriorum spirituum, atque adeo fluidorum.

Præter has maiores cauitates aliæ sunt insensibiles in omnibus mundi partibus, si conuexam, & extimam Firmamenti partem cælo Empyreo contiguam excipias, quam probabile est nullis distingui poris : atque adeo esse simpliciter densam.

---

## QVARTA ANALOGIA.

*Sumitur à fluidis.*

### SECTIO PRIMA.

*Tria præcipua in paruo mundo fluida.*



ETEROGENEORVM in paruo mundo fluidorum partes fluidæ sunt varij spiritus materiales, quorum maximus, & creberrimus dat fluido denominationem : sic à spiritu stomachico denominatur chylus ; à spiritu hepatico denominatur sanguis venalis ; à spiritu vitali sanguis arterialis ; adeoque sunt in paruo mundo tria fluida sibi succedentia, chylus, sanguis venalis, & sanguis arterialis, in quo dominatur spiritus vitalis.

## SECTIO SECVNDA.

*Fluidorum parui mundi fontes octo.*

**H**ORVM fluidorum fontes sunt. 1<sup>o</sup>. os, in quo alimentum est fluidum per spiritum alimentarem, & spiritum saliax è cerebro defluentis. 2<sup>o</sup>. est ventriculus, in quo fit chylus per spiritum stomachicum, qui est acidus, atque adeo eliquat alimentum per os traiectum: quando neruus stomachicus ab illo spiritu mouetur, excitatur appetitus: si nimio calore, seu nimia bile; vel nimio frigore, seu nimia pituita tollatur aciditas, nempe temperies illa, qua spiritus fit acidus, tollitur appetentia. Fons 3<sup>o</sup>. est mesenterium, in cuius venis pars chyli densior perficitur per spiritum proprium, quem vocamus Mesaraicum. 4<sup>o</sup>. est splen, in quo purgatur altera chyli pars magis liquida, per spiritum spleneticum. 5<sup>o</sup>. est hepar, vbi chylus mutatur in sanguinem venalem per spiritum hepaticum, quem alij vocant naturalem. 6<sup>o</sup>. est cordis sinus dexter, in quo sanguis venalis fit calidior per spiritum vitali proximum. 7<sup>o</sup>. est pulmo, vbi sanguis venalis fit spumofus per



spiritum aëreum seu pneuma. 8<sup>o</sup>. est sinister ventriculus, vbi spumofus mutatur in arterialem per spiritum vitalem, qui reperitur quidem, sed non dominatur in omnibus parui mundi fluidis.

### SECTIO TERTIA.

*Tria præcipua in magno mundo fluida.*

**H**ETEROGENEORVM in magno mundo fluidorum partes fluidæ sunt varij spiritus materiales, quorum maximus & creberrimus dat appellationem ipsi fluido: sic à spiritu aqueo denominatur fluidum, quod vocamus aquas, & maria: ab aëreo fluidum, quod vocamus aërem: ab igneo fluidum, quod vocamus flammam: adeoque sunt in magno mundo tria fluida præcipua, & sibi succedentia, nempe aqua, aër, & ignis, seu flamma, in quâ dominatur spiritus solaris.

### SECTIO QUARTA.

*Fluidorum magni mundi fontes octo.*

**H**ORVM fluidorum fontes sunt. 1<sup>o</sup>. Saturnus per spiritus, quos in suâ cauitate facit sibi proprios de acceptis à  
Firma-

Firmamento, & sole; & transmittit, sursum quidem ad Firmamentum magis raros, per partem, quæ cælum aspicit; densos autem deorsum in Iouem, per partem quæ terram aspicit. 2<sup>o</sup>. est Iuppiter, seu Iouis cauitas, in qua de acceptis à Saturno, & Sole spiritibus facit sibi proprios, & eos per inferiorē sui partem in Martem sibi subiectum transfundit magis densos; per superiorem, versùs Firmamentū magis raros. 3<sup>o</sup>. est Mars, seu cauitas Martis qui se habet ad Iouem superiorem, & Venerem inferiorem, seu terræ propiorem, sicut Iuppiter ad ipsum & Saturnum. 4<sup>o</sup>. est Venus. 5<sup>o</sup>. Mercurius. 6<sup>o</sup>. Luna. 7<sup>o</sup>. est globus terraqueus. 8<sup>o</sup>. est id quod appellamus *cor mundi*, vnde flamma solis, siue spiritus solaris erumpit, sicut spiritus vitalis è sinuoso cordis microcosmi ventriculo. Per planetas recipientes intellige quoque fluidos ipsorum circulos.

*Differentia.*

**H**Æc autem est differentia inter magnum, & paruum mundum, quòd fluidum in paruo transiens ab vno fonte ad alium contineatur vasis deferen-

tibus; in magno verò nullum fit eiusmodi vas.

Ratio discriminis petenda est ex eo, quòd fluidorum parui locus, & ordo ad ipsius conseruationem necessarius, ita sit contrarius ordini, & loco, ipsis per naturam propriam naturali, vt per proprios parui motus conseruari non possit absque vasis, quibus ipsa fluida determinentur ad locum illum, & ordinem; ab vnóque fonte ad alium perferantur. Locus autem, & ordo fluidorum magni, necessarius ad ipsius conseruationem, ita sit conformis loco, & ordini, per naturam propriam ipsis naturali, vt per proprios magni motus possit facìle, absque diuersis ab ipsâmet mundi cauitate vasis, conseruari. Sic enim per totam illam cauitatem dispositi sunt fontes, vt ab vno ad alium naturâ suâ ferantur fluida. densa quidem descendunt à Saturno per intermedios Planetas, ad terram: è terrâ autem vapores, & exhalationes igneâ leuitate, quam à sole, & igneo terræ meditullio colligunt, ad magni cor ascendunt.



## QVINTA ANALOGIA.

*Sumitur à spiritibus.*

## S E C T I O P R I M A.

*Diuisio spirituum microcosmi in vitalem  
& animale.*

N microcosmo duo sunt spiritus vniuersales, à suis fontibus per totum ita dispersi, vt à quâlibet particulâ totius corporis participentur; nempe vitalis à corde profluens, & animalis à cerebro. Vitalis totum heterogeneousum ex particulis ad singula membra pertinentibus (ex illis enim colligitur totum heterogeneousum, in quo dominatur igneus, à quo sumitur denominatio spiritûs, sicut ab aliis, denominatio vitalis) omnium parui mundi motuum principium, determinatur quidem ad varios motus à variis eiusdem parui mundi partibus, ad primum autem à propriâ naturâ, quâ postulat esse supra corpus terreum, aqueum, & aëreum.

## SECTIO SECUNDA.

*Diuisio sinistri cordis ventriculi in tres partes.*

**A**D intelligentiam autem huius primi motus, diuidendus est sinister cordis ventriculus à cuspide ad basim, in tres partes; infimam, quæ sit cuspis, siue fundum; supremam, quæ sit basis, seu valuulæ, tum venosæ, tum aortæ; & mediam, quam vocabimus, canalem. Factâ illâ diuisione sic facilè explicatur hic primus spiritûs vitalis motus.

## SECTIO TERTIA.

*Explicatio motus primi spiritûs vitalis.*

**S**PIRITVS ergo vitalis (nempe totum illud heterogeneousum ex variis particulis variæ mixtionis compositum, in quo spiritus igneus dominatur) confusus, & permistus, in humido radicali (hoc est in sanguine paulo crassiori ac pinguiori, quem cordis fundû continet) inque illud velut immerfus, semper quidem, magis verò adueniente ex arteriâ venosâ sanguine spumoso, & aëreo, mouetur per

illum pinguiorem sanguinem, caloris microcosmi fontem; ac motu suo per illud humidum vnitus, ac factus maior, adeoque potentior ad motum naturalem, emergit quantum potest ex illo sanguine, siue humido radicali, tanquam ex pabulo proximo, quâ datur erumpere; hoc est per medium, per quod facilius, quàm per pabulum moueatur. hoc medium non sunt tunicæ fundi nimis densæ, & compactæ; sed canalis; & quidem lateribus diductis: nam si iuncta sint, non sunt medium, per quod liberè moueatur spiritus vitalis cum suo vehiculo, nempe sanguine arteriali. diducuntur autem canalis latera per sanguinem spumofum, & aëreum, ex arteriâ venosâ per valvulas in cor delabentem. In tale medium, quod rarius est, ac facilioris diuisionis, quàm pabulum, siue sanguis pinguior, & crassior in fundo positus, nempe humidum radicale, fit ebullitio, siue spiritûs eruptio; nempe motus multò celerior, quàm antea, per medium minus resistens: prius enim mouebatur spiritus per medium densum, & pingue, radicale scilicet humidum: postea verò quàm per motum, & vnionem factus est potens sufficienter



ad eleuandam partem humidi , ac diuidendam eius superficiem , eámque diuisit , mouetur cum suo vehiculo per medium minus resistens , atque adeo celerius . Initium autem huius maioris celeritatis appellatur *eruptio* : & in igneis ex humido densiori in minus densum , *ebullitio*.

#### SECTIO QUARTA.

*Quare prima spiritûs vitalis eruptio non sit continua.*

**H**Æc ebullitio siue eruptio interrumpitur in corde, quatenus erumpens mobile, hoc est spiritus, non continuatur cum alio sufficienter potente ad diuidendam superficiem, siue superandam resistantiam densioris humidi, quo continetur: quod est, hoc secundum mobile nondum habere sufficientem leuitatem; cuius insufficientiæ causa est paruitas mobilis.

Idem, sed ratione contrariâ, contingit in aquâ guttatim cadente: guttam enim cadentem non immediatè sequitur alia; quia nondum collegit grauitatem, quæ sufficiat ad diuidendam, quâ con-

tinetur, aquæ superficiem; adeoque casus interruptitur, dum per motum in ipsâ aquâ fiat gutta sufficiens per gravitatem, ad diuisionem superficiem, quâ diuisâ per aërem delabatur.

## SECTIO QUINTA.

*Quid sequatur ex primâ ebullitione spiritus vitalis?*

**H**AC eruptione, siue ebullitione, spiritûs vitalis, primò fundum, siue cuspis per attractionem contrahitur, & ad basim adducitur. 2°. spumofus sanguis è venosâ delabens per canalem sistitur. 3°. Canalis ipse dilatatur per aduentum, & occursum vtriusque sanguinis arterialis ac spumosi. 4°. in sinum dextrum transpirat per septum transversum aliquid spiritus vitalis. 5°. ipse sinus constringitur, cal. & valuulæ clauduntur; & sanguis inde in venam arteriosam transmittitur. 6°. venosæ clauduntur valuulæ.

Dilatatione canalis adducuntur arteriarum latera & vniuntur. hac vnione 1°. clauduntur aortæ valuulæ. 2°. sistitur in canali spiritus. 3°. pressæ omnes arteriæ guttulas aliquot arteriosi sui sangui-

nis in totum corpus per anastomoses euomunt. 4°. transmissâ parte sanguinis arterialis ex arteriis in musculos aperiuntur aortæ valuulæ per appulsum sanguinis arterialis in canali constricti. 5°. per valuulas patentes ex canali sic erumpit spiritus, siue sanguis arterialis in aortam, ut eius motus per alium sanguinem in arteriis iam positum, & clausum ad totum corpus perueniat: & sic pulsant arteriæ.

#### SECTIO SEXTA.

*Quid sequatur ex secunda spiritus vitalis eruptione?*

**P**OST hanc spiritûs eruptionem, ex canali scilicet in aortam, 1°. sanguis spumofus in canali per morulam occurrente spiritu detentus, in cordis fundum delabitur. 2. ex illo descensu fundum, seu cuspis dilatatur; & sic pulsat cor, seu potiùs cuspis.

Aperiuntur etiam venosæ valuulæ sublato per illam eruptionem sanguinis arterialis impedimento, & sic sanguis spumofus descendit ex venosâ per valuulas in canalem.



## SECTIO SEPTIMA.

*Quare cor & arteriæ simul pulsant ?*

**E**X dictis patet eodem tempore pulsare cuspidem, & arterias : cuspidem quidem per aduentum sanguinis spumosi ; arterias autem per aduentum sanguinis arterialis ; eodem enim tempore spumofus ex canali descendit in fundum, & arterialis ex eodem canali erumpit in aortam.

Quod magis pingue, & viscosum est in spumoso sanguine remanet in fundo ; quod magis aëreum, fit vehiculum spiritus vitalis, atque adeo sanguis arterialis. }

## SECTIO OCTAVA.

*De motu fluidi vitalis per arterias.*

**F**LVIDVM vitale, quod continetur arteriis, tanquam alucis, fluuiorum instar perseverat idem loco, & formâ ; non materiâ ; & in eo per arterias moto distinguendæ sunt duæ partes, altera vehens, quæ determinetur ad motum per propriam naturam ; altera vecta, quæ ad motum microcosmi proprium determi-

netur à parte subsequente , & aliis microcosmi partibus immotis ; adeóque in vectâ partes duæ sunt distinguendæ ; altera quæ moueatur , altera quæ sistatur à partibus immotis microcosmi : cui consequens est fluidi vitalis per arterias motum esse circularem , quod est ab ipso arteriarum trunco ad anastomoses volui per arterias, vt aqua fluuiorum voluitur à fonte ad mare, per alueum.

## SECTIO NONA.

### *De reditu sanguinis ad cor per venas.*

**P**ARS arterialis sanguinis ex arteriâ per anastomoses egressa, seu trusa determinatur ad reditû ad cor per venas, à parte subsequente, relicto muscoli pabulo : nam regressum per arterias prohibet subsequens ; & egressum ex musculo , membrana musculi. Superfunt ergo venarum anastomoses , per quas in venas, adeóque in cor pateat arteriali sanguini reditus : in quo reditu collecta ex carnibus musculorum , & chyli pinguedine , fit aptus ad conseruandum humidum radicale , seu pabulum proximum spiritus vitalis. Nam venæ omnes , in quas per anastomoses

deonerantur arteriæ tendunt ad cauam, vbi cum nouo sanguine, seu potiùs chylo, ex hepate proueniente sanguis re- diens coniungitur.

## SECTIO DECIMA.

*De purgatione sanguinis arterialis, & nu-  
tritione membrorum.*

**S**P I R I T V S autem vitalis, seu potiùs sanguis arterialis eius vehiculum, pur- gatur in viâ per secretionem spirituum terreorum, & aqueorum: quorum flui- dum, seu vehiculum vocatur aut serum, aut sudor, aut vrina, aut aliquid aliud huiusmodi, vnde catarri. Quod verò a- ptum est ad nutritionem membrorum, in iis secretum remanet & per illius coniu- ctionem vitalem, mediante scilicet spi- ritu, membrum nutritum crescit, si plus remaneat, quàm vel à sanguine venali, vel ab aliis causis separetur, ac tollatur: minuitur, si plus absumatur, quàm re- maneat: si æquè, consistit. Quod ter- reum magis est, neque aptum ad nutri- tionem, secretum fit callus, calculus, & alia huiusmodi.



## SECTIO VNDECIMA.

*De mutatione spiritus vitalis per nutritionem.*

**S**PIRITVS vitalis immutatur in iis partibus, in quarum poris, & cavitatibus detinetur, per secretionem, & coniunctionem cum aliis spiritibus, qui respectu ipsius ex fonte, seu fornace de nouo aduenientis dicuntur insiti. sic ergo spiritus vitalis in carne fit carneus, in osse fit osseus, in stomacho fit stomachicus, in splene splenicus, in hepate hepaticus: & sic de aliis.

## SECTIO DVODECIMA.

*V binam fiat spiritus animalis?*

**I**N cavitatibus autem cerebri per secretionem ab aliis in viâ, maximè in parte, quæ vocatur rete mirabile, & coniunctionem cum insitis, fit animalis; Ibi-que vario modo figuratus, & inde per nervos distributus mouet membra per vactionem; & hac ratione membra cum cerebro per nervos, ligamenta, & ossa, colligata, vel accedunt ad ipsum cere-

brum, vel ab ipso recedunt per motum spiritûs animalis.

### SECTIO DECIMATERTIA.

*Diuisio spiritus magni mundi in solarem  
& cælestem.*

**I**N magno mundo duo sunt spiritus vniuersales solaris, & cælestis, per totum ita dispersi, vt à qualibet ipsius particulâ participantur; nempe solaris à Sole profluens; cælestis à Firmamento. Quidquid enim est pars mundi, quatenus est pars mundi, à Sole mota, & conseruata, spiritus habet solares; sicut pars viuentis, quatenus est pars viuentis, spiritus habet vitales. Item, quidquid est pars mundi, quatenus est pars mundi connexa Firmamento, & ab ipso mouetur, cælestem habet spiritum, quem vocamus magneticum; sicut pars animalis, quatenus est pars sentientis, & mouentis motu spontaneo, spiritum habet animale.

## SECTIO DECIMAQUARTA.

*De primo solaris spiritus motu.*

**S**PIRITVS solaris totum heterogeneousum ex particulis ad singulas vniuersi partes pertinentibus (ex illis enim colligitur totum heterogeneousum, in quo dominatur igneus, à quo sumitur denominatio spiritûs; sicut ab aliis denominatio solaris, & cuius vehiculum est flamma solaris, aliâque fluida vicina) est primum principium omnium motuum magni mundi, determinatus à variis illius partibus ad varios motus; ad primum autem à naturâ propriâ, quâ postulat esse super terram, aquam, & aërem.

Ad intelligentiam autem huius primi motus; in eo quod vocamus cor mundi, tria sunt considerata; primum ex quo erumpit flamma solis; alterum in quod erumpit flamma solis; tertium in quod soluitur flamma solis, ac distribuitur spiritus solaris.



## SECTIO DECIMAQVINTA.

*Vnde erumpat solaris spiritus ?*

I. **I**D, ex quo erumpit flamma solis, est proximū pabulum spiritibus igneis, & variæ mixtionis ; paruis quidem , ac creberrimis , separatis inuicem , ac diuisis per medios terreos , aqueos , & aëreos , refertum.

Compositum ex illis spiritibus homogeneum fascia quædam est æqualiter à terrâ distans in Zonâ torridâ , pertinens ab oriente ad occidentem per Zenith, & ab occidente ad orientē per Nadir. Quæ Zona successiuè accenditur , & inflammatur à flamma solis , quæ per suum contactum , & vectionem, educit ex ipso pabulo spiritus igneos ; ipsos vnit, & facit maiores , remouendo, ac dispergendo interiectos spiritus aëreos , aqueos , & terreos , minus subtiles.

Compositum ex spiritibus illis igneis variæ mixtionis factis maioribus , quos vocamus ardentes, dicitur flamma : nempe totum fluidum , in quo dominantur spiritus ardentes : Alba, si post ardentes dominantur aërei tenuissimi ; cærulea, si

aquei; rubra, si terrei. Hoc fluidum clauditur inuolucro pingui, ut dictum est in Sole flamma q. i. c. 4.

Fluidum ex illis flammis ( quod formâ idem perseuerat semper, materiâ autem, & loco semper mutatur ) vocatur sol; qui mouet, atque illuminat, quâ rarus; videtur ac terminat visum, quâ densus: quâ sol mouet partes mundi, & conseruat; nempe quâ corpus dispergens spiritus solares.

#### SECTIO DECIMASEXTA.

*Quò erumpat flamma solis, siue spiritus solaris?*

2. **S**PATIVM, in quod erumpit ex spabulo flamma solaris, est aër subtilissimus ( siue, ut alij volunt, æther ) vehementer motus ab oriente ad occidentem, per Zenith; determinatus ad illum motum ab vniuersali naturâ mundi, nempe, & ab igne flammæ hinc & inde vicinum aërem colligente, & in suum inuolucrum includente, atque adeo vicinum aërem ad se trahente, & à partibus raris, subtilissimis, & igneis, quas ipse aër continet; iam factis maioribus,  
tum

tum secretione , tum aliarum aduentu , per motum Solis , atque adeo mobilioribus ; eo penitus modo , quo noster aër cubiculo clausus ad ignem luculentum recens sub camino excitatum accurrit , factus mobilior , tum per secretionem , tum per coniunctionem igneorum à flamma disperforum : quâ secretionem , & coniunctionem , spiritus ignei , quos aër continet , fiunt eò maiores , atque mobiliores , quò ipsi flammæ sunt viciniore ; & quidem mobiliores ad flammam , tum quia vicinus aër ab igne flammæ trahitur ad flammam ; tum quia versùs illam determinantur à corporibus vicinis densioribus aliò motis , & expellentibus , quæ motum iuuant , quatenus expellunt : Quod enim expellit , premit ; quod autem premit , rarum separat à denso ; proinde rarum , ac densum fiunt maiora per secretionem , & mobilia motu suo naturali.

Spatium istud subtilissimum , ac proinde facillimæ diuisionis est necessarium ad inflammationem , siue educationem flammæ , siue spirituum ardentium , ex pabulo : tum quia pars illius includitur in flamma ; tum quia requiritur ad inflammationem motus vehemens natura-



lis, ac celerrimus ipsius flammæ, educen-  
tis ex pabulo spiritus ardentes: ergo &  
medium tenuissimum, ac facillimæ diui-  
sionis, per quod ipsa flamma, seu fluidum,  
seu vehiculum spirituum ardentium, &  
solarium moueatur.

Flamma erumpens ex pabulo versùs  
orientem, & aër obuius versùs occiden-  
tem augent motum: quia per occursum  
illum premunt, ac proinde separant ra-  
rum à denso; siue, vt alij volunt, humi-  
dum à sicco: quâ separatione, vt iam di-  
ctum est, augetur motus; quia rara qua-  
tenus rara, & densa, quatenus densa fiunt  
maiora, atque adeo mobilia: Sol ergo,  
& aër occurrentes sibi, magis mouen-  
tur; non quidem hic in occidentem, &  
ille in orientem; sed in omnem aliam par-  
tem, quâ est facilior diuisio, seu minor  
resistentia.

Hic aër, siue æther in quem erumpit  
Sol ex pabulo proximo, est analogus san-  
guini spumoso, in quem erumpit spiritus  
vitalis, siue sanguis arterialis ex humido  
radicali: quorum occursum fit magna cana-  
lis diductio: ex quâ sequitur distributio  
spiritus animalis in totum corpus, vt di-  
ctum est: sic etiam ex occursum moti ver-

sus orientem Solis, & aëris moti versus occidentem, spiritus solaris erumpens ex flammâ per inuolucrum dispergitur in totum mundum.

## SECTIO DECIMASEPTIMA.

*De spatio, in quod soluitur flamma Solis.*

3. **S**PATIVM ergo, in quod soluitur flamma Solis, ac distribuitur spiritus solaris est totus mundus; erumpens enim, ac motus celerrimè per naturale principium, seu leuitatem Sol ex pabulo, determinatur ab ipso pabulo, partibusque magni mundi contiguis, aëre scilicet supero, infero, laterali, & obuio ad motum circularem versus orientem, & occidentem: At flammæ pars præcedens, & remotior à pabulo, seu fonte, mota per vectionem, seu pulsionem à succedente, & aliquâ sui parte detenta à vicinis corporibus, aut immotis, aut alio motu agitatatis determinatur ad motum circularem versus orientem. At fluxus totius fluidi sequens pabulum, determinatur ab ipso pabulo versus occidentem.

## SECTIO DECIMA OCTAVA.

*Maior copia spirituum solarium versus Firmamentum quomodo retardet motum planetarum superiorum ad occidentem.*

**P**ORRO motus spirituum solarium celerrimus, & maximè naturalis, & copiosus est versùs Firmamentum propter leuitatem, & minimam mediij resistantiam; & hic motus duo præstat. 1<sup>o</sup>. ingentem solarium spirituum copiam dispergit in partes mundi superiores; in planetas, si occurrunt, in stellas, & Firmamentum. hinc planetarum occurrentium, & in apice illo Solis positorum motus est directus, vt loquuntur Astrologi: minus enim mouentur ad occidentem, atque adeo magis ad orientem videntur accedere: quia motus illorum versus occidentem impeditur ab influxu solari ascendente. Nam quemadmodum baculus ex fundo fluuij ad orientem moti, quandiu emergit per aquam, minus ad orientem mouetur, quàm positus in eiusdem fluuij superficie: quia ista emerisio componitur ex motu



in transfuersum, & retro : nempe ex motu fursum, & in Orientem : atque adeo minus habet recti versus Orientem, quàm si nihil haberet transfuersi : ita planeta in circulo suo positus, quò magis ascendit per circulum, eò minus habet de circulari motu versus Occidentem : positus autem in Solis apice magis ascendit per circulum, quàm ab illo remotus, vt dictum est in Sole flamma q. 3. c. 3. §. 9.

Ex dictis patet inflammationem ex pabulo versus Orientem conuenire Soli : uectionem à fasciâ versus Occidentem : leuitationem versus firmamentum : volutationem circa seipsum erumpentem : dispersionem spirituum per inuolucris poros, in omnem partem.

#### SECTIO DECIMANONA.

*Quomodo spiritus solaris determinet firmamentum ad motum versus Occidentem.*

Hac de re fusè dictum est in Sole flamma q. 3.

## SECTIO VICESIMA.

*Quare firmamentum non mouetur  
ad Polos.*

NON determinatur firmamentum ad motum versus Meridiem & Septentrionem, licet in alterutram partem flectatur Sol : Quia firmamentum non est capax huius motûs, vt dicitur sect. sequente, quæ est de mutatione spiritus Solaris in cælestem. Nam quemadmodum spiritus *vitalis* in humido cerebri mutatur in *animalem*, per quem Cerebrum à corde motum mouet membra; & cordis parenchyma; Ita spiritus Solaris in humido firmamenti mutatur in cœlestem, siue magneticum, per quem firmamentum à Sole motum mouet stellas, & planetas, ipsam, que Solis fasciam. Porro hunc motum firmamenti ab igne sursum affluente imitantur alæ molendini circulariter motæ per rectam aëris lationem : & in fumariis rotæ afflatoriæ per rectam fumi sursum ascendentis lationem.

## SECTIO VICESIMAQUARTA.

*De mutatione spiritus solaris in caelestem, & eiusdem caelestis per mundum distributione.*

**N**V S Q V A M spiritus solaris copiosior est, quam in Firmamento; ibi autem fit caelestis; Caelestem enim vocamus spiritum, qui à Firmamento, tanquam à fonte dispergitur; quemadmodum vocamus in paruo mundo animalem, qui à cerebro dispergitur in totum corpus, per nervos.

Caelestis ergo spiritus à Firmamento totum in concauum diffunditur influxu continuo, & nunquam interrupto: Nam quemadmodū absque vllâ interruptione magnam solarium admittit copiam; ita quoque magnam caelestium emittit copiam; quæ copia per totum orbem diffusa, & variè per secretionē, & coniunctionem mutata, suum ad fontem reuertitur; indèque per varios motus, ac gyros in totum mundum. Et quia Firmamentum solares accipit spiritus, inclinantes à meridie ad septentrionem, & à septentrione ad meridiem, propter motum Solis sequentis pabulum proximum ab vno



tropico, ad alium, per arietem, & libram; sunt in Firmamento fluidorum circulo-  
rum mundi peripheriæ, quæ ad septen-  
trionem, & meridiem inclinant.

## SECTIO VICESIMA QUINTA.

*De distributione celestis spiritus per mundi  
circulos & polos.*

**E**X his autem circulo-  
rum in Firma-  
mento terminatorum peripheriis e-  
mittuntur motu continuo in totum cir-  
culum spiritus cælestes. Sic autem se ha-  
bent circuli, vt singuli per suum plane-  
tam, vel suam stellam habeant quò de-  
terminatè suos dirigant spiritus: Poli  
verò suum quoque habent consistens  
corpus, & suam cauitatem, quò imme-  
diatè suos item emittant spiritus cælestes,  
nempe globum terraqueum, inter quem,  
& polum nulla est stella, nullus Planeta.

Sic autem se habent corpora consisten-  
tia in fluido circulo, vel axe constituta,  
vt quemadmodum accipiunt à Sole, &  
Firmamento spiritus; ita etiam in Solem,  
& Firmamentum ipsos refundant, suo  
modo mutatos, sibique superfluos, &  
inutiles. A Firmamento denso accipiunt  
densos;

denfos; remittunt ad Firmamentum raros: accipiunt à Sole raros, siue igneos, remittunt denfos siue terreos, & aqueos.

## SECTIO VICESIMASEXTA.

*Distinguuntur stelle & Planete in tres partes seu regiones.*

**A**D horum intelligentiã, distinguendum est quodlibet astrum, siue stella, siue planeta in tres veluti partes, seu regiones, superiorem, inferiorem & mediam. Inferior densa est, dura, & rigida, quã terrã semper aspiciunt, & lumen Solis ad nos reflectunt; superior magis rara, & mollis: media est rara, & fluida, nempe cauitas, in quã, sicut in poris, spiritus aliunde accepti, astri naturam induunt: & quia composita est ipsa astri natura ex terreo & aqueo, aëreo, & igneo; siue ex denso & raro; spiritus diuiduntur in terreos, & igneos, siue denfos, & raros; Ignei & aërei, siue rari mittuntur fursùm ad Firmamentum per partem superiorem; terrei, & aquei, siue densi mittuntur deorsùm per partem inferiorem, ita vt terminus à quo, vtriusque spiritûs, sit cauitas, vnde per poros, tum supe-

rioris , tum inferioris partis fluunt spiritus.

## SECTIO VICESIMASEPTIMA.

*De influxu magnetico mundi tum caelestium terrestri.*

**P**ER mutuum autem influxum fit nexus inter partes mundi solidas ; & influxus ille , siue spiritus , quatenus nectit, appellatur magneticus.

In terraqueo globo (idem esto iudicium de planetis & stellis ) influxus , siue spiritus magneticus diuiditur in caelestem , & terrestrem : Cælestis est , qui à cælo , id est Firmamento descendit in terram : terrestris , qui à terrâ ascendit in cælum , id est Firmamentum.

Partes in Firmamento , terræ destinatae sunt eius poli , per quos ipsum Firmamentum caelestem suum influxum magneticum in terram , per ipsius terræ polos , & hemisphæria , septentrionale , & meridionale depluit. Terrestris est , qui è centro terræ per eius polos & hemisphæria , pergat ad polos Firmamenti. hoc mutuo influxu sic poli mundi cum polis terræ connectuntur , vt nulla vi naturali



separari possint; adeóque Firmamentum neque ad septentrionem, neque ad meridiem declinet. si enim magnes sphæricus diametri duorum, aut trium digitorum, & chalybs sic vniantur, vt homo vnus ea separare in directum non possit, quid separabit à terrâ Firmamentum?

Influxus cælestis, quia densior est (factus scilicet densior à denso Firmamento) ex polo septentrionali rectâ, & impetu naturali, fertur ad polum terræ septentrionalem, & ex polo meridionali ad polum terræ meridionalem. Influxus terrestris (quia rarus, & igneus, est ex ignea terræ cauitate) ex ipsa cauitate naturâ suâ fertur ad polos mundi; ad septentrionem quidem, per polum terræ septentrionalem; ad meridionalem verò, per polum terræ meridionalem. Influxus magnetici cælestis, & terrestris, occurrentes inuicem mouent & expellunt; hic illum deorsum ad terram, illum hic fursum ad Firmamentum, eo planè modo, quo aër & aqua, sibi occurrentia. Nam quemadmodum aër ascendens per aquam superum ipsius locum accipit, & sic eam deorsum expellit; & aqua vice versa descendens per aërem, fursum expellit aërem; Ita fluxus

magneticus cælestis, & terrestris, dum fiunt obuij, expellunt inuicem, cælestis terrestrem obuium expellit ad mundi polos: terrestris autem cælestem obuium expellit ad terræ polos: & ita componitur mundi, seu potius Firmamenti axis; cuius centrum est globus terraqueus; extrema verò, seu poli, poli mundi, seu Firmamenti. spatium quod est à Firmamenti polo septentrionali ad centrum terræ continet fluxus magneticos septentrionales, terrestrem, & cælestem: quod verò est à Firmamenti polo meridionali ad idem centrum, meridionales terrestrem, & cælestem.

## SECTIO VICESIMA OCTAVA.

### *De terminis fluxus magnetici mundi.*

**F**LUXVS magneticus meridionalis cælestis habet pro termino à quo, polum Firmamenti meridionalem, & pro termino ad quem, centrum terræ, per polum meridionalem eiusdem terræ; & è contrario, fluxus terrestris meridionalis habet pro termino à quo, centrum terræ; & pro termino ad quem, polum Firmamenti meridionalem, per polum

terræ meridionalem. fluxus autē septentrionalis cælestis est à polo Firmamenti septentrionali ad centrum terræ per polum terræ septentrionalem, & fluxus terrestris septentrionalis est à centro terræ ad polum Firmamenti septentrionalem, per polum terræ septentrionalem : & sic fluidum magneticum cæleste septentrionale ingreditur in terram, per polum terræ septentrionalem, & per eundem polum egreditur fluidum magneticum terrestre septentrionale. Fons fluidi cælestis septentrionalis est in polo Firmamenti septentrionali : & fons fluidi septentrionalis terrestris est in centro terræ, quatenus emittit suum fluidum per suum polum septentrionalem, siue hemisphærium Boreale. fons fluidi cælestis meridionalis est in polo Firmamenti meridionali ; fons fluidi meridionalis terrestris est in centro terræ, quatenus emittit suum fluidum per suum polum meridionalem, siue hemisphærium australe.



## SECTIO VICESIMANONA.

*De contrarietate & effectu fluidorum  
magneticorum.*

**P**ER fluidum intelligo compositum ex spiritibus magneticis, quod formâ quidem idem perseueret, materiâ verò perpetuò mutetur. per fluidum cæleste, compositum ex magneticis cælestibus, hoc est densis, siue terreis, per fluidum terrestre, compositum ex magneticis terrestribus, hoc est raris, siue igneis. Cui consequens est fluida magnetica esse contraria sub vno genere; & corporis (quatenus vnum est densæ, ac terreæ naturæ; aliorum verò igneæ, & raræ) & distantia, quæ est inter polos. Per naturam genericam, & communem vniuntur, ac se sistunt hi spiritus: per naturam propriam, & specificam mouentur ad terminos contrarios; ac proinde suos terminos, ac radices seu fontes connectunt quantum possunt; terrestre quidem australe, polum australem terræ cum australi Firmamenti polo, tanquam radium cum termino; cæleste verò item australe polum australem Firmamenti

radicem cum termino: cæleste verò item australe polum australem firmamenti; cum australi terre polo tanquam fontem, seu radicem cum termino. Eadem est ratio fluidi Septentrionalis, tum cælestis, tum terrestris.

Hæc autē connexio magnetica radice cum termino, seu firmamenti cum stellis, planetis & globo terraqueo fit per refractionem radiorum magneticorum lateraliū in ingressu. Hi enim radij, dum propter actionē magneticam à circumferentia ad centrum, imitātes actionem firmamenti, vt primariam, & primam sui originē, coeunt in conum; & alios per eandem partem egredientes offendunt. Ergo in ipso ingressu decussantur, & refringuntur omnes, præter perpendicularem. Ita refracti conuertuntur circa punctum refractionis: nam quæ partim mouētur partim sistuntur; conuertuntur circa id, quod sistit: Quæ autē refringuntur; partim mouentur, partim sistuntur: igitur conuertuntur. Quæ autē in corpore magnetico, seu magnete, conuertuntur; aliquā saltem sui parte ad terminum, vnde veniunt, reuertuntur, eoque ferunt corpus, in quod ingressi sunt. Ex istâ connexione duo colliges. Alterum mollia, & fluida corpora,

non esse magnetica: transitum enim absque refractione ad reditum necessariâ, facilem præbent influxui magnetico. Alterum Magnetem armatum fortiorrem esse, quàm inermem: dum enim ex magnete in armaturam, seu calybem ingreditur virtus magnetica; refringitur & vnitur in puncto armaturæ vicino: & sic vnita, fortior quidem est; sed ad minorem ab ipso magnete distantiam.

Ex dictis, Concipienda est columna, siue linea, magnetica inter firmamentum & terram per polos; perpetua, & permanens eadem, nō materiâ, seu numero sed loco & formâ; composita ex duobus fluidis, quorum alterum quantum potest eò vehat suum terminum, vnde oritur: alterum item suum terminum ad suum principium: nempe Terram ad firmamentum & firmamentum ad Terram. Sic firmamentum per suos, siue mundi, polos terræ alligatum æquatore suo æquatori Globi Terraquei respondet inuariabiliter: ipse verò Globus Terraqueus inter polum vtrumque medius hæret immobiliter ad vtrumque vectus æqualiter.

Motus singularum partium cuiuslibet fluidi, seu fluidi materialiter sumpti, est circularis: quia singulæ sistuntur per



vnam sui partem, per alteram mouentur: totius autem formaliter sumpti motus est rectus ab vno polo ad alium polum; Et quemadmodum fluidum densum, qualis est aqua, non mouetur motu suo naturali, nisi per fluidum contrarium, scilicet rarum, qualis est aër; neque fluidum rarum nisi per densum; ita fluidum magneticum terrestre non mouetur nisi per fluidum contrarium, nempe cæleste, neque cæleste nisi per terrestre; mouentur autem alterum per alterum, quatenus inuicem expellunt; vnde si cæleste occurrat cælesti, vel terrestre terrestri, se sistunt, quia spatium medium non minuunt, sed augent. & quia minùs quidem, sed tamen semper fluunt, terminos, quantum possunt, remouent.

## SECTIO TRICESIMA.

*De magnete ex terra deciso.*

**E**X dictis facile est cognoscere naturam lapidum, quos vocamus Magnetes, quatenus sunt magnetici; sunt enim magnetici, quatenus habent fluidum magneticum cæleste, & terrestre, ad meridiem & ad septentrionem.

Lapides hi omnes è terrâ sunt , & omnes medij inter centrum terræ , & vnum polum mundi. Qui sunt medij inter centrum terræ , & polum mundi septentrionalem, vocantur septentrionales, seu Boreales : quales sunt omnes apud nos. Qui sunt medij inter centrum terræ , & polum mundi australem, vocantur australes. Magnes Borealis in fodinâ recipit vtrumque spiritum ; terrestrem , per partem , quæ respicit centrum terræ ; cælestem , per partem , quæ respicit polum mundi septentrionalem.

Vterque spiritus septentrionalis est ; sed alter terrestris, cuius fons est in extremâ parte huius parui magnetis , versûs centrum terræ ; atque adeo in parte , quæ respicit mundi polum australem ; alter cælestis, cuius fons est in alterâ parte oppositâ , respiciente polum mundi Borealem : fons hic dicitur polus septentrionalis parui magnetis ; fons ille dicitur polus australis.

Si ergo magnes ille separatur à fodinâ, per suum fluidum terrestre procedens à parte respiciente meridiem, & egrediens per partem respicientem septentrionalem , conuertetur ad septentrionem : per

cæleste autem procedens à parte respiciente septentrionem, & egrediens per partem respicientem meridiem, conuertetur ad meridiem. Itaque magnetes Boreales per fluidum terrestre conuertuntur ad septentrionem : per cæleste autem conuertuntur ad meridiem ; quia conuertuntur ad centrum terræ, quod ipsis australe est. E contrario verò magnetes australes per fluidum terrestre conuertuntur ad polum mundi australem ; per cæleste autem ad Borealem ; quia conuertuntur ad centrum terræ, quod ipsis australe est.

Hinc oriuntur inclinationes, quæ variæ sunt propter varias à centro, & polo distantias ; variæ item propter latentes scopulos magneticos : à quorum fluidis valde potentibus propter magnitudinem fontis, & propinquitatem determinantur fluida magnetica. Ex eâdem causâ oriuntur variæ declinationes.

Magnetes autem duo parui, & liberi (idem esto iudicium de magneticis) inuicem determinantur, & conuertuntur, intra sphæram actiuitatis fluidorum priorum positi. Polus enim septentrionalis vnus conuertitur ad polum australem.



lem alterius , nimirum vt componant axem. Mouentur autem spiritus magnetici ab vno huius magnetis polo ad alium per medium ipsum magnetem, quia sunt contrarij. Contrarium enim à contrario circumiacente excitatur ad motum. De hoc magnete fusiùs in tractatu proprio de magnete.

Quod dictum est de terrâ Firmamento compositâ, & vnitâ per fluxum mutuum, & magneticum; idem quoque dicendum est de multis aliis, quæ dicuntur magnetica & electrica: de potionibus medicis, & humoribus inuicem motis: contenti enim medicamento tanquam vehiculo, seu corpore, varij spiritus excitantur, ac secernuntur per spiritû vitalem; fiuntque fluidum, quod per totum corpus viuens dispergitur, & consequenter ad humorum receptacula peruenit. humores autem fluido illo excitati, mouentur ad medicamenti locum, hoc est ventriculum, per illud spirituum potionis fluidum.

De planetis quoque, & stellis idem, quod de terra, & Firmamento, per fluidum magneticum vnitis, dicendum est; nisi quòd stellæ, & planetæ respiciunt, non polos Firmamenti, sed circulorum

peripherias in firmamento: à quibus densum accipiunt fluidum per superiorem partem : pèrque eandem ipsi restituunt fluidum rarum. Per mutuum influxum sic vniti planetæ, & stellæ, fascia item Solis; vehuntur à firmamento ab Oriente ad Occidentem.

Quemadmodum ergo parui mundi membra vniuntur cerebro, & ab ipso mouentur per spiritum animale; ita solida mundi corpora vniuntur firmamento, & ab ipso mouentur per spiritum magneticum.

---

## SEXTA ANALOGIA.

*Sumitur à transpiratione spirituum.*



QUEMADMODUM spiritus vitalis, & animalis, penetrant omnes partes etiam solidas, parui mundi, & per eas perpetuo fluxu dependenter à corde ita mouentur, vt, mutati quidem, sed tamen spiritûs, foràs erumpant, seu transpirent (quod probat odor.) Ita spiritus cælestis, & solaris, etiam solidas magni mun-


62 *Analogia utriusque mundi.*

di partes, excepto firmamenti conuexo, penetrant, & per eas perpetuo fluxu dependenter à Sole ita mouentur, ac renouantur, vt ex iis effluant vel iidem, vel per aliquam secretionem, & coniunctionem, immutati.

---

SEPTIMA ANALOGIA.

*Sumitur ab vnione partium per spiritum.*

 VEMADMODVM nulla est in paruo mundo consistens, & solida pars, cuius materia siue particulæ, non vniantur medio spiritu vitali à corde dependente, quo perduto, & ab alio subsequente non reparato, fiat totius solutio; ita nulla est in magno mundo consistens & solida pars, cuius materia, seu particulæ non vniantur spiritu solari à Sole dependente, separato, & non reparato (si tamen hoc naturaliter contingere potest) fit totius solutio: Cui consequens est per illos spiritus factas fuisse coniunctiones particularum, seu mixtiones. His conformis est S. Dionysius, lib. de cælesti Hierarchia cap. 15 nu. 41. vbi sic ait: *Ignis in omniis, & per omnia sine commistione funditur.*

F I N I S.













